

盤洲文集卷第四十五

章奏五

乞出第一劄子并六明

臣聞棟楹榱椀椀材之大小不齊者若梓人以棟爲榱以椀爲楹則覆壓之患當在朝夕聖主用材顧豈梓人之比然此言雖小可以喻大臣叢兩疲驚自幼以綴文爲業志在塵竊一第而已不自意畱落之後誤叨眷知擢在華近若使之掌制代言自視猶可勉強今承人之乏遂超邇列而使之謀王體斷國論天下之人皆謂不勝其任龜勉數月曾無涓埃之補直情

徑行浸積仇怨內之既不能識拔實材使之穆穆列  
布以助成勵精之治外之又不能消弭姦宄致令民  
弗奠居而無錙治之策揆之漢法當在石慶切責之  
科儻或強顏患失則誤國之罪誅之無益伏望陛下  
推天地之大恩憐斗筭之無用曲賜保全許臣上印  
綬而去庶幾不妨賢者之路干冒威顏臣無任奉御  
詔不允不得  
再有陳請

第二劄子叶七

臣昨早具劄子乞解機政跼踖踰夕未聞天旨不避  
斧鉞再輸情悃伏念臣一介疵賤初無致君澤民之

學仕於州縣米鹽靡密畏簡書理獄訟尙猶少有所  
長今驟居高位掌樞獨久而政路贊襄上無台揆軍  
國重事豈菲材嘗試之地小智曲見乖繆浸彰加以  
心力殫耗事至輒忘若視蔭空餐不能知難而退則  
罪愆日積將不可赦伏望睿慈察其不逮賜之歸田  
則未淪溝壑之前皆銜恩之日月洊瀆宸嚴臣無任  
戰灼俟命之至取進止奉御筆再  
降詔不允

第三劄子叶八

臣比殫誠悃冒犯咫尺顏偃拜恩私再降溫詔銜感之  
深淪胥心髓伏念臣疎遠冥頑孤立無援偶因清燕

浸簡宸衷擢之禁途馴至改地奏啟之際每蒙嘉獎  
臣受陛下之知不爲不厚常謂粉身糜骨不足圖報  
夫六馬尙能戀主顧臣豈應輕爲去就以忘陛下隆  
天厚地之恩但以臣材局褊淺智識蒙昧旣無嘉猷  
遠畫可以振起治功而不量其力欲抑僥倖以奉陛  
下正綱紀守法度之訓所慮積日累月寢招眾惡進  
無所補虛負使令此臣所以日夜恐懼不安其位傾  
瀝肝膈冀回天聽伏望聖慈曲賜矜允三瀆嚴威死  
有餘罪臣無任戰灼悻汗之至

辭免除右僕射兼樞密使劄子

臣伏蒙聖恩除臣尙書右僕射同中書門下平章事  
兼樞密使特降中使宣押臣赴都堂治事臣聞命震  
驚罔知所措竊以人主居高之位一日萬幾獨以  
論相爲職蓋用人賢否關國重輕繫民休戚非百執  
事之比必有負王佐之材隆巖石之望者斯能副眷  
注之意古之人居畎畝之中樂堯舜之道其尊主庇  
民之業皆素定於胸次故達而在上發其縕蓄可以  
使是君爲堯舜之君使是民爲堯舜之民功烈著於  
當世名譽垂於無窮若是則居其位食其祿仰無所  
愧俯無所怍如臣者翰墨腐儒斷無它技智效一官

猶懼不及乃使之代天理物其覆餗可日月冀制命  
既傳羣聽已駭伏望陛下曲回淵鑒洞察赤情圖任  
人英勿嫌反汗庶幾微臣得逃非據之大譴不致重  
爲天下後世之所詆訾干犯天威臣無任

乞薦舉監司郡守劄子并牒

臣聞內治之急在乎官得其人今州縣之間儻監司  
郡守皆賢則職事修舉下無蠹弊屬吏之能否如鏡  
燭形無所逃隱自數年以來非不開薦舉之路而風  
俗未變挾私勝公干請奔競曲爲題目刻章所譽非  
其親舊則是蒙恩託契之家或甲乙宛轉更相酬報

名爲公薦多是私心故薦牘雖交於公車有司亦視  
爲文具置籍中書未嘗舉行臣以驚下偶補台輔之  
闕見識不明聞聽不廣遠近人材臣不能知其一二  
若賢者退而家食仕者不稱其職臣則有罪欲乞令  
侍從臺諫兩省官舉風力堪爲監司吏能堪爲郡守  
者各一人三衙知閣舉材武可守邊者一人舉而不  
實甘坐其罪俟舉牘既集臣與同列采其名實相稱  
者一一除授或未有窠闕則簿錄以待有關日先除  
各於除書內稱列所舉者職名它時若有治行著聞  
則乞推進賢之賞若所舉之人或進對不稱旨或爲



臺諫論列或為監司案劾或為百姓訟訴驗治有狀隨其罪之大小具舉者姓名取旨必罰若宰執徇私隱而不奏者亦乞懲戒庶幾實材輩出振起治功天下幸甚取進止

以霖雨乞罷政第一劄子韓道肱

臣伏見季春之月天多陰晦而盛寒如冬大雨仍降蠶麥秧苗俱有損壞仰軫聖慮致於玉食頻去葷味變理如此罪將安歸而又僕僕祈求羞對輿阜儻或患失不去必致人言伏望睿慈特賜譴緹庶幾可以調玉燭而格豐年干冒宸旒臣無任御筆霖雨稍多未至有害於蠶

麥降詔不允不得更有陳請

第二劄子

臣以斗筭之資竊台輔之位夙夜危懼莫知逃責之計涉春以來常陰為沴禱竺宮以迎梵像放房緡而蠲門稅一月至再矣變調無狀靡所錯躬上之則使太官屏常珍而進蔬饌下之則使農夫紅女懷耕織之憂臣之罪多矣隆恩天覆不即策免臣上章自劾拱聽威命而宸札矜容降詔之訓異於常典銜感隕越不自赦欲望聖明行漢法罷遣歸田圖任異材俾熙帝載則和氣可召咎證可消矣干

觸天聽臣無任戰汗待罪之至

再乞罷任劄子

臣材劣能下無足算錄誤叨眷知超居宰揆力小任重自料必致顛躓比以淫雨爲害抗章請罪仰蒙聖恩拊以溫詔今早再瀝誠懇又勤天獎使之安職公議不貸遂玷霜簡仰負陛下使令之意雖九死無以塞責伏望睿慈令臣解罷機政以聽譴罰之命干犯咫尺威臣不勝震灼之至

辭免觀文殿學士第一劄子

臣伏聞已降制命特授臣觀文殿學士提舉江州太

平興國宮任便居住臣驚傳恩旨感涕橫臆伏念臣不材無取誤蒙簡拔輔政旬月曾蔑補報孤負任使浸積過譽竄流遐遠乃瀆之宜豈期優恩曲垂軫卹使之奉祠還鄉已爲大幸書殿隆名所以寵老臣碩德之去豈凡庸罪戾之人可以叨此非常之渥若或冒處益重疾顛伏望聖慈特賜追寢庶使危蹤免抵大譴干犯宸嚴臣無任  
之至

第二劄子

臣伏准閣門降制告

云云

臣仰窺制

命感涕交流伏念臣竊位台衡秋毫無補小器盈滿

福過災生罪愆旣彰難逃清議儻非聖明憐惻則尸諸爾觀未足塞責臣自聞寵渥已懣懇辭跼踖至今未蒙追寢夫書殿美名秦祠優祿皆非臣所當得若或貪居冒受則大譴大劾益重顛覆伏望聖慈特賜處分所有告命臣未敢祇受

辭免知紹興府第一劄子

今月二日伏准遞到尙書省劄子七月十八日奉聖旨除臣知紹興府臣踞聞寵命不勝戰兢伏念臣材力繇薄智術乖疎比自入朝獨叨眷遇超居宰揆燮理無功百謫旣盈罪當竄殛聖恩寬大委曲保全奉

祠還鄉纔逾兩月敢謂軫記不忘卽加選用捫襟感泣何以論報念稽山密拱行闕實惟雄藩豈伊罪戾之餘可堪師帥之任伏望聖慈改授真材用協羣議免使孤蹤重罹顛沛干冒宸嚴臣無任隕越俟命之至

第二劄子

臣近具奏劄辭免知紹興府恩命今月二十二日准都進奏院遞到詔書一道伏蒙聖慈降詔不允者臣伏讀聖訓感涕交流伏念臣疏庸之資嘗試無狀狼狽去國方此省愆宸眷不遺屢垂簡記亟加拔拭付

以大藩仰惟天地之隆恩卽當聞命而引道載念陪京之重夙稱謀帥之難而臣聞望素輕譴劾未久深虞曠敗復累生成輒慙愚衷游干洪造伏望睿慈憐其無用許令依舊奉祠庶休田里之居獲享治安之樂所有恩命臣未敢祇受干犯天威臣無任感戴戰懼俟命之至

除紹興第一手劄子八明

臣入朝二年居輔弼之官十閱月以駑鈍無用之資識不足以燭微才不可以任重獨蒙陛下眷知異等寬其不逮之罪溫顏殊禮常賜稱獎臣殫智竭誠亦

欲盡死以報柰何福過災生招致人言上惑聰聽聖恩寬大不忍竄逐使得以祕殿眞祠優游里閭臣方懼叨縻廩稍無所云補豈意簡記之隆付以近鎮驚懼感泣不可具言已慙忱誠懇祈寢免臣犬馬戀軒之情雖食息不敢忘隆天厚地之恩但以得罪去國不敢以奏牘輒至冕旒之前今者旣蒙睿慈再加收用故廢略披梗概臣螻蟻賤微銜戢恩渥何以圖報干犯宸嚴臣無任戰懼之至

第二劄子八明

臣近貢免牘仰叩九闈伏蒙天慈賜之溫詔臣素叨

眷遇之異仰惟選用大恩便當卽日上道特以會稽近藩眾所指目而臣罪譴之餘去國未幾若或貪榮疾趨必致重遭譏詆輒敢稽留詔命復布悃誠已別具奏劄乞賜施行伏望聖慈察臣愚衷赦其再瀆之罪臣干犯宸嚴不勝戰懼之至

第三手劄子

臣比辱誤恩俾守輔郡荐殫誠悃弗獲俞旨不敢重干威聽已祇拜告命取信州路自衢入婺迤邐到越謹具奏稟伏乞睿照

第四手劄子

臣今月二十一日准省劄奉聖旨令臣疾速前去之任臣自叨除命以言者方在要路實有所畏兩具免牘塵紊淵聽仰蒙詔旨不允臣方敢治行偶臣以感冷臥疾稽留數日遂致再勤聖訓臣已卽日就道伏望睿慈特賜原赦

到任手劄子

臣叨拜恩除去皇城不遠天日在望犬馬結戀之心非不願一瞻清光少殫懇悃蓋以人之多言必有譏議故不敢陳乞過闕今已到越視事惟知鞭策駑鈍庶幾少副任使之意瞻望闕庭臣無任感恩激切之

至

盤洲文集卷第四十六

閏月朔

上堂

盤洲文集卷第四十六

章奏六

請祠劄子

臣蒙恩守越亦既半載不敢養高尸祿事無鉅細必躬必親將期寸效仰副器使而到官以來偶與風土不相宜無月不有寒疾氣血頓衰髭鬢俱白近因冒冷每夕出汗飲食減少筋骸羸痺自節假之後在告又踰半旬深惟輔藩重寄非臥病之地若或因循曠弛必致不免大譴夙夜憂懼心如焚灼欲望聖慈察臣誠悃賜臣祠祿以歸休里巷庶幾訪求藥餌不致

盤洲文集

卷四十六章奏六

一

遂委溝壑干犯天威臣無任戰慄俟命之至取進止

秀王夫人薨慰劄

臣恭聞秀王夫人奄忽薨逝仰惟聖情不勝哀痛臣忝居舊弼密邇宸居不獲隨班稱慰臣瞻望闕庭無任屏營之至

慰莊文皇太子奏劄

臣恭聞皇太子奄忽薨謝驚傳凶訃無不慘傷仰惟陛下篤天性之愛念國本之重聖情悲切何以勝處臣忝居舊輔嘗邇班聯追想慈仁篤厚之德金昭玉粹之姿含酸飲泣不能自己恨以身在外服不得奔

走儲宮哀臨伏望陛下歸之天數特抑哀悰臣瞻望闕庭無任屏營之至

請祠第一劄子八月

伏念臣待罪會稽行且滿歲竭力奉職僅逃曠弛緣郡治鑿山作室夜氣與平壤迴殊臣孱劣之軀早衰易病秋風稍緊便已伏枕而比年以來目昏花而不明耳作聲而重聽視燭下之牒訊庭前之訟頓覺費力日以滋甚倘不稍加休息恐遂淪於鬼錄加之妻息婦孫之眾呼醫求藥項背相望今戒寒在辰惴惴然有故疾之憂苦又臥疴倘廢事瘵官必致大譴是



蘇洵文集 卷四  
敢披瀝胸臆仰投君父伏望聖慈赦臣罪戾許臣奉  
祠而歸少賒殞踣之期實出乾知之造干犯宸嚴臣  
無任戰慄俟命之至

第二劄子

臣比殫誠懇覬望叢祠伏惟大庭未間俞允重念臣  
治越以來黽勉職守訟訴不曾淹留囚繫亦復稀少  
而獨削餽遺省節費用錢穀粗有儲積支遣不致闕  
乏非是託故避難苟求安便特以蒲柳之姿望秋先  
衰深恐入冬又復多病兼孥累之眾率皆不伏水土  
藥裹關心畧無虛日盡室於此不寧厥居臣之事君

靡容有隱輒犯再瀆之誅復披悃幅庶幾得遂前請  
若或聖慈未聽臣投閒置散則恐便鄉去處別有使  
令乞賜選擇尙期罄竭圖報萬一塵紊聖聰臣不勝  
皇懼待罪之至取進止

自劄劄子

十八日

臣近者累章乞祠蒙恩降詔不允已具奏牘欲申前  
請忽見李大正罷章臣又不能自恕輒敢復干威聽  
臣伏見今日仕宦莫難於作縣臣所領郡獨會稽李  
大正其吏材治績爲八邑之冠臣嘗草薦章乞行旌  
擢未及投進緣其人賦性鯁直肯任怨以革弊拒卻



請託摧抑豪右雖諸監司人亦奉法追治畧不假借故人多怨之自柳大節到任中懷私意輕信讒言多方捃拾皆無事實卻二月本縣推排不合減退浮財及今朝五月和買必有情弊令婺州追押錄以下十餘人鞠勘李大正既經朝省聲冤乞移獄未見施行臣遂與之備申蓋所惜實材能吏無辜冤抑即非容庇姦賊與之爲地今柳大節已遭論列將及兩旬旋作日前按章罔上行罰以伸其私憤所謂和買即是轉運司備坐都省批下朱申狀所乞依上虞三縣例自物力十五貫均敷臣爲見此事係

葉顛知上虞縣日所行百姓既以爲是攀援有請朝廷既令施行州縣豈敢違拒臣既已依稟行下亦會榜示諸縣候人戶有詞訴卽類聚看詳續行申明改正今來柳大節以此歸過於李大正而劾之大正既已放罷臣亦不能無罪臣已先次發遣家屬歸鄉將職事牒以次官主管見今家居待罪伏望聖察特賜罷黜施行干犯宸嚴臣不勝震懼之至取進止

奏水潦劄子

八月廿二日

臣今月二十七日得轉運司報奉間聖旨累次詢問浙東被水傷損禾稼仰見陛下憂民之誠意伏念臣

所管新昌嶮縣因閏月中旬大雨接連台明諸山相繼發洪下流至曹娥江又值潮大內外水勢相合故三縣臨溪皆遭水患臣已將公使激賞庫儲積到錢一萬貫撥入常平案專充賑卹支用差司戶何萬同縣官逐一相視量損壞屋宇支錢修葺計闕食人戶給散錢米訖自此數旬之內連併淫雨雖三次祈禱得晴不三數日又復雨作遂致水潦前後盈溢有傍江鄉分已卽時差官開掘塘岸泄放緣會稽數邑少有高卽地段農民併力撩救收刈所積溼稻又復生芽在田者皆爲水損目今祈禱再得晴霽已三日盡

皆乘急攤曬打簸若自此無雨尙可收拾殘零稻穗統計紹興八縣田畝除早稻中稻豐熟外晚稻居十分之四今來所損約已一半本旬軍人打請正當霖雨未晴之際每石米價頓增一貫雖取會到逐縣被水鄉分明具回申投運司未有田畝子細數目依條八月三十日人戶投狀卽行覈實檢放伏乞睿照契勘諸縣發洪水去處因暴雨衝擁闕石丹毀田畝復爲溪坑非數十年逐旋鋤壅不可復耕及有潮水衝打坵角入江者自來轉運司只是支蔓行遣不肯從實倚閣致使農民無從納稅實爲經久

之害俟看踏到田段數目

伏乞聖察

再奏被水人戶劄子

臣近遣官往上虞新昌嵯縣賑卹水災逐一循行了當緣山水夜至衝去茅屋弱婦幼子死於非命共四十九人各已等降給錢使之修葺葬送自六貫至一貫共計六百三十六家已令諸縣將被水下戶見欠稅租官物並各住催據所欠數臣將公使激賞庫錢代爲了納其闕食人戶已催促鈔劄實數卽行支米賑濟所有因雨水浸損禾稻之家各已受狀分差官屬檢視訖伏乞睿照

試驗揀汰人劄子

戊子正月二十二日  
上二月一日依

臣近准樞密院行下史正志陳請令諸路將揀汰使臣銓量人材非老弱者具名申上本府共有一百五十餘人臣將揀選到人躬親看驗亦有年未五十身無疾病可以從軍者卻稱係筆吏出身不習弓馬乃是竄名冒賞分明臣竊謂近歲軍賞之弊無以矯革此等人既已寄名得官隨踵離軍便與舊隸行伍人一等注授竝予差遣俸祿相繼更不待闕終身微幸誠爲太甚臣愚欲乞行下諸路向後揀汰使臣到任竝令知通共職官逐一子細試驗其年未五十非有

廢疾之人若或不習弓馬卽發回吏部令與在部人  
袞同理名次差注庶幾履行陣傷矢石之有以甄別  
伏望睿察更賜  
如臣言可採乞賜施行取進  
止

再請祠劄子

臣待罪會稽於今一歲有半去秋累上奏牘祈旬叢  
祠仰蒙大恩疊賜詔札時方水潦四溢穀直頓增人  
情嗷嗷朝不及夕臣懼有避事之嫌黽勉就職所幸  
踰冬涉春米價如舊人不告病境內無流冗之患宿  
麥在野秋熟有期臣以衰瘁之軀不安風土疾疹相

繼願欲少休伏望睿慈曲賜矜容俯從誠請儻它時  
別有使令不敢辭避干犯天威臣不勝跼蹐戰越之  
至取進止

謝宮觀劄子

臣鴛劣之資畧無所長猥叨誤知躡居宰路調鼎三  
月自誓竭誠奉公仰報恩紀而才疎智淺曾蔑涓埃  
之補讒言不恕以爲罪積邱山非陛下特垂昭鑒則  
投荒不足以塞責去國不久卽忝輔藩之寄雖欲抑  
強去惡力圖薄效而翫日積久復無尺寸之功聖恩  
寬大俯從懇請遂獲奉祠以休衰瘁伏聞近者弟邁

進對曲蒙齒錄復彤天獎貸其罪戾未忍弃捐臣銜  
敢恩遇徒深感泣自顧非才雖碎首捐軀安能圖報  
天地之大德臣既奉敕命已卽指塗益遠觚稜不勝  
瞻天戀聖激切屏營之至

奏旱災劄子

八月廿二日

臣仰惟陛下焦勞圖治勤恤黎元講求民瘼不啻飢  
渴一聞休戚卽日罷行患在士大夫畏縮自愛不肯  
道其實故下情鬱而不達聖澤壅而不流古之人雖  
在畎畝而有封章之獻至或嬰逆鱗而不顧此風久  
不聞矣臣不材無取嘗玷宰路非芻蕘庶人之比也

居閑故里目之所覩耳之所接不忍斯民日趨無告  
流亡捐瘠莫之拯救若私有遐心茹而不吐尙饗祠  
官之祿以自活其妻孥是曾狗馬之不若也故不避  
譏議不憚譴訶矯首九闔披寫愚懇伏望陛下少垂  
意焉臣比讀邸報伏見陛下以江西湖南旱嘆側身  
禱祈屏徹葷味又令帥臣監司汰擇守令德至渥也  
臣謂江東兩郡之旱亦江西湖南之旱也陛下必不  
慮遠而忘近恤彼而緩此特未達於天庭爾及覩七  
月下旬施行洪潭兩路賑卹旨揮猶未及乎江東兩  
郡豈有司奏牘或未詳盡不能感動天聽耶臣於是

不謀於人而謀於心不慮其身而慮其災輒敢犯分言之臣之鄉邦自去夏五月至於今春曾無終日好雨故陂塘所蓄之水甚鮮並水之田僅能車畎播種至于高仰之田種不入土者四境之內居三之二自春接夏或累日或盈旬間得小雨尙或不能破塊壤地龜坼早稻焦枯其瀕水低田有歲收千石米者今有百石之穀若是者蓋無幾也通六邑之中百分不獲一二自夏接秋惟六月甲子得數刻之雨既不澱潤亦不周徧節過白露驕陽轉甚晚稻又復槁矣常歲八月民種蕎麥可充一兩月糧異時飢饉得蘿蔔

雜菜和米作糜亦可度日皆以久乾土硬而不可種自此不雨則來年麩麥特未可望小民艱食或有攜妻子赴井同死者或有聚眾強糶而相殺傷者或有逢縣尉而持刃拒抗致憲司傳以爲賊而出兵掩捕者前月提舉官吏候入饒州界親見流民糶負係道候恨無以畱之今去者紛紛至于卒歲將十室九空何以爲邦自來水旱未嘗早晚絕粒所闕廩食不過開歲數月饒州去秋已小歉今年早禾不穫自季夏而食闕若秋冬之交有雨澤有人力可以藝麥逆數成熟尙有七八月期士民上戶鮮有隔年之儲猶無



以自贍其家故耕夫轉徙所不遑恤率是交還牛犁泣辭而後去所畱牛犢無水可飲無稗可積不保其存也田家營穀作種尙且艱難若人牛又闕則向去春耕益爲可慮蓋今歲之早起於饒州若池之建德東流與饒境相接者亦薄旱饒之德興浮梁安仁數村與徽信相接者則微有所收江東之旱惟饒與南康兩郡出境則江洪以往亦旱也父老七十歲者云自歷年以來所未嘗見今州縣若不免租則有田者無以輸納若放苗不收則州縣何以給遣切聞饒州有前年椿畱三萬石米已借充官兵月糧所餘止有

萬石朝廷捐以與之不過可支一月見在常平義倉二萬餘石併得去年儲粟賑贍尙不能足蓋六邑窮民有籍于官者二十萬戶且約一家三口家得石粟僅能飽其一月之腹爾儻官無餘粟野有餓孍歸之天災無可奈何可也不得已有秩者暫閣俸稍亦可也飢餓之民散而之四方不至聚而掠奪爲盜幸也數千營卒一月無糧其肯俯首餒死乎臣區區過計非私於鄉邦而然也恐它日重貽肝食之憂故具述凶歉之實以聞不敢妄及臆說伏望聖慈察其心而信其言揀其災而弭其患臣不勝戰汗待罪之至

貼黃一臣居鄉田疇至少大熟之年所收不過千石四子因官置到共有數百石通一歲秋苗纔百有餘石非是營私飾說前件所奏尙猶不盡瑣碎若朝廷密遣人察問有一欺誑甘伏罔上之罪伏乞聖察

劾管璆奏劄

庚子八月六日進入九日管璆降兩資其舉狀令吏部退還

臣久去軒陛不勝犬馬之戀伏見陛下留意薦舉闕防再三然法出姦生弊不可革臣切謂朝廷行黜陟之政臣下寄刺舉之權惟前宰執有舉無刺眼見姦蠹吞聲切齒今舉吏有罪不容緘隱伏望聖慈少賜

睿覽臣今年二月二十日以去年第四紙改官文字薦舉饒州樂平丞管璆續次持書鋪筆帖來云奏狀以五月十七日到闕限期甚迫遂措改作二十六日投進既至考功爲銓吏點檢問難乞將奏檢移易日子前來符合管璆委曲懇禱臣語之曰書鋪爲蛇畫足自奸罪譴尋常州縣換赤歷移月日固或有之此乃需章若旋易日辰便爲罔上不敢相從不謂管璆自將元檢輒行改換盜用官印行賂計會已得放散敢爲如此它日進步何所忌憚豈可保任終身臣已具狀申部乞追人根治臣發之罪伏乞淵覆曲賜



原赦瞻望闕庭臣無任戰懼之至取進止

上堂行

盤洲文集卷第四十六 閏月朔

盤洲文集卷第四十七

章奏七

繳太史局轉官劄子

十月初三日批旨楊覺民等轉官恩例候試補

直長了日收使

臣准中書門下省送到錄黃一道為太史局靈臺郎楊覺民等四人依醫官能說例該遇覃恩轉官令臣書行者右臣取會到太史局遷轉資格自局令至直長共九階竝係十年無過犯方許下磨勘諸靈臺郎滿二年遇直長有關必須試歷算科方許轉行近者朝請至中奉大夫該遇覃恩亦曾引例得轉行一官

因臣寮論列竝作減四年磨勘其伎術官於赦文中初無轉官之文而靈臺郎必須經試方可轉直長縱使合轉一官正與朝請大夫以上一同若輒攀醫官例暗得轉行則爲靈臺郎 盡皆不試而遷誠爲冒濫今來欲乞將楊覺民等依武臣轉官法與減五年磨勘所有錄黃臣未敢書行謹錄奏聞伏候敕旨

繳侯進詞頭劄子

十月十二日御筆依奏三省進呈委方滋根究請實

具情犯聞奏

臣准中書省送到武功大夫鎮江水軍統領侯進降官詞頭令臣撰詞進入臣昨在鎮江守官聞軍中稱

說侯進帶官錢五萬貫往湖北買木數年無歸意就峽州宜都縣起造大第招聚倡樂宴會奢僭縱使兵卒陵虐居民奪其物產用竹纜馬船橫截江流聲鼓鳴鑼邀遮客旅決打號令強拘箠笈一方苦之甚於豺虎都統官累曾催督遷延不回今係荆南帥臣李道因商旅陳狀告訴不法事件及校尉胡振甘反坐之罪訴其聚集亡命圖畫入川地形恐有不測李道備申朝廷送提刑司差官體究雖多從闊畧而攔截客旅等事竝是詣實戶刑部看詳恐迫人路遠淹延刑禁遂降一官放罷臣竊見聖斷方欲痛治姦賊之

吏如侯進以官錮數萬緡逗畱不歸肆其凶暴少有此比兼李道申侯進初到便經帥司陳狀乞將民間夾江林木盡行批號倒伐不許占恡帥司不從至於出榜禁約可見無所忌憚只降一官太爲輕典今若釋其害民之罪則侵盜官錢所不可縱臣愚欲乞行下都統司鈔籍家資令荆南帥司拘收屋業送就近鎮江府取索干照根究錢物依新降旨揮斷罪施行所有制詞臣未敢撰入取進止

繳王之望結局轉官劄子

奏

十一月四日當晚  
進入次早御筆依

臣伏觀十月二十六日旨揮淮西宣諭司結局其官吏軍兵竝依汪澈例等第推賞令開具申尙書省取旨臣伏見汪澈督師襄漢之時強敵對壘嘗交鋒刃一行官吏頗亦憂危及寇退師還以次行賞第一等轉兩官第二等轉一官更減二年磨勘第三等轉一官選人亦有改官者當時清議尙以爲過今歲淮西外無邊警如一府官吏坐受恩賞竊恐屯戍之人不無怨望儻俟其開姓名始行封繳不若寢之於未然庶幾免開徵幸之端所有前降旨揮臣雖已書行欲望聖斷更賜詳酌施行

繳李迥差遣劄子

十一月七日御筆將上

臣准中書門下省送到錄黃一道右宣教郎李迥差監行在左藏東庫臣伏觀見行條制初改官人惟有出身許授學官其餘必須注授知縣親民差遣蓋慮仕進之人不歷州縣它時除用不能通曉民事此萬世不易之良法也聞或賁緣干請有得宮觀以脫親民之官者公議猶或非之今李迥係用臣總領所薦舉文字於今年八月改秩若便作京局釐務官則破法起例蓋自此始雖係臣門生難以容私緘默所有錄黃臣不敢書行取進止

繳王若鈍用居廣恩例劄子

十一月十一日御筆依奏

臣准中書門下省送到錄黃一道皇兄岳陽軍節度使居廣乞以初除開府儀同三司合得親屬占射差遣恩例與將仕郎王若鈍收使十一月八日奉聖旨差監文思院上界臣仰惟陛下以任子之宥尙思更張之術今必令銓試入官乃所以使世祿之家頗知務學不敢徼幸門蔭便萌彈冠之心檢照隆興元年四月指揮初出官選人不許用父祖親戚應合得恩澤免試雖見任宰執亦不許陳乞回授若放行王若鈍一人則繼踵而來無以救官冗之弊矣欲望聖斷

特賜追寢已降指揮所有錄黃臣不敢書行取進止

繳巫伋召命劄子

十一月十九日上即日御筆依奏封付洪某

臣准中書門下省送到錄黃一道十一月十八日奉聖旨巫伋陳俊卿呂廣問王時升竝召赴行在臣伏見春秋之時諸侯互相爭戰其覘國者不論其地之大小兵之強弱惟視其人材如何故朝多君子則敵不敢伐茲已然之明驗也如巫伋者才學識見政事操履畧無一長徒以詔事秦檜爲之鷹犬故能躡取大官今廢退十年議者不以爲屈寄寓無錫縣專以私酷爲生哀聚無賴爲害一邑方多事之際雖販繒

屠狗之人果有所長亦不應弃若其無用何所取材雖云嘗爲執政有此虛稱初無時望品其人物誰不過之召節一馳取笑中外秦檜殘黨如汪勃章復宋樸之徒與伋初無優劣近因言者奪其三人復職若伋收召則勃復之流人皆冀其復用矣伏望聖慈特賜鑒察所有錄黃臣未敢書行取進止

繳汪汝嘉等差遣劄子

閏十一月六日當日御筆依奏

臣准中書門下省送到閏十一月二日錄黃一道數內汪汝嘉差知荆門軍李琛差知永州宇文仔差知邛州臣伏見汪汝嘉昨因手刃表弟李穎停官編管

數年之後交結秦檜親黨復還仕版幹辦諸軍審計  
日常躬親粹毆公吏遭臺章放罷稟性夙麤不知懲  
創李琛之守婺州專以刻剝爲政苞苴秦檜之門恃  
勢妄作減尅軍兵請給幾至生變郡人有寧與猛虎  
遊莫遇李婺州之語劾罷已久自知潛伏今已七十  
有餘耄昏戒得宇文仔新授果州通判意欲別營差  
遣妄訴於都堂稱有女嫁知州丁訥之子合行迴避  
省部送本路勘會詣實未到聞有丁訥之弟丁顏亦  
訴于朝稱兄訥本京東人寄居湖州三子皆未娶本  
宗竝無人與宇文氏連姻妄冒如此何以臨民臣愚

欲乞令汪汝嘉李琛終滿今任宮觀宇文仔依舊果  
州新任差遣所有錄黃臣未敢書行取進止

繳趙密恩數劄子

閏月八日當  
日御筆依奏

臣准中書門下省送到錄黃一道閏十一月六日奉  
聖旨趙密已除少保依前崇信軍節度使落致仕權  
殿前司職事所有合得恩數等竝依楊存中昨除少  
保日已得旨揮施行臣取會省部條格卽無三少初  
除恩數向來楊存中係特降旨揮依簽書樞密院事  
例今來趙密元因致仕得除少保近之再仕議者謂  
當納還三少始合 怨者則謂其權掌禁兵若三

衙休息諸帥回歸密必依舊請老雖不納少保可也  
今若無故而輒依前比後省 緘默放行恐不免於  
清議所有錄黃臣未敢書行取進止

繳莫汲編修官劄子

閏月十二日次  
日御筆依奏

臣准中書門下省送到錄黃一道閏十一月十二日  
三省同奉聖旨莫汲除樞密院編修官臣伏見秦檜  
專權之久至其末年欲禽取天下賢士大夫而誅戮  
之檜雖奮殺人之心必有負屠宰之材蘊虎狼之性  
挾戈矛之刃者爲其用而檜之志始可逞也張常先  
之謀張宗元莫汲汪召錫之圖趙令衿凡是數人適

檜之死令衿輩始免於刑戮太上皇帝更化之初卽  
日竄之嶺海天下之人以比四凶陛下踐祚覃曠蕩  
之澤此輩始得生還正當奉頭鼠伏杜門苟活不自  
齒於薦紳可也雖古有使過之文朝廷拔拭丹書何  
時無之至若此等凶人縱使有荀孟之學班馬之文  
亦不可以其才而復用蓋廢錮一人使世之嗜進喜  
禍者不敢萌吞噬忠良之計所以銷姦賊於未然之  
前也若汲者雖以試藝登高第而不自愛惜

若碌碌州縣塵埃之職猶之可也豈宜擢

使入中都列屬西府而出入省掖從容宰輔之間



耶除命一出眾論必駭臣不敢避怨爲人禁害使後之士有以懲戒覆車之轍而修爲君子之歸也辟猶虎豹豺狼當放之於深山廣谷之中若置之苑囿則騰擲圈檻不可復制矣所有錄黃臣不敢書行取進止

繳余堯弼職名劄子

閏月十四日當日御筆依奏

臣准中書門下省送到錄黃一道信州奏左中大夫余堯弼爲筋力衰憊不敢久竊祠祿乞守本官致仕閏十一月十三日奉聖旨復龍圖閣學士致仕令臣書行者臣伏見章復因致仕復龍圖閣學士言者論

列併與汪勃宋樸而奪之今纔數月爾堯弼復託疾請老亦得此職夫老龍之去端明一閒耳異時執政無瑕而退僅得端殿豈有積愆久廢之人一命遂居六閣學士之首者此除若行則同類者又將羣起而不可遏在秦檜時堯弼以臺諫而爲鷹犬坐政事堂而伴食其無用而易制蓋勃復一流人也今勃復失之於前而堯弼得之於後一予一奪有損陛下總核之政是使握齷之士知可以竊位於一時而不妨叨榮於末路則墮喪名節爭巧宦以希進矣所有錄黃臣不敢書行取進止



繳莫汲計議官劄子

閏月二十四日次日御筆改幹辦公事

臣近於今月十二日以莫汲除樞密院編修官嘗論其謀殺趙令衿之罪具劄子封駁即蒙御筆依奏繼有沈介薦章稱其智畧縱橫才力明敏乞授一光州差遣或制置司職任使之招諭皇甫侗餘軍及收復光州伏覩御筆莫汲可差充沈介屬官至二十日執政批旨卻作勘會湖北京西制置司合差參議官二員奉聖旨莫汲差充計議官候立功效日陞擢所有莫汲過愆臣不復縷數以瀆天聽但汲元係左從事郎坐罪編管化州更大赦放令逐便臣取會吏刑部

赦後即不曾敘復元官自用兵以來有都督府樞密督視府江淮宣撫司荆襄制置司川峽及兩淮宣諭司若宰執開幕府則從官作參贊其它官屬則有參議多係卿少郎官及曾歷監司郡守者爲之其次則有幹辦公事准備差遣應是選人只作准備差遣近歲莫汲在虞允文制置司亦是准備差遣今忽超躡常制新立官稱聞者驚異其事自來臺諫彈擊給舍繳駁之人未嘗隨踵收用或有它時澡濯而起者其初必與降等差遣蓋示洗垢棄瑕之漸今汲因臣封駁及升等創置官名以寵之又許以它日陞擢則臣

盤洲文集 卷四十七  
語言妄發實有不合封駁之罪雖蒙聖度優容臣實何顏尚居禁掖臣等待朝殿乞對已三日居家自訟不敢入省欲望聖慈特賜黜責庶幾後日居兩省者不敢輕議朝廷用人得以懲戒冒犯天威臣不勝戰汗之至取進止

盤洲文集卷第四十七 同日校

上堂行

盤洲文集卷第四十八

章奏八

繳張訓通復官劄子 乾道元年四月三十日

臣准中書門下省送到詞頭一道刑部檢舉到張訓通敘官元係張浚奏宿州之役初非戰敗而統制官等無故引歸殿前司統制官張訓通係軍馬入城之際先次一面引歸欲望酌情定罪明賜貶降奉聖旨張訓通降四官本部看詳依條合自降斷敕日每理再期一官本人期限未滿聞該遇赦恩合敘一官元係正侍大夫和州防禦使因罪降授協忠大夫果州

團練使奉聖旨依所申於階官上與敘令臣命詞給告臣伏見張訓通弓矢鞍馬漫無寸長怯懦不武又無與爲比但能涉獵七書百將傳藉此以爲談柄隸鄂州軍籍之日與田師中典掌財物背公營私叨冒官秩至於橫行遙郡符離之役首先遁逃原情定罪戮之市朝如孔福可也旣從輕典鑄官自劾有司卻與尋常罪犯之人會赦便與敘復竊懼無以懲戒將士臣愚欲乞將張訓通同罪之人竝候軍前顯立功效之日大將保明取特旨方許牽復庶使從軍之人咸知復玷缺之艱難不敢愛身誤國所有詞頭臣未

敢撰述取進止

繳秦墳宮觀劄子

五月一日  
即日依奏

臣准中書門下省送到錄黃一道敷文閣直學士右朝散郎秦墳狀昨自春官得請奉祠滿罷之後荐經憂患累重仰祿欲望特差宮觀一次奉聖旨差提舉江州太平興國宮臣嘗讀唐明皇實錄載李林甫身死之後朝廷治其積愆諸子俱配流嶺南家口隨之每房各與奴婢三兩人并緣身衣服飲食自餘資產一切官收臣竊謂秦檜藏姦稔惡天下之人戶知天之網不容使之自斃厥妻厥子繼踵淪亡不肖之孫

官職如故華屋厚藏可謂幸矣爲之計者政當恐懼  
屏迹不復自伍於搢紳之間今乃無所忌憚尙敢陳  
乞差遣雖宮觀甚小在有罪者得之則人以爲除用  
之漸臣懼秦檜黨與牽連相慶自此皆有彈冠之心  
所謂一葉不去將尋斧柯者矣況當國用不足而秦  
氏之家金珠充牣國家旣已貸而不籍凡前此教坊  
所汰之人填皆養之于家以奉歌酒之歡乃稱累重  
仰祿其公然欺世玩侮朝廷有如此者臣愚欲望聖  
慈將秦墳宮觀旨揮更不施行所有錄黃臣未敢書  
行取進止

繳潘粹卿恩澤劄子

五月三日

臣准中書門下省送到錄黃一道潘粹卿乞放行改  
奏葉旁作恩澤事奉聖旨特令吏部放行令臣書行  
者右臣取到前件公案拖照得潘粹卿將父遺表恩  
澤奏補胡備於紹興二十六年十月內降敕據本人  
稱胡備未受敕聞於紹興二十七年三月內身死本  
人於當年十二月內陳乞改奏與弟清卿於團練使  
上轉行吏部檢坐條法只合作減年收使本人至紹  
興二十九年四月內卻經臨安府改奏異姓無服人  
葉旁作吏部節 告示出違條限委是允當兼胡備

當來救命係身亡後旋行寄納所稱未曾被受已是詐僞今來陳訴曾於限內陳乞係是乞與潘清卿轉官卽非限內曾行陳乞奏補今若特令吏部放行則是條法無用所有錄黃臣未敢書行取進止

繳梁俊彥推賞劄子

五月六日次日御筆並依

臣准中書門下省送到錄黃一道五月四日奉聖旨梁俊彥合該軍器所皇城司酬賞可依正月六日四月七日已降旨揮施行令臣書行者右臣竊見正月內軍器所推賞指揮官吏轉一官資礙止法人特與轉行不及全年人紐計推賞繼因臣寮論列至今年

六月實及二年方合陳乞四月內皇城司推賞初降旨揮梁俊彥特轉右武大夫續降旨揮令依例回授今來疊前兩賞並依已降旨揮有司未知所從若用正月六日旨揮卽歲月未滿有礙條例若用四月七日旨揮卽已令回授無可施行臣愚以謂爵賞天下之砥石所以厲世磨鈍惟其明白而無偏私則僥倖之計不萌缺望之心不作自來正使礙止法之人有特旨方轉行遙刺至防禦使方轉過橫行所有皇城司被賞人宋鈞宋直溫皆是正使轉行遙刺梁俊彥亦是正使與逐人一般前降旨揮獨與超轉橫行則

為太優後降旨揮卻令回授又似未當臣欲乞將梁俊彥皇城司賞典依宋鈞宋直溫例與轉行遙刺其軍器所賞典即候六月內合該陳乞之時照應在職年月依條別與施行庶幾慶賞均一旨揮明白無復偏私之弊與人不得而議所有錄黃臣未敢書行取進止

繳沈介不允詔劄子

五月十三日當日御筆荆襄上流為重兩帥願

多不叶雖軍務稍靜尚須調護且依已降旨揮施行

臣准中書門下省送到錄黃一道湖北京西制置使沈介奏為寒溼所中動作艱難心氣發動臨事繆忘

乞解職終喪奉聖旨不允令學士院降詔不得再有陳請令臣書行者右臣聞父母之喪三年不從政禮法當然孔子答子夏之問曰君子不奪人之喪亦不可奪喪也金革之事無避亦聖門之所不與頃以軍興起沈介於苦廬付以方面之寄介入國門而邊事漸已講解繼而信使交馳兵戍各已休息自都督府及招撫使之類皆已上印綬結局矣獨荆襄制司幕府如故一司官吏徒耗俸廩其所辟置又屢為臣寮封還況介之事親嘗絰清議今舉朝斷斷以介不終喪為非朝廷若欲成人之美不當以其稱病為文具

而過其請若更畱數月雖介有凱風寒泉之思無以伸其志使之重得罪於名教非所以愛惜人材也臣愚欲望聖慈許其解職終喪俾全人子之道則移孝爲忠可以責其異日之報所有錄黃臣未敢書行取進止

貼黃 臣前件所陳若蒙聖斷施行所有制置司

官吏卽乞依都督府例結局罷散伏取聖裁

繳薛良朋等賑濟賞劄子

五月二十四日與給事中王時升同

繳當日批出  
辭免依所乞

臣等准中書門下省送到錄黃一道薛良朋姜詵韓

彥古辭免賑濟進職轉官奉聖旨依旨揮不允令臣等書讀者右臣等聞仁宗朝富弼守青州河朔大水民流京東弼行賑濟之策所活人至五十餘萬近世荒政之修無以加此繼而遣使勞弼卽拜禮部侍郎而弼辭曰救災守臣職也卒不受今賑濟之術比之於弼固相萬萬陛下聖心焦勞非不切至然都城之外死亡之人亦不爲少流尸滿川眾目所覩城中之人至於不食魚蝦而三人者竝皆遷官進職眾論以爲未當夫建立百官所以爲民不幸而有災傷又因而冒賞則監司守令之職果安在耶今三人者自知



不安力具辭免若與從其所請則朝廷不失爲民行賞而良朋等亦得辭受之正況今所在災傷不止一處若三人受賞不辭而浙西諸郡守令及被差官吏夤緣覬覦殆且數十百人而未止當此天災而反行濫賞豈所謂修政事以答天變者哉臣等伏望聖慈特賜睿斷將良朋等辭免進職轉官竝依所乞施行所有錄黃臣等未敢書讀取進止

繳王彥宣借人劄子

五月二十五日  
次日御筆依奏

臣准中書門下省送到錄黃一道保平軍節度使提舉太平興國宮王彥乞破行宣借人五十名及乞更

破使臣五名奉聖旨依令臣書行者右臣竊聞王彥近罷建康管軍有自來親隨西兵三百人朝廷從其所請許存畱五十人餘者發回元來去處及發回之日有其數而無其人者凡百輩則其久握兵權詭請虛券殆不知其幾何人也今猶貪恠未已所乞宣借五十人及使臣五名已蒙聖慈依許臣取到吏兵部狀節度使任官觀合破宣借十五人因紹興三十二年旨揮已行減半及依例只許踏逐指使一名申朝廷差撥彥之專闔於江淮無尺寸功得以節鉞奉祠幸矣尙此苟得

難默默本人已有存畱親兵



五十人自當理爲宣借之數若聖恩從厚只合依條  
例占破難以過數陳乞所有錄黃臣未敢書行取進  
止

再繳韓彥古劄子

五月二十五日上六月一  
日以彥古自請與外任

臣等准中書門下省送到錄黃一道韓彥古辭免轉  
官依所乞者右臣等近爲城外飢民死者盈川羣目  
所視而官吏以賑濟有勞全活甚眾推賞嘗輒具管  
見特蒙聖慈曲賜開納朝廷已用逐人辭免依所乞  
臣等亦已置而不論其間有韓彥古申狀乃云伏念  
彥古至愚極陋之資非不知朝廷機務之煩聖恩不

可屢鬱特以冒詩人胡顏之刺寧甘以贖而羣言之  
難犯有甚批鱗況何功苦之足言需此寵章之驟至  
與其它日險膚之見詆孰若從容力祈之爲優且省  
也伏望朝廷蚤賜追寢庶幾小人毋得而議臣等觀  
其辭語險怪豈可陳於君父之前播之四方豈不傳  
以爲笑封繳之官乃輒指爲小人而謂公論爲險僞  
膚受之言若臣等以小人而妄議陛下不應聽從旣  
蒙施行而被繳之人乃無所忌憚公然見詆如此不  
惟桀驁不遜輕侮朝廷臣等不材備位後省實難以  
振職所有錄黃并彥古申狀隨狀繳奏伏望聖斷特

盤洲類編

卷四十八

八

賜施行

貼黃 臣等伏聞彥古昨除提舉官遭臣寮封繳  
自稱嘗論訴於朝廷臣等竊謂郎曹清班豈容此  
輩冒居伏乞聖察

繳馬監官轉官劄子六月七日

臣准中書門下省送到錄黃一道奉聖旨牧馬監可  
依累降旨揮推恩崔良輔特於遙郡上轉行一官李  
楷王貴劉彥趙昌蘇信曹繹並轉一官姜子興陳邦  
俊並補進武校尉人吏轉一官候出職日收使臣取  
到崔良輔脚色及紹興二十一年以後馬監推賞體

例照得本人紹興十七年初管馬監之時只係武翼  
郎二十年間因管幹有勞八次遷官一次用賞出給  
料錢歷自副使轉橫行又轉遙郡至于右武大夫觀  
察使今又該轉承宣使恩賞僥濫無甚于此臣近因  
奏對及軍中賞典仰見聖慮宏遠愛惜名器非有功  
者不與今不知馬監每兩年之內孳長若干而十餘  
人遷轉至有白身補官者如崔良輔數十年不徙職  
常法磨勘之外兩年一遷雖橫行遙郡唾手而得自  
以謂例當然也今隸籍軍門若非出戍用兵寄命鋒  
刃之下而有斬將搃旗之功者無緣有此醜賞況祖

宗成法在京官司因職任推賞之人若或再任則不重賞今馬監遷官雖是舊例蓋有司失於建明不曾有所樽節因循不革流弊至此臣愚欲乞裁以中道應馬監官如已三經推賞則後來賞典竝與減半欲望睿斷更賜處分如見允當卽乞立爲成法及其他官司賞典亦乞令大臣討論裁損其取到紹興二十一年以後旨揮錄連在前所有錄黃臣未敢書行取進止

盤洲文集卷第四十八

同日投

盤洲文集卷第四十九

章奏九

荆門軍奏便民五事狀

臣伏觀紹興三年二月二十八日手詔應諸路守臣到任及半年以上先具民間利病或邊防五事聞奏臣恭惟陛下勤恤民隱出於天性臣以駑獯叨乘障之寄仰體陛下愛民之心不敢以不可施行之事徒塞詔旨臣自到任訪之於民云荆襄頃爲盜區魚肉其民最甚擱殘之餘實與淮南無異今田畝旣已起稅而逐年又有均敷茶額錢所出甚於夏秋常賦致

使茶商執害民之柄而託吏爲姦不惟民力重困又緣此不敢歸業數十年間所以民未加益并官田以附種爲名而不稼納租麴引失立法之意而重疊出繼大禮代佗州之貢而多方取辦皆不便於民者臣雖到任未及半年緣茶事所不可緩臣謹條次下項

一臣所謂茶商執害民之柄而託吏爲姦者蓋江浙佗路俱有茶額而食焉者眾商人隨時賣價四民不以爲病惟創痍之地戶口耗減而~~凋~~傷困乏蓋不能頓頓食茶如荆門軍又緣異時官吏不以疲民爲念所圖溢額受賞

歲增加至於數多若奉行前後朝廷指揮令客人從便交易則定額必致虧減官吏當有責罰本軍昨來遂以人戶爲率計口均敷如家有一丁則歲受茶三斤其丁多及老小者以次增減至有一家買十三斤者行之將及十年豪商與猾吏通謀爲姦其弊不一今荆門兩縣之民其客戶往來不常外主戶纔及三千坊郭不滿五百家遞年趁茶四百六十引客人就官入納每茶一斤爲錢一百八十一文足就旁近土產處買下等麤茶雜以木

葉每斤不值百文卻逐年定價令民戶每斤還五百三十文足會計本軍歲額官得客人入納錢一萬七百貫有畸而民間償客乃費三萬一千七百貫凡客人齎引到縣指定所欲賣茶鄉分乞畱元引只以縣帖下鄉稱某客販到若干引令耆保差大小保長門到戶至應主客戶并計口均敷或猾吏暗增引數或豪商均茶已足計託牙駟妄稱人丁逃徙差互發賣未足乞改別鄉吏既受賂更不覈實又與分下別鄉或不即時批鑿元引致客

往來影帶私販或先以私茶憑牙駟欺民均賣續用縣帖再勒依數認買若爭拒不受客即委弃於地而去不惟疲民費錢重疊而遞年損折入納錢亦不爲少皆緣歲額過多不敷則無可辦商執其柄又以高價邀於官而求售在官者懼譴乃復黽勉曲從而滋蔓吏姦公私俱病臣比因草奏遂檢倚郭縣二十八年內都保承受縣帖均分茶數已足而繳到客引尙多虧數縣吏卻稱自均敷以來逐年遞趨以次年春夏季補充前一年之數蓋

酒稅場務日生課利容有前後釐補今既將  
丁口敷茶民間出錢已滿歲額而官引卻有  
虧失者蓋是承襲作弊如前所陳臣已究治  
縣吏勒令填補榜示見行條法及續寬恤指  
揮自今更不違法均敷但常額尙存則實惠  
難行若不控告朝廷剗革此弊則疲民困窮  
未能休息臣愚欲望聖慈憐念遠人許令荆  
門軍紹興二十九年只以客人從便實住賣  
到茶數立爲新額或乞以見今歲額特賜蠲  
減一半庶幾易於趁辦則害民之柄不在茶

商茶商不能確執高價自然從便交易是寬  
恤之澤實及千里一二年間必有增戶之效  
一臣所謂官田以附種爲名而不稼納租者其  
一曰營田其一曰學糧田所謂營田者前此  
邑官緣以營田結銜既上司督責卽指荒閑  
田土稱爲官莊初不遵依元降指揮修蓋屋  
宇置造農具召人耕作便行追集稅戶以物  
力多寡勒令認租謂之附種營田至兩年一  
替供糾本鄉未曾附種之戶輪次認納吏緣  
爲姦轉更教令糾抉善良每一戶替免至於

追逮五七戶紛拏推託賄賂公行源源不絕  
舉縣咸被其擾遇新至之戶或乍佃荒田或  
只請住基而見充附種之人已投狀指令承  
代故有犁鋤未到畎畝茅茨未庇風雨而營  
田官課已遭督責臣伏見前郊赦文放免都  
督府官莊蓋是朝廷已知其弊今荆門軍長  
林縣高陽兩莊當陽縣山口莊所名營田係  
安撫司專差官兵耕作卽是良田實收課利  
并長林縣車橋兩處亦有官兵營田當陽縣  
只有四戶開耕實田外其他兩縣營田共一

千七十七戶所納秋課自五斗有至於四十  
二石者共一千八百餘石又有夏料小麥在  
外竝是無田認納臣不佳據人戶訴稱所認  
課子逐年并是尉司弓手攬納每石有費錢  
三千者每戶各有小麥七升亦有費錢一千  
者卽是稅上起稅實爲重疊臣愚欲望聖慈  
行下將實有官田耕種去處依舊存畱外其  
虛名營田勒人戶附種白納課子之數竝乞  
除免

一臣所謂學糧田者蓋湖北兵戈之後沃壤彌



望人力不給凡請佃逃絕荒田官司初不打  
量畝步若人力有餘則逐歲四旁增墾其有  
沒官田產卽是酒戶抵當或公吏等人犯罪  
沒納者田旣籍沒則所種之客隨其地主又  
復佗去頃年再興學校郡縣奉承括到沒官  
田便名學糧初無耕夫遂勒本保人戶分畝  
認米謂之附種學糧皆是與本戶田土不相  
連接農人不便耕墾例皆荒閒不免依數填  
納租課臣稽考縣籍長林之安西鄉納學糧  
人一百二十三戶其一戶有田通計長林九

鄉納學糧者共二百二十三戶其有田者纔  
三十五戶臣今若受人戶之訴除其無田之  
租則學糧遂空無以養士若循舊不恤勒令  
認納則細民苦之無時而已緣本軍竝無承  
平案牘卽不見得舊管贍學錢糧之數兼竝  
無寺觀絕產可充贍學臣以愚見相度本軍  
長林縣歲催學糧沒官田米麥二百石有畸  
而兩縣歲催常平戶絕田米麥八百石有畸  
臣竊計本軍目今之數除累年秋夏未接閒  
出糶常平米接濟小民椿到錢一萬二千貫

有畸糴補未足外其見管米一萬一千石有  
畸義倉所儲又在外本軍人戶稀寡設有水  
旱所費賑濟之數不多每年老病乞匄之人  
亦甚少臣愚欲望聖慈許令本軍於長林縣  
戶絕田租內歲撥米麥各一百石以充學糧  
其附種之數竝賜除免自後沒官田如人戶  
願耕卽以其所佃隸之常平二者旣行則聖  
澤布于阡陌遂見頌聲竝作無田里愁歎之  
心矣

一臣所謂麴引失立法之意而重疊出糴者在  
法諸鄉村去州縣二十里外有吉凶聚會聽  
人戶納錢買引於隣近酒戶寄造上戶納錢  
三貫造酒十石中戶則二貫造七石下戶則  
一貫造三石以其錢作朝廷封樁臣竊詳法  
意蓋謂民間有聚會之事親朋往來使之納  
錢買引則多得酒醴公私有補而行法之久  
竝緣爲害凡逐縣就州軍請引至人戶投買  
之時縣吏視其物力多寡抑勒出錢致有十  
餘千者旣已得引酒戶又復視其貧富勒令  
出錢亦有至十餘千者初未嘗得酒中下戶

緣無力出錢買引遂有過期不成昏姻者其縣邑解發之錢未必一一皆到州郡封椿上下相蒙剝割生弊臣雖已禁約屬縣不得違法過數收錢及不得酒戶抑勒民戶多出錢物外但賣引尙存則縣邑作弊難以一一饑察臣聞越勾踐欲其民之繁息令女子年十七不嫁者罪其父母今彫郡正欲生齒日增乃因趨引而使失婚姻之時實害聖政臣愚欲望聖慈咨詢大臣講求所以革弊之策或可刪除此法實天下幸甚

一臣所謂大禮代佗州之貢而多方取辦者臣聞周之臣工助祭漢之列侯酎金各以其邦大小任土作貢今湖外案牘不存遇大禮年分卻合荆門軍代靖州進貢大禮銀二百兩絹二百匹又代峽州貢絹三百匹每匹折錢五貫文只於峽州得絹本錢二百八十五貫而本軍自有進貢銀絹各二百匹兩既小壘財賦不足如大禮年分不免東移西兌非民何所從出官府既無前牘可考若謂自承平以來二州之貢並是荆門代納則向來川廣

湖湘入京皆取道荆門軍馬項背相望實爲富庶之地今則僻在一隅去水幾二百里非商旅所集蕞爾遺黎強名城郭臣今不敢竝乞減免若以靖州雜於溪峒賦入稀少之時則本軍且乞爲靖州依舊代納如峽州則有四縣已多於荆門一倍又川江舟楫之湊商稅所入非荆門比臣愚欲望聖慈許令荆門免納峽州貢物庶幾不使一壘而供三州之賦

荆門應詔奏寬恤四事狀

臣伏觀紹興二十八年九月一日聖旨令郡守奉行寬恤指揮如有未盡事件條具聞奏臣到任未及三月民之弊害未能盡知仰體陛下焦勞仁民之心夙夜黽勉凡所以惠綏癯瘵瑣細必行不敢逐一塵瀆天聽其大者四事每歲公私取於民幾三四千緡臣雖各已蠲免若非朝廷禁止恐向後又復檢尋前例兼恐佗郡亦有此弊欲望聖慈特賜行下如有違戾許民戶越訴庶幾斯民永被德澤臣先次畫一開具須至奏聞者

一臣本軍每歲人戶秋苗有正稅米又有油麻

豆粟雜色亦是折米近年受納官吏生弊將正稅米與雜折米各作一鈔官倉則利於兩鈔畸零多收合耗而專斗則利於逐鈔各殊糜費使用等錢上下侵漁比之舊年每歲多取人戶一二千貫臣已將紹興二十八年所納米每戶並作一鈔只是畫件聲說名色及裁減使用錢三分之一訖欲望聖慈特降指揮禁止以爲永久之利

一臣本軍酒務及公使庫舊例遇正旦寒食冬至各印關子付居民令戶戶納錢赴官沽酒

自一百至一貫軍城數百家每一節出錢二百貫只是畧得些小惡酒雖一家百金疑若甚微蓋闕郡難得錢物細民所居茅屋日出一間賃錢纔十二文而遇節頓出百金比屋爲病臣自紹興二十八年冬至以來已行蠲免訖欲望聖慈特降指揮禁止以爲永久之利

一臣本軍有獨石潭在江漢之旁產魚甚多舊以魚利添助支費昨緣改作放生池而本軍卻將江潭下流強立地名謂之車湘灘上下

堤楊子灘青木場每戶雖不施網罟至冬月  
令縣尉追集沿江人戶將已前魚利之數均  
勒認納每歲得錢二百餘貫入公儲庫臣已  
將紹興二十八年合收錢並行減免訖欲望  
聖慈特降指揮禁止以爲永久之利

一臣管下當陽縣每歲遇人戶納夏秋二稅並  
令先納嘗酒錢以家業多少爲率自五百至  
三千雖賃地僑寄之戶亦令地主抱認凡一  
年兩次出鑑幾及二千貫臣已榜示自紹興  
二十九年革絕訖欲望聖慈特降指揮禁止

以爲永久之利

盤洲文集卷第四十九

同日子刻校完

上堂三行

盤洲文集卷第五十

章奏十

謝宣示御書臨帖狀

為大人作

伏蒙聖恩差中使宣示臣御書臨帖者宸翰昭回儼  
 龍蛇之飛動使輶臨示驚奎壁之光輝拭目知榮撫  
 躬有幸恭惟皇帝陛下體兼眾妙聖本多能天下無  
 雙信義之之北面帝中第一邁齊祖之前聞何取微  
 臣獲窺睿藻已陋登牀之舉詎知肆筆之方忭蹈惟  
 深鋪張莫究

徽州除浙西提舉赴闕奏方庚狀



右臣前因陛對嘗以幫源洞豪方庚奏陳猥蒙聖慈  
開納面得天語令便與大臣理會臣卽日至樞府納  
劄子陳述曲折又以劄子薦其武勇可爲土豪繼聞  
宰執奏事聖訓再三以臣管見爲可採仰見聖慮深  
遠又以前車爲戒臣竊恐朝廷尙未施行臣疎遠無  
識知恐愚者一得之慮或有小補不避犯分之罪敢  
復言之臣聞幫源四邊俱山險其中坦夷有田可耕  
居者甚眾方庚實爲之桀聚族皆憚服之所欠朝廷  
一眞命爲重紹興二十四年李流知徽州日方庚以  
歲旱率其黨五十餘人至郡借糧本郡疑其爲後患

守臣接之廳事館之僧寺置酒郡圃以兵官主席又  
於教場閱習禁軍馳射令方庚觀之守臣囑其控制  
盜賊方庚欣然承命且云萬一本州要使喚之時只  
得一白帖權攝巡尉便當詣前其人黑而長徽人謂  
之方庚三面稱之爲保義眾皆能言非臣敢爲虛語  
前年嚴州草竊聞守臣亦嘗令攝威平寨官實欲羈  
縻之以此見得方庚志在官爵臣雖不得其聚兵實  
數傳者謂已有銀槍壹萬而三衙通卒頗亦亡命其  
閒亦有弓矢轉相教習若天時無水旱內外無甲兵  
則此豈足寘慮萬一疆場有驚其黨近在畿甸之內

恐小有跳梁便相牽制爲肘腋之害貽宵旰之憂臣  
謂軍興之際右列一命固不深繫名器之重若朝廷  
呼之觀其人物語言果有可用處以密院一使臣名  
目小人易於感恩便可得其死力卽是狙詐作使之  
術縱使萬槍皆出虛傳只得一方庚如土豪用之且  
令招集民兵使其果有徒黨便可化爲王師隨其多  
少皆是得用於朝廷有利而無害臣已別具奏薦之  
乞賜行出伏望聖慈更畱宸慮冒犯天威臣無任味  
死

乞進賀誅虜酋表奏狀

右臣狂瞽妄發不避斧鉞之誅上千天聽臣伏讀御  
製元顏亮貌面贊有皇天降罰屢遷必敗之句於以  
見淵鑒垂光默契睿藻果騰吉語天下同慶臣竊見  
先朝如鬼章夔離不之誅皆許中外上表稱賀今元  
顏亮傾國入寇狂言指斥其志不小宸斷赫然與天  
同符遣將出師動中機會社稷有靈元凶折首臣竊  
謂國家大慶莫此爲比臣螻蟻愚見宜陳百官之班  
受四方之賀使遠邇播傳匝地呼舞奏告天地宗廟  
則神靈悅豫益降祉福然後光復舊京以示鑿迴之  
期推校千古無以比擬臣才短思澁不能著爲雅頌

以繼平淮磨崖之作謹撰表文一函拜手投進尙慮  
朝廷未有旨揮無因仰塵乙夜之覽伏望聖慈許賜  
進入干冒天威臣無任

條陳恢復事宜奏狀

正月四日准知樞密院行府劄子三省樞密院關樞  
密行府及楊存中等十二月一日黃旗奏報已殺虜  
酋元顏亮訖十二月四日三省樞密院同奉聖旨令  
樞密行府行下沿江諸大帥監司帥守各條陳目今  
進討恢復事宜合如何施行具已見利害疾速聞奏  
送樞密行府劄付提刑司遵依所降聖旨指揮火急

條陳聞奏臣竊謂元顏亮傾國入寇蹂躪兩淮陸戰  
未嘗敗北其鋒初未易當天相社稷使之屠戮虜驚  
鳥散侵地復歸箠食壺漿遺黎延頸恢復之期真一  
機會但我師疲勞淮甸瘡痍糧食未豐民力彫瘵若  
乘時渡淮前逢堅敵恐無後援或彼賊清野則饋餉  
不接卻致上勤宵旰之慮今逆虜旣殞大定僭號未  
必諸國服從若能仰順天時遣使歸疆則王師不血  
刃而得土宇實天下之幸萬一虜眾尙強自淮以北  
別無爭立之人則臣謂且宜多遣有膽力人密傳詔  
檄使中原義士各取州縣因以畀之王師但畱屯淮

泗募兵積粟以爲聲援不必輕涉其地以務力爭俟  
蜀漢山東之兵數道俱集見可而進遲以歲月必有  
機會可乘則恢復故地何啻破竹庶幾兵力不頓可  
以萬全謹錄奏聞

繳進太祖皇帝御書奏狀

右臣仰惟陛下天縱聖德同符藝祖留意軍政信賞  
必罰沈幾獨斷與天爲謀頃年先臣以使事入繫異  
域訪求於鄜市之間換易於酋渠之家前後所積凡  
得乾德開寶中御府編次太祖皇帝御筆數十卷其  
間有及軍政者雖數百之鏹五斗之粟一匹之縑亦

勞宸衷爲之節減至於遷補軍職招接降寨賜予衣  
襖下至油麴柴炭之屬區處塗竄委曲纖悉所以規  
摹宏遠成無疆之業傳授至於聖神二百載而中天  
仰繩祖武重規再造臣昨日因宣召入對已嘗奏陳  
面奉玉音許令進入但以表飾損舊臣不敢輒易亦  
欲見前此御府不爲華飾務從簡樸如此今奎畫龍  
文復歸天上以備乙覽以助聖政蓋先臣寶藏之志  
也所有太祖皇帝御筆六卷謹隨狀繳進伏候敕旨

水災應詔奏狀

臣今月一日准尙書省劄子七月三十日三省同

奉聖旨政事不修災異數見江浙水滂有害秋成  
朕自八月一日避殿減膳思所以應天之實可令  
侍從臺諫卿監郎官館職疏陳闕失及當今急務  
毋有所隱劄送臣者

右臣聞災變之發率多緣類而起漢儒一一牽合則  
有附會不經之失然理之當者亦不可因噎廢食而  
曲爲之說臣謹案漢書五行傳云陰氣勝故其罰常  
雨水傷百穀姦軌竝作魯莊公十一年秋大水董仲  
舒以爲魯宋比年爲乘邛郢之戰百姓愁怨陰氣盛  
故二國俱水厥後水災皆歸之災興民怨所致國家

自數載以來兵民死于戎事肝腦塗地者不鮮父母  
妻子啼號之聲未絕也陛下有兼愛南北之心而獷  
狡變詐干戈未可得而戢今水不潤下江湖逆溢田  
疇溝澮與河渠連而爲一已秀之禾不得而穫下民  
咨咨未有生意官無積臧安得人人而飽之霖潦彌  
月勢猶未已陰氣可謂盛矣陛下畏天愛民至誠惻  
怛明詔廷臣使之盡言堯舜之用心也臣愚以爲陰  
勝陽之沴夷狄闖於外姦宄蟄於內也今外之所以  
待夷狄者朝廷有潛算小臣不敢輕議而區區愚慮  
竊恐季孫之憂不在顓臾臣入對之始及輪進故事

皆以歸正人爲憂繼因晚召亦嘗奏陳仰勤天問矣  
數旬以來漸已萌芽臣幸因奉詔敢復詳言向之爲  
美談者皆曰中原遺黎望王師之來則簞食壺漿願  
削左衽所以襁負而至又其思慕聖德之切者臣在  
江淮之間二年所聞殊異於是蓋山東仍年旱蝗耕  
者無所得食故扶老攜幼南來偷生又聞趙王世隆  
之徒聚眾攻剽彼國指名蹤捕亦以荒歲故牽連親  
戚相率來歸其意蓋欲王師恢復因得乘勢橫行逞  
其所欲上可以得官爵次可以得金帛子女不失歸  
其故鄉既來之後大失素望更相歎恨而將帥所部

又役使詈辱無以得其驩心去夏賈和仲以督府之  
令驅其孥累數萬口冒暑而來絕海遇風已葬魚腹  
而婦人老穉數百同舟蒸鬱相搏疾病枕藉死者不  
暇瘞埋既抵所屯雖計口給粟不能充飢愁怨之氣  
上干陰陽之和實在於此初到京口則掘山中草根  
以代蔬茹數月之後三五成羣掇拾棄菜敗蘆于市  
塵之間其計無聊何以久處此臣目擊耳聞者如此  
其人之在山東皆有室廬南畝生生之具自若也今  
婦子數口雜于方丈之舍上雨旁風無以蔽障甚者  
寢處於泥淖之中以它人視之不可一朝居也雖使



禽鳥豈不思歸欲歸無計則姦軌之謀不得已而作今日誅甲明日誅乙必草芟獸獮然後已況邇來北方已有招納之榜又有訛誘之人其黨聚於江浙兩城散於淮甸諸郡去帝城不遠亦復有之一呼相應特未艾也或曰叛者已治是大不然譬之急湍奔流勢必赴壑於其中閒築土以拒之終於衝軼橫潰而止耳臣之管見以謂其人赳赳可用大勝江浙所募若使人給家足無飢寒匱乏之患樂補軍籍之缺誠爲大利若其懷土不忘則宜優其歸費送以舟楫使之踰淮而去則可以窒患於未萌施恩於不報怨氣

可弭天災可消或曰縱之使去不若遷之別壤以離其黨是又不然此輩捐生業棄墳墓遠來歸我亦招誘者誤之今遷之別壤居上者雖有仁民之心官又無以贍之客居窮處速其死爾是無罪而殺之也可不念哉當今陰盛之患在外者猶可隨機而應在內者莫急於此蓋浙西非盜賊窟穴雖流徙困殍必無弄兵之事臣私憂過計伏望聖鑒曲賜揀擇而區處之至於譏切時政毛舉小事言而難行徒以沽名賣直則臣所不敢冒犯天威臣不勝戰汗

辭免中書舍人奏狀



今月二十五日准尙書省劄子三省同奉聖旨除臣中書舍人日下供職者臣聞命震驚罔知所措竊以班登禁密選貴西垣不獨掌行制書蓋亦與聞時政惟嫩才不至固陋庶繼溫純之詞必特操無所阿私乃振糾駁之職如臣者駑材何算鼠技易窮遇聰明睿智之君莫伸管見攝禮樂文章之事祇懼素餐屢叨稱獎之榮常賜清閒之燕坐文茵於帝所豈羨金蓮來捷步於日邊特盼珍茗比因宣召面諭恩除甫爾半旬有茲異渥遭逢若此報稱謂何自知短絆之不可汲深或謂積薪而後來居上滿盈不戒顛越可

憂伏望皇帝陛下俯矜螻蟻之誠曲寢絲綸之命俾安愚分得允僉言所有恩命臣未敢祇受謹錄奏聞伏候敕旨

舉自代奏狀

准令節文諸侍從官授訖三日內舉官一員自代者右臣伏觀左宣教郎太常博士兼權吏部郎官何稱種學績文蜚聲俊域使之掌制必有可觀臣實不如舉以自代謹錄奏聞伏候敕旨

辭免奉使轉官奏狀

右臣今月十五日准尙書省劄子三省樞密院同奉

聖旨洪某與轉行一官臣聞命震懼不知所措伏念臣備數從班常虞尸素方鄰國修好初講慶儀猥蒙選擇予節以行萬里往來曾無補報錫賜之物已慚虛受又叨進秩深所不安凡人臣事君東西南北唯命是從況兵鋒既息道路無壅不應以奔走微勞便受賞典伏望聖慈追寢誤恩使免譏議冒犯天威臣無任

辭免除翰林學士奏狀

今月二十二日准尚書省劄子三省同奉聖旨洪某可除翰林學士兼中書舍人日下供職臣聞命震驚

罔知所措竊以北門典誥所出西掖命令所行秩清地密必得其人然後可以處如臣者學問淺陋議論闕疎掌制踰年已試無取糾駁之職常恐曠瘝近者陛對伏蒙天語諭以翰長之除而又嘉其論事許令批敕臣誤辱眷知方切悚懼敢期成命遂叨超拜內自循省代匱之久初乏寸長仍兼故官則怨隙日增必致顛踣伏望皇帝陛下興憐驚蹇曲賜保全特寢異恩俾逃何譴

舉自代奏狀

今月一日准告授前件職准令節文諸侍從官授訖

盤洲文集 卷五十一  
三日内舉官一員自代者臣伏覩左文林郎主管尙書戶部架閣文字施元之學問該洽文采清新使居英俊之躔可備翰墨之選舉以爲代實允公言

接上文

盤洲文集卷第五十一 同日刻後

盤洲文集卷第五十一

申省狀二

書五

荆門軍論茶事狀

某近已條奏煮茶之弊而私憂過計又恐勘當不許以今年從便住賣之數立爲新額只申嚴法禁行下則使斯民不霑寬恤之實惠必不得已權時之宜不致虧失經費又不重困民力使官民兼濟則某有愚見伏望鈞慈赦其狂瞽之罪某本軍見排造戶籍再三與民戶較量謂朝廷以寬恤爲政若以利害申明必降指揮不許違法均敷但恐客人遽失高價故意

盤洲文集

卷五十一 申省狀

十一

邊絕不來致令本軍虧折歲額欲行申請乞給降茶引本軍自行勸誘上等稅戶依客人入納官錢之數就軍買引自往鄰近土產處收買堪好真茶以實價分均食用咸謂若得如此施行民戶自往買茶免得虛費高價亦爲民利某之狂愚欲望鈞慈特賜減損荆門軍歲額以其數每年徑就提舉司請引至本軍從長招誘客人或民戶算請只依元引收頭子錢外更不別收勘合等錢俟至歲終本軍以其錢買銀赴提舉司或鄂州總領司交納則於兩縣之民買引得茶之外每歲實減錢一萬五千餘貫此其爲利不鮮

如蒙從某所請乞自紹興二十九年爲始俟指揮到日若春季已批發過客人鈔引乞許理作今年之數仍乞下提舉司於鈔引上朱批係是荆門軍算請之引只得前來本軍住賣以免侵紊他州歲額兼乞下提舉司告示產茶去處除本軍朱批鈔引之外卻不許別用客人他引批指前來本軍以免攙奪給降引數於法鈔引許畱民間九年今既本軍人戶自行買引卻恐當年未必便能一一買茶欲乞本軍每年只是趁納給到引價錢其住賣倒引乞隨逐年多少申繳庶使公私兩便如是向去戶口繁盛比及承平商

旅通行見得從便可以趁額則乞許以後守臣申明朝廷自依常法更不逐年給降又緣荆門小壘難得銀子尋常貢賦多是擔錢至荆南府買銀今每年至提舉司請引及管押人納銀有沿路腳乘等費若不立下些小糜費恐官司別無所出巧作名目因緣多取於民某面問民戶欲令每斤增收五文省作糜費使用皆稱情願出倘若於外官吏別行增添收取竝乞計贓坐罪

復解額申省狀

本軍據軍學進士張禮等一百二十九人陳狀稱本

軍舊解額五人靖康元年范如圭任彥直高敷田幡然扈夔同年發解范如圭見任利路提刑程彥直見任恭州監稅頃因劇盜以荆門爲巢穴軍治鞠爲荆棘人民死徙略盡至紹興五年收復方以武臣作守驅除虎狼鳩合遺萌始有人煙至紹興七年省部會問靖康元年終場人數紐取立額其時本軍士人逃散未歸知軍胡修武不以儒生爲意只就軍城據流寓陳天將供稱靖康年有二百二十人終場其年就江陵附試遂以四十四人解發一人續後本軍士人漸歸卻見解額人數異同遂發紹興二十一年經轉

運司及本軍陳訴稱在承平時本軍初未曾及二百人終場之數蒙追問陳天將供稱係是應天府流寓人當來實不曾就荆門取應靖康年科場蓋是一時公吏且欲回報上司令天將妄亂供報所有本軍士人除建炎紹興之初兩次無人取應外紹興七年江陵府附試終場七人解發一名至紹興二十六年終場四十六人亦只解發一名今來士子蒙朝廷養育作成垂三十年已及承平人數緣本軍去江陵一百八十里貧者乏於裹糧而幼者父母不容遠去遂使每次不能盡往黜試致見人數不增只以一人備數

乞行申明復額某遂取責到本軍紹興二十六年鄉飲酒除患疾不赴人外有八十八人成禮并見今係籍學生共一百六人并會問到鄰近州府體例江陵府以省記到靖康元年數係十人七分取一人紹興七年終場五十二人解發三人紹興十七年終場一百六十六人解發十一人已復舊額峽州靖康元年係八人取一人紹興七年終場二十人解發三人紹興十四年終場七十三人解發五人已復舊額歸州靖康元年係七人五分取一人紹興四年終場二十人解發三人紹興十年終場二十九人解發四人已



復舊額復州靖康元年係十二人取一人紹興十年終場五人解發一人紹興二十六年終場三十人解發三人某檢照本軍公案有紹興二十一年內取責到靖康元年發解人高敷主簿供稱當年終場係是六十五人并見存鄉貢進士丁庭瑞亦係靖康取應之人所供符同其陳天將供狀妄報文狀具在可考某切聞胡文定父子俱在荆門寄居故朱內翰之類遠來就學如朱內翰胡侍郎皆是荆門預薦登科所以荆門士人師授頗有淵源今既解額頓窄又附試他郡憚遠不能盡行致令薦送數損無以激勸有阻

遠方士人進修之意某又伏觀紹興重修薦舉彙備載紹興四年指揮緣淮南兩路無靖康元年終場之數只比附泰州之數權立諸州解額每十三人解一人今湖北諸郡竝是十五人以下解發一名不應荆門獨以四十餘人爲額顯是多寡不均如江陵府只是憑據人吏省記立額本軍見存靖康發解取應之人可驗不誣已將會到諸州府解發人數錄白申納禮部准備取索照會訖謹具申尙書省伏望鈞慈憐念遠方士人乞將紹興二十九年科場比附本路鄰近州軍體例別賜詳酌改立解額行下



代上宰相書

某鹿鹿么麀至愚極陋踪跡草芥顧不足進陳于帝師大丞相之前僥覲觀采之萬一然伏自思念在熙豐時曾門躋身綸闈勸講帝幄在政和時大門籠宇內之財爲天子侍臣不肖之孫墮其家聲無可云者而天借之幸名絳官牒猥受化工之賜漕臺鍾官游居部使者之屬雖翹材大館所以羅致英雋而蕞爾姓名得躋拔士之錄亦十有七年某也佩山嶽之施懷杪忽之報刻肌鏤骨矢心自誓亦不敢輒處眾人之後退惟陽春播物孳者解者無不蒙被寵光吐葩

颺榮動搖和風拱把之本根至於能蔭牛馬柔條弱蔓亦能上凌青霄發生之功何能遠數士於斯時託身鑪錘朝泥塗而暮雲漢造化之力與春等耳今欲軋滯思飾瑣說孑憔悴可憐之情顧小已區區之私夫何足以仰瀆威尊竊念窮而呼天理所必致捨恩門而不進一辭則鼠肝蟲臂何所自託耶重念某夤緣世及饜竊祿仕雖表治之緒不敢廢而材智駑下不能見穎濫巾王官庇身大邑罷精耗神日懼奉職抹過不給蓬徒塵走幸終瓜戍得遣萬坐之罪而孳累猥眾退無負郭上腴可以耘耔代祿仰首搖尾希

筆端膏澤庶幾復尋故步少逃州縣之勞以免溝壑之填仰惟某官天命隆棟爲時宗臣衅甲歸馬泰山四維功業卓偉固已鏤景鐘書金匱非某趨起所能鋪張梗概厥今太平無象物物遂性動植飛潛鼓舞覆燾之間遐邇耄穉共壤而擊豈門牆賤士不能澤吻一鳴自求斗升之水是敢犯嚴肆言以累埏埴冒觸等威某下情不勝戰灼待命之至

代上前執政書

某仰惟聖天子奮乾剛旋太阿尺一招賢慨乎如不及并謀兼智以濟登解紘上治自台鼎侍橐諫官御

史臺郎儒館無有大小楹然一新鴻儀鷺序皆乙亥前幹棄沈淪之耆傑外而价藩近鎮亦暫屈舊老敷和蘇枯剗磔淄泚然後入都卿相之位恭惟某官以碩德垂典刑以昌謨翼帷幄簡于細旃燧于汗簡舊矣蠅營醜正積年居東天日清明人人簷冀霖雨寄足方面實儲巖石之望宜告舍人趣治相國裝行卽召矣某才品凡下無尺寸瘵人低徊塵壒星終其二視王公大人如參辰麗天可望而不可親又安有覲顏色之溫侍警欬之重者乎竊謂閣下鄉者西府遂持國秉則陽春膏澤可以窮垓匝宇而槐府潭潭某

也雖欲下望塵之拜所不可得是閣下昔者之用乃天下之幸某之不幸也訪蘇耽之仙跡上義帝之故城而某適得與遐萌小吏企末光而承餘澤是閣下昔者之未用乃某之幸天下之不幸也今茲綸札鼎來使貂之袂相屬歸輔九五雍容槐楓之上退而謀國門牆尊嚴雖欲介郴陽之既見復邇泰階戛戛乎其難哉僥幸閣下撫封江右卓馬小駐某餽口番城距高牙一衣帶水幸之再來天也捨此時不干館人望履幕非鄙則病是敢促櫓絕湖越起輿阜下陳以覬鉅公一眄之榮若夫穆天緯經國體措天下泰山

之安則其規模已素定閣下之胸府某一介愚瞽無以效渤海議曹之獻至於白涸轍之狀鳴負丞之賤又不敢墨筆操牘諛諛以溷稜威伏惟閣下貫其罪而與其進焉干犯鈞嚴某下情不勝戰懼之至

與朱舍人書

某比獲撰屢辱賜南遷詩一編一百有四首自曲江過曹溪抵東衡州凡三日垂二百里右手執帙左手持轡目注心存哦誦乎齒吻不知林巒之所歷嬰哢之度耳也昔屈大夫受讒於楚長吟澤畔離騷章句上追詩雅然桀紂羿澆等事反復致詳雲霓惡草之

諷尤夥後之廢放者其寫悲寓懷之語必含怨刺雖韓退之爲時宗師柳子厚文映古今猶有雙鳥訓狐之詩宥蝮螭之文中書丈人以贍學偉辭爲甘泉望臣良筆媿遷董大冊落常揚遠徙曲江八變寒暑他人必憂懟亡聊日夜企而望歸我公乃買園葺亭培雍自適一編之詩皆與諸郎快婿邦人之可語者投壺圍碁登臨所賦語工而意和格高而辭樂無鬱鬱不平之氣芽於中而發於外也其賢於人如是夫豈久畱此者耶某不肖不能窺見彷彿姑以所歎授圉人持歸以獻

三省與虜帥僕散忠義書

王朴來歸伏奉緘誨反復曲折備見勤誠玩味再三不勝欣荷伏惟元帥丞相爲社稷之重臣兼將相之大任明良胥會言聽計行生靈休戚係乎轉盼皇帝仰奉兩宮俯憐赤子感大國尋盟之意捐棄細故務在曲從誓書悉如來戒信使亦令啟行歲輸銀絹見已計置起發商州舊疆更不靳吝但以茲夏先歸四郡繼有渡淮之役今俟使命回程寢兵休士便行交割係虜之人卽令有司刷會續當實告以遵嚴約無事繁辭歲律將周神明陰相躋民仁壽同享升平垂

譽無窮天下幸甚

三省與虜帥紇石列志寧書

比布訊緘遂勤誨牘風埃匱薄審閩制之賢勞神明  
扶持喜天休之滋至念二儀以好生爲德蓋百戰者  
不祥之兵修此齊盟出於初議中因曲見或爲矛盾  
之言致此數年未講衣裳之會茲聆嘉報不替舊歡  
仰衛社之大忠感睦鄰之高誼已遵要束無復異同  
雖遠方有雙鯉之書豈殫情素使兩國若一家之子  
永戢仁私瞻邇惟深敷云曷罄

盤洲文集卷第五十一 同日校

盤洲文集卷第五十二

啟十三首

謝試中詞學啟

追攀逸駕駑駘方困於奔馳推擇遺材瓦礫幸逃於  
沙汰旣擢桂枝之秀更聯棣萼之華人以爲榮已獨  
甚媿嘗謂昔人之學實期大道之明遠紹旁搜究聖  
哲行藏之蘊博聞強識達古今治亂之原未嘗汲汲  
於功名寧復區區於文藝迨後世設章程而取士故  
諸儒追時好以謀身 奧義以秦蕪旣潢潦根源之  
失窺陳編而漁獵皆馥膏沾丐之餘故窮經淹貫者

或拙於文而摘藻道麗者又短於學舉由一律疇克兩全愚賈操金遂見譏於書篋輕縑窘幅終莫擅於詞宗分轡並驅濫觴滋久惟昭代廣搜賢之路有詞科籠拔萃之才爲異時翰墨之儲極一旦搢紳之盛是必撐腸拄腹該九邱八索之遺言出脇穿心騁三都二京之殊軌夫能偶古作者茲可爲時聞人如某者愚鈍亡長迂疎甚陋材旣同於樗散性實肖於棗昏自家君有去國之行故幼歲失趨庭之訓瞻雲在望思學治之相傳歷日彌長懼析薪之弗繼雜綺襦而篋迹對縫掖以汗顏期自致於青霄遂力親於黃

卷然舌耕莫之有得而腹橐終亦無奇窺豹一斑可笑管中之淺見食雞千跔漫尋紙上之空言雖非倚門牆而誦韓莊之書抑亦處畎畝而樂堯舜之道落花點綴聊以自娛雌霓連蜷伊誰見賞悵榮名而尙邈慮素志之終違旣不能脫一行吏籍之勞將何以慰萬里親庭之望決科孔易徒枉事於雕蟲作文不成殆何心於刻鵲遂捐舊業遽習殊科楊雄寧免於客嘲班固屢酬於賓戲甫臨勅敵輒廁俊游戴縵垂纓于于焉而來矣抽毫進牘戛戛乎其難哉搜石室之舊聞擬玉堂之不律成功日頌慚周什之清風作



器能銘媿郢歌之白雪記序不工於述事表章復拙  
於陳情方虞鼠技之已窮豈意雁行之並列獲紹滿  
籛之業遂逃飲墨之羞驟撥虛名敢自希於雙璧尙  
遺季弟終有慝於三珠顧此叨逾由夫幸會茲蓋伏  
遇相公中興名相間出真儒國勢旣尊增大呂九鼎  
之重台躔有爛應泰階六符之光雖伊呂之佐無以  
加彼蕭曹之勛不足進當君子長育之盛世推大臣  
教載之仁心遂敷冥頑亦蒙甄採某敢不磨礪事業  
砥礪廉隅刻意讀書願入崔公之室銘肌報德敢荒  
陸氏之莊 知舉直院給事受天英氣名世真儒追

渾噩以還醇極內相代言之美竭忠嘉而論事振東  
臺批救之風懷推轂之仁心典揚衡之公選吞雲夢  
者八九旣已包荒取武成之二三未嘗求備幸託粉  
榆之好漫成桃李之陰曾是冥頑亦蒙甄採 參政  
明堂梁棟清廟鼎彝遭聖主而上下交欣沛巨魚之  
縱壑有忠臣而姦邪不起凜猛虎之在山偉然百世  
之師卓爾萬夫之望當長育之盛世推教載之仁心  
遂致冥頑亦蒙甄採某敢不磨礪事業砥礪廉隅傾  
液漱芳庶足三冬之用騁妍抽祕或推一日之長誓  
殫犬馬之誠少效珠環之報 樞密明堂梁棟清廟



鼎彝偉然百世之師卓爾萬夫之望發謀右府賴曲  
逆之腹心將命遐方得月支之要領每極招求之道  
曲懷推挽之心下同前

謝敕局進書改官啟

丁年諾仕瞻上相之後塵甲令奏篇玷中都之顯秩  
脫選調七階之冗綴朝班八品之華受賞非常歸恩  
有自切以策名委贄期風穴之高翔躡級限年覺天  
梯之難上反故紙而沈迷州縣之職懷漫刺則趨起  
公卿之門然而玩歲居閑吏掾鮮周於六考起家寡  
援薦書莫望於五章錄錄亡奇滔滔皆是書局素稱

於捷徑士林咸指爲清蹊雖曰便今著爲律而疏爲  
令不妨稽古誦其詩而讀其書至積久以成文復叨  
榮而更選欲重條章之出遂無資格之拘如某者襪  
線何長囊錐非穎假蔭始慚於高士立身期企於醇  
儒久勤陟岵之思常佩過庭之訓斗南與對惟黃卷  
之聖賢江左相傳有青箱之家世偶殫薄技輒中異  
科幸結綬而登王畿免抗容而走俗狀備員公掾接  
武英游溢甫刑則除之初無鉤校之善取秦法之宜  
者莫知據摭之因逮三尺之克終誠萬分之何補絲  
綸錫命旣仰拜於楓庭紳笏生輝若重登於桂籍茲

蓋伏遇某官謀深挈國術妙取人王室中興雖一木獨成於大廈泰階相比欲眾星同拱於北辰方參朮芝桂以自資故管蒯絲麻而無弃遂令弱植亦預優恩某敢不益厲遠圖更堅特操狗馬自度莫知酬報之方桃李不言盡託生成之賜

謝除祕書省正字啟

約法三章初乏刊修之善聚書四部遽叨是正之除仰拜恩私內深感懼切以乘槎問漢瞻東壁之文星結綬登畿列西崑之仙籍是稱美職以待勝流蓋將爲選用之階故聊試校讐之事惟圖書之錯亂從古

以然而籤牘之散亡於今尤甚幸昌代求遺之既廣致積年著錄以寢全多魯論之二篇類皆紛糅脫酒誥之一簡詎免斷殘豕亥相傳銀根未定克稱厥任亦難其人如某者識智卑凡材資么膺伏周孔之軌躅雖欲自強漸游夏之淵源其如弗及每省鼠窮之技敢逃狗曲之嗤迺刻楮以偶成致吹竽而濫中脫州縣一行之吏裁國家三尺之文奏篇方冒於殊恩出綍復躋於華貫才非七步已無子墨之可稱學媿五車政恐雌黃之妄下遂竊登瀛之美更增入洛之榮接武英躔偶棣華之同列覃思藝圃庶藜杖之分

盤洲文集 卷五十二 五  
光自揆僥逾率歸推擇茲蓋伏遇某官經邦道備致  
主勩高巨艦濟川獨任維持之重大鈞播物曲全造  
化之工若富家兼積於腴腴故匠氏不遺於椳闐致  
茲瑣質得筵清途某敢不克己自修銘心圖報朝廷  
既正固無劉晏之憂書策在前遂畢李邕之願

台州通判回謝少卿啟

庀職鉛黃但索東方之米叨榮銀艾來題仲舉之輿  
敢借蔭於卿雲庶免愆於宦海恭惟某官材高百鷲  
名擅一夔博物洽聞學周公仲尼之道同工異曲有  
相如楊雄之風蚤濟美於相門旋蜚英於仕路進陟  
冰廳之直有嘉綿蕝之儀漱石枕流方叢祠之燕養  
鳴玉曳履佇華貫以橫翔某久矣仰高行將快覩未  
通名於記室已拜寵於書郵引領光塵譬草木君之  
味也服膺辭翰贈瓊瑤我何報之

賀朱提刑到任啟

伏審寵拜除書榮將使指方君行仁政務臻禁罔之  
寬欲下無冤民尤遴憲臺之選僉言有愜刺部相歡  
恭惟某官象載垂光龍淵擢穎厲枕流之清節覽翔  
仞之德輝肅括洪深不言而備四時之氣沈浸醲郁  
所著皆約六經之文禮初答於鳴騶望遂諧於側席

聊纓情於好爵卽策足於要津開卷蓬邱下太一青  
藜之杖題輿芝甸貳刺史銀菟之符中臺已歎於郎  
潛聞館乃求於吏隱惟今湖部蓋列帝畿總一道三  
尺之權問七州六條之事疇咨明允來職平反出綽  
占星有赫光華之遣埋輪撰日式先畏愛之傳靖民  
無取於禹刑居位已奔於晉盜攬轡何久賜環可期  
某趨起小才倥侗晚出抗塵宦海初無一日之長借  
蔭卿雲幸有二天之託未能撰屢敢問典籤

同錢簽判啟

伏審光拜宸恩榮司郡畫枉書郵之見及欣騎氣之

鼎來伏惟某官材智高奇機神警秀過庭有詩禮之  
學傳家得忠孝之風久藉藉於芳猷盍駸駸於臚仕  
暫總六聯之政俯參一幕之賓繼踵相因固棠棣青  
氈之舊信眉欲論稱芙蓉綠水之游拔擢可期挽留  
寧久某頃求補外來筮治中聆德惟勤將親仁於僚  
友效官有賴庶逃責於公家

賀錢運使到任啟

伏審光奉制書寵將使指一言寤意載嘉前席之陳  
九式均財遴柬外臺之寄僉諧胥慶刺部知歸恭惟  
某官養氣至剛知言有要清明內照考之皆有宮庭

悃福無華渾然不見圭角惟家傳於忠孝宜世濟於功名方持熬波燥茗之權已見攬轡登車之志厥今湖部實謂帝畿故繡衣計使之除卽紫橐從臣之選比虛茲位始得其人欣出綽之占星間埋輪之撰日一日食二日貨旣知疆國之源流千斯倉萬斯箱更賴裕民之方畧行將節擢夫豈淹回某握躡小才倥侗晚出抗塵宦海曾一日之無長借蔭卿雲幸二天之有託

賀李樞密啟

伏審顯拜恩綸進持幾柄當五百興王之名世光啟

豐功惟二三執政以便民疇咨碩德除音旣洽頌語允諧恭惟某官識邃而明氣剛以大宅英華於道祕漱芳潤於詞源殫見洽間已貫穿於今古獨行特立不茹吐於剛柔掉鞅巍科振纓膺仕贊理官於聽棘游省戶而握蘭久陟都公式騫法從對溫顏於青瑣屢罄嘉猷承密旨於黃樞益隆瓌望果奉絲綸之寵遂登帷幄之崇南北兩朝方干戈之載戢東西二府宜文武以兼資更賴贊襄共躋晏粲某雁塔綴年家之好麟臺叨朝路之榮支郡庇身悅置郵之傳命台階矯首因筆墨以成文退惟贊善之深采切瀆尊之

賀吳運使除直祕閣啟

伏審光拜渥恩進都顯職埋輪道上威方肅於外臺  
出綽廷中榮遂躋於內閣十連相慶萬口謂宜恭惟  
某官志度淵英宮庭高嶷探墳邛之古訓包川嶽之  
靈暉絕後光前惟琢磨於道德弼中彪外不茹吐於  
剛柔蚤負遠猷益騰碩聞播絃歌於鳧鳥贊筆削於  
鴻樞議論喟然風流籍甚熬波燥茗見有司將明之  
材輒粟飛芻懷天下澄清之志旣信眉於善類宜象  
足於姦朋計定心君知所取而知所與望高膚使得

其祿而得其名浸結上知式鞫中祕有煥皇華之寵  
更隆刺部之權將朽貫於邦儲晉楚之富不可及也  
卽翔纓於禁密管晏之功可復許乎某偶縛微官莫  
瞻崇勿速置郵而傳命喜氣惟深因筆墨以成文蕪  
音是懼

賀何中丞啟

伏審出綽楓庭振纓柏寺論諫皆本仁義夙著丹青  
吐茹不以剛柔聿分白黑除音四達僉允一同恭惟  
某官實大聲宏材全能鉅窮草木多聞之觀蹈詩書  
百家之言繡口錦心後學者有所統瑰意琦行諸大



盛洲文集 卷五十二 相  
夫皆曰賢蚤得雋於巍科旋躋榮於拱著是正嘗來  
於藜杖校讐久對於芸籤六察奉公振山岳動搖之  
職一言獻可當國家閑暇之時卽長諫垣有光從橐  
遇聖主和顏而納誨故爭臣造膝以伸辭天上麒麟  
來表康朝之瑞人中屈軼益高指佞之名忠讜侃然  
功效卓爾迺峻籠街之寵遂隆專席之威風厲霜凝  
良藥少資於利病雲從霧滂巨川行賴於作舟某稍  
闊光塵欣聞成命聊馳誠於削牘敢廢禮於司函

賀執政正旦啟

林鐘上生太族實函鳳律之和攝提正于孟陬茲協

龍躔之紀惟棣通於庶物宜萃聚於多祥恭惟某官  
道貫孔門氣吞楚澤侍言帝幙參二三執政之班發  
藻儒林當五百生賢之運履端於始降福孔皆某偶  
縛微官阻趨崇初遙想頌花之列敢修行李之儀

賀兩漕進職陞副使啟

伏審深知自結異寵鼎來內閣聯榮益邃雲章之直  
中都改觀更崇星節之稱除日四馳歡心一律恭惟  
某官洪深置度茂粹凝姿學廣聞多友古人於千載  
材全能鉅備和氣於四時久將漕於王圻浸豐財於  
國帑振黜否陟能之任得取贏散滯之方刺史問以



六條威聲孔肅天下號曰八俊望實俱孚薦拜懋恩  
亟躋顯職仰使名之既正知朝著之有光雖屈皇華  
尙賴木牛之助卽持從橐共期金馬之登某席庇偏  
州馳誠崇勿敢撫輿人之誦用塵執事之尊

賀湯運使到任啟

伏審命傳文陛寵陟計臺第二千石之治平無臣出  
其右者總十五州之飛輓有人然後充之刺部知歸  
僉諧胥慶恭惟某官鳳麟嘉瑞川嶽靈暉學漸稽古  
之源才負康朝之畧自摘髭於上第旋策足於亨衢  
職業粹然聲華籍甚江淮草木知剖符持節之名雲

海蓬萊寓磨槩懷鉛之直當近郡薦更於秕蠹故清  
朝遶東於賢能旣千室之鳴弦果十行而賜札厥今  
澗部實古王畿惟繡衣使者之除卽紫橐從臣之選  
占星出綍爭聞竹馬之迎諏日登車有賴木牛之助  
考夏疇於八政振漢制於六條善類信眉姦朋落膽  
連城帶邑問出入之錢穀幾何足國裕民知取予則  
古今一也行將拔擢夫豈淹畱某趨起凡材倥侗晚  
出抗塵宦海初無一日之長借蔭卿雲幸有二天之  
託禮未伸於撰屨誠敢布於典籤

盤洲文集卷第五十二 閏月朔未刻校

上堂三行

盤洲文集卷第五十二

啟二十一首

賀何樞密啟

伏審寵傳鳳詔位陟鴻樞天子守在四夷方底修文  
之盛公輔間于兩社允資同德之良帷幄有光紳綬  
相慶恭惟某官人倫儀表天下中庸堯醜舜薰絕翰  
墨之畦逕周情孔思酌道德之淵源久歷通津薦居  
言責丹甌掌受書之柄絳騶揚清路之威志在擊邪  
如鷹鷂之逐鳥雀事先去甚當豺狼安問狐狸輟自  
南臺進登右省身享懷金之樂人歆執玉之榮簡求

盤洲文集 卷五十三  
茲得於眞賢康濟益隆於極治蓋一國之慕巨室爲  
政不難惟三公上應台階斯拱而埃某竊觀除目偶  
抗塵容削牘傾心敢贊典籤之喜捉衿接武莫勤倒  
屣之迎

與交代石監丞啟

伏審瞻天拜命暫遺金馬之班涓日治裝求佐銀菟  
之政搖心比屋企踵前躡恭惟某官量賦登閣識該  
貫變振魯叔復興之學讀黃童未見之書六翮高飛  
三科連中酌淵源於道德異乎綆短而汲深煥星斗  
之文章所謂芒寒而色正紙見洛陽之貴馬驚冀北

之空旣發穎於俊躔遂躋榮於華綴前主所是著爲  
律爰筆削於金科三人同行必有師久範模於玉葉  
旋奉虎闈之寵其期齧禁之游何挺特之英姿顧翺  
翔於半刺雖山登桐柏有仙跡之可尋而社接枌榆  
宜民情之素習政恐賜環之趣不成煖席之期某一  
別瑤林五遷緹籥詞壇給札嘗叨采菲之兼收郡壘  
題輿不意積薪而居上況甲族有親葶之舊復周行  
依蔭樾之餘逮茲糠粃之揚實賴瑾瑜之匿披承云  
邇欣慝惟多更奮冲襟益叢嘉祉

答謝將仕投贄狀

講聞雋譽願挹令儀辱謙牧以光臨賁賤函而下問  
雖成蠅誤墨昔嘗披羽以先登而得魚忘筮無復傾  
困而羅進益媿瓊瑤之報第榮錦績之藏

謝人投所業狀

比辱光臨寵詒雅製抽琴命操詎知山水之音下筆  
成章有瓊瓊瑤之報

謝人惠生日詩狀

特勤都騎寵況佳篇牛斗不神媿名聲之何有參辰  
相比覩光焰以非常退惟衰拂之私良積感藏之厚  
謝人惠生日詩狀

男子占熊羆之祥猥勤齒錄美人贈錦繡之段益賁  
身榮方下拜於緘封將永藏於巾衍

賀胡提舶啟

伏審疏榮細札拜職輜軒傳聲五嶺之南講德百僚  
之上恭惟某官軼材兼美達識不羣抱圭璧之瓊華  
採簡編之奧府久居別駕深鬱遠圖茲奮迅於星輶  
來典司於浪舶惟犀象珠璣之湊置使匪輕非山林  
川澤之饒輸公有限必賴算鞭之智自多航海之珍  
僉曰得人可以利國第恐注思於宣室靡容畱憩於  
外臺某夙仰光塵未親警欬豈期畱落於此乃得睨

盛洲文集 卷五十三 三  
矇之依敢寓意於書郵庶聞名於記室

同廣州羅通判啟

伏審受命監州治裝隄嶺咸驥眉於英矩已傾耳於先聲伏惟某官學擅紛綸才誇典麗嘗因野鵬而作賦復爲仙羊而拜官薦屈題輿不辭叱馭來康南海少煩別駕之功入拱北辰高應列星之位某暫緣攝事將獲承顏書記翩翩愧報章之不敏行邁靡靡願旅食之益調

賀饒州洪郎中啟

伏審眷深前席寵拜左符燕寢棠陰方畫戟新臨於風月螺洲芝嶺皆繡衣舊領之山川初布教條遠聆謳頌恭惟某官書輕倚相識博胥臣超卓見聞東春秋之五傳增多訓詁說離騷之一經網羅闕里之蟬嫣是正昌黎之魚魯沛然學問籍甚聲名開天祿之陳編光分太一賜除麋之佳墨文應列星迺持刺舉之權常奉平反之策賣劔正傳於淮甸夢刀復至於江城召王褒而作詩將開宣室見蓋公而問治欲避正堂卽有裊綸入參禁橐某睽違之久慕仰益深頃講宗盟不棄它楊之誅茲叨河潤尙稽維梓之恭歲事向闌郡章多暇願謹鼎裊之節益隆襟履之休

賀肇慶劉守啟

伏審疏榮象闕作鎮龍藩瓜戍指期允協東龜之吉  
棠陰畱景已傳今綉之謠恭惟某官至德中庸大雅  
宏達圭璧豈迷邦之寶楨柎推聳壑之材蚤馳問於  
朝端復承流於嶺表揚仁風於贈扇來福遐萌沛甘  
雨以隨車遠追前躅卽聞異政遂下褒綸某甫閒芝  
眉密叨樾蔭揚衡賓閣莫瞻五馬之尊寓意管城奚  
報雙魚之遺

回鄭德慶啟

伏審承榮鳳闕宣化龍藩時望允歸風謠立振恭惟

某官襟靈磊落智畧高明豫章呈聳壑之材大呂擅  
尊朝之器久潛宦海連把州麾硯臺方選於一錢錦  
石又歌於五綉鹿效祥而夾轂不墜家聲績務本以  
賣刀益崇治行卽聞褒召遂陟通階某頃際英躔獲  
親清誨驥眉畫戟何因樂霧之披寓意短緘莫報郇  
雲之賜

回曾解元狀

鑿鋒筆陣彼烏敢當我哉造勝文場無能出其右者  
鄉評允愜儒黨有光先輩積思三都馳芬五嶺充物  
簡編之贖優游翰墨之林文最善鳴白也詩固無敵

言多實用誼之策豈略行瞻雁塔之崢嶸指鵷行而騰翥肯迺縫掖見賁長牋某久矣講聞欣然諧際攝空泮水獲聞擲地之聲遠迹瀛洲莫快如牆之觀

回侯解元狀

爭鋒筆陣日五色以齊驅造勝文闈心三星而著象聲馳粉社喜動蘭陔先輩韶濩諧音榘榘聳榦學周公仲尼之道特立獨行有相如楊雄之風同工異曲不輟夜分之習素高月旦之評果得雋於槐黃將策勳於芥紫章章雁塔袞袞鵷行某舊矣知名蹙然識面攝空未幾初非一卷之師挾藻肯臨深媿雙金之

報

回戴解元狀

爭鋒筆陣少陸機作賦之年造勝文闈冠王勃齊名之傑聲馳里社喜動親庭先輩囊穎有聞席重是似平時妙童子之作既擅價於雕蟲一日中有司之程果賞音於雌霓不負槐黃之舉能收竹素之功唾手巍科致身榮路某久欽警悟幸際清揚暫爾攝空弗補撞鐘之問惠然摛藻有慚報玖之章

回傅解元狀

竊審席珍長圃副嘉詔之詳延造勝外臺占賢書而



獨步它鄉改觀吾黨垂光先輩賦麗孔門氣廟屈壘  
果見舊甍之得不負短檠之勤出月脇以蜚聲一枝  
可折振風翰而借便萬里爲程某頃幸承顏欣聞中  
的遂迺方履見詒金薤之辭不腆報章有愧木桃之  
什

代人謝鄭漕舉改官啟

贊赤側三官之事浸及終更受皇華四牡之知頓增  
倍價感藏心石喜動背芒竊以鳥有鳳而獸有麟咸  
知爲瑞木在山而馬在肆孰辨其良惟眞賢司藻鑒  
之公故後進得旃幪之託然錦心繡口者或有山川

艱險而蠟言梔貌者曷分珉玉之殊狐裘反衣而有  
之柏舟不遇亦多矣取人失之子羽何以得才草奏  
不如陳湯艱哉知己謂予不信從古以然如某者馬  
走質凡雞尸用小自保歲寒之質未高月旦之評非  
韞匱以求沽何席珍而待聘徘徊九品幾韓子之無  
歸坎壈十年眞釋之之不調偶銅山之設屬致菽水  
以奉親刺史部州十三自慚黃綬城南去天尺五莫  
借丹梯初無鸞鷲鷓雛之稱安得蚍蜉蟻子之援豈  
期內舉獲廁下陳某官濟美相門奉芳聖域專繡斧  
振威之任紹緇衣好賢之宜君子存心旣埋輪安問

當路執事過聽乃推轂有味其言何知桃李之陰近在瓜葛之末某敢不服膺吏道律己官箴巢寄一枝不作南飛之鵲印垂三組庶晞友顧之龜

代承務郎謝梁侍郎舉陟啟

曳裾求見偶志目而中眉剡臚受知遂鑽皮而出羽有識相慶無言可酬竊以國家崇紫橐之班三年使之延賞銓選厄綺襦之路五官然後陞朝已離竹馬之遊眞作土牛之鈍歷倉氏庾氏之職至于再三合社郎廟郎之員動以千百抗塵竟走於俗狀累日未離於小官惟寸進之艱難曷丈量其長短黑頭年少

誰稱俞座之梨白脚門生寧望迎霜之兔儻非論薦孰得甄升如某者蟠木弃材豨苓下品學未知於習是文不造於紬奇良冶爲裘莫繼槐花之舉尙書給札空慚棣萼之編猥以門資廁于仕版已分爲國舍虞比之伍見譏於封胡羯末之間敢希敝帚之千金自嗟駑馬之十駕才不才各言其子方景行於芝蘭幼吾幼以及之人遂兼收於葑菲寵踰意表喜溢顏行某官江左興王之臣山東相國之種龍返鄉而蛇得露首佐命以負羈魚縱壑而鴻遇風久論思而簪筆進人將加諸膝慕才而貴其身分濁涇清渭之源

盤洲文集 卷五十三  
賞流水高山之志何期刻畫亦及盤跚某敢不劇目  
囊箱游心刀篋有絲麻無弃菅蒯仰哉謬恩投桃李  
報之瓊瑤誓堅後效

代徽州尉上太守啟

仕而受祿腰黃綬以遵期我獨有天日朱轡而結想  
將承顏於旦暮敢問訊於寒溫伏念性不逮中技惟  
每下久焚膏而繼晷非藏器以待時鯉退學詩恐墜  
過庭之訓孔門用賦妄希入室之工屢踏槐花晚穿  
楊葉脫白丁而釋躄齒黃甲以彈冠方塵九品之微  
復占百僚之底一行作吏未伸北部之威三釜及親

獨喜南陔之養問津茲始勾庇甚優恭惟某官識冠  
倫魁學窮淵奧珠藏璧韞曠千載而流光鯉化鵬飛  
搏萬里而直上未登金馬聊佩銅魚惟大賢無所不  
容故小人恃以不恐嶢嶢有賴捶楚可逃敢不律己  
官箴游心吏道牛刀而割雞焉用敢追顏籀之風鸚  
薦而累鷺不如尙冀孔融之鑒

又迎新守趙監丞啟

紫禁疏恩榮佩左符之重朱轡戒道聿嚴前弩之迎  
老穉知歸封圻改觀凡叨屬吏倍激歡悰恭惟某官  
川嶽靈暉鳳麟嘉瑞出神明之貴胄負標的之情規

德備忱恂獨樂東平之善學該貫變盡讀河閒之書  
蚤掇巍科浸躋膺仕自典尙方之職益宏大雅之休  
肆外閤中論議冠諸宗室光前絕後名聲顯於朝廷  
暫違金馬之班薦繡銀菟之寄治裝伊始流化有期  
幸此富州得依慈父雖叔度之來何暮式佇袴襦胡  
陸君之去不畱第光衣佩使幼女復興於孝行豈小  
人敢致於私情遠紹昔賢政在今日恐棠陰之未久  
卽芝檢之鼎來某趨超凡姿倥侗晚出賦鼠窮之短  
技守狗曲之淺聞屢踏槐花偶穿柳葉初占百僚之  
底未閑三尺之從仰恃嶢幪庶逃捶楚信眉自慶將

逢流水之知引領方勤佇快青天之覩

代齋長見新教官啟

仰如北斗夙裝蹈景之懷志在高山將遇知音之聽  
敢修尺楮庸布寸心伏念某胄本單平稟非奇卓夏  
弦春誦空坐對於短檠朝齋暮鹽幾悲歌於長鋏遡  
閩川而泛梗樂鄱水以采芹濫陪講說之儔蔑有切  
磋之善中焉行役遯矣滯畱復尋仲蔚之居已失耶  
郢之步處齋房之前列曷足長人直橫舍之攸司猥  
令代匱方趁槐黃之舉妄希芥紫之榮欣哲匠之鼎  
來冀頑姿之速肖大衍挂一庶窮儀畫以東歸宵雅

肄三或俟鹿鳴而西笑夫何僥倖有此際遭恭惟某  
 官學博五車文兼千策燕之角荆之幹獨擅美材湯  
 作濩舜作韶宜薦清廟屢鼓詞闈之氣益馳藝圃之  
 名驚大器之晚成快景星之爭覩廣庭首唱諸老先  
 生未能言便坐口談當時弟子有所記三歎坐甕之  
 冷久期朝席之重卽有袞綸入躋華綴遂袞袞青雲  
 之上豈鬱鬱絳帳之間尙容負笈而前少遂撞鐘之  
 叩某自鞭十駕願反三隅問鑄金得鑄人已獲求師  
 之益若食雞必食跖終收善學之功

代董承事以百二歲得官謝縣令啟

宋本缺末頁

缺末葉

盤洲文集

盤洲文集卷第五十三 同日系刻

盤洲文集卷第五十四

啟二十六首

代廣東帥屬謝帥啟

問津黃木之灣甫窺宦海竄籍紅蓮之府仰泛恩波  
卽尸素以懷憂敢殺青而通謝伏念某稟生椎魯探  
道艱難拜千佛之經莫能趾美聯五星之集有媿齊  
稱學書旣已不成爲器遂同無用濫塵官簿空積歲  
躔因定省於親闈遂徘徊於炎嶠歎庸材之牆面筮  
臚仕以灰心臨淵羨魚初覲叢祠之末秩乞漿得酒  
乃叨戎幕之下陳徒誦過庭之詩未閑作吏之事無

片長可勝任使奈狹見不足激叩非賴包容難逃汰  
斥恭惟某官雕龍傳學雌霓垂光蜚妙譽於簪紳補  
嘉謨於帷幄課先撫字聿高使竹之分志在澄清克  
受皇華之遣薦佩十連之寄歷提五管之封里詠塗  
歌已洽袴襦之樂山行海宿寂無枹鼓之鳴宜錫詔  
綸入持從橐豈令賤子久託餘輝某率爾彈冠欣然  
望履見父之執方自躍於鑪錘御眾以寬願少私於  
轡策

代高要丞上鄭太守啟

餽口四方妄發彈冠之請庇身大邑叨居涉筆之官

正結想於高牙輒露情於小牘伏念某學初茅塞識  
遂棗昏語寔反於三隅能不名於一藝白駒過隙雖  
抱子以何知黃金滿籝在傳家而有忝亦嘗諾仕纔  
得奉祠方九重天遠念於澤南故萬戶縣皆爲之立  
貳首令攝事未通爲政之經足以送窮不勝負公之  
媿趨趨欲進瘝曠是憂仰庇卿雲豈無道地此蓋某  
官鵬圖擊海鶴瑞鳴臯獨鍾喬嶽之暉共推清廟之  
器薦都顯職大播休聲瑞旣協於夢刀仁卽揚於贈  
扇蔥蔥王者之氣夙重潛藩廩廩君子之風聿追顯  
祖惟陂量兼容於弱吏庶皞生得視於聳丞某整楫



非遙執鞭可冀自思牛馬之走無所取材甫親雁鷺之行敢不盡力

代封州簽判謝帥啟

餽口遐方妄發彈冠之請庇身近郡叨爲入幕之賓仰哉厚恩敢通小牘伏念某學初茅塞識遂棗昏語寧反於三隅材不名於一藝白駒過隙雖抱子以何知黃金滿籩在傳家而有忝亦嘗卜仕纔得奉祠頃辱外臺俾丞大邑偶黃茅之感瘴致行李以愆期仰惟元老之尊獲遇丈人之行進瞻步武幸披霧於公庭曲賜齒牙遂回春於寒谷殆類塞翁之失馬自驚

非庭字

龍伯之得鼇惟有感銘莫知論報此蓋某官包羅閒氣貫綜多聞闕紫闥之榮途贊黃樞之密議始居輔郡無庶民愁恨之聲暨擁使輅有天下澄清之志遂臨八桂卽詠兩歧旋出綍於西垣迺建麾於東廣寬猛相濟蔑懷市虎之疑剖決如流不事淵魚之察俯憐窮蹇遂致僥逾某敢不虔畏簡書力鞭駑鈍量長校短雖無尺寸之能抱公滅私或覲涓埃之效

代謝吏部李侍郎啟

把麾五嶺已銷西道之聲出綍九重復玷東偏之寄裝懷增懼揣分知歸伏念某業守青箱用慚赤箭賣

刀買犢薦宰銅虎之分輓粟飛芻未達木牛之運牧  
人久矣奏課缺然恐獲戾於備員忽拜恩而更治仍  
躋延閣併寵衰蹤此日集衙無聞名之龍戶它時報  
政空貽辱於羊仙僥倖如斯吹噓有自此蓋某官量  
侔山藪識蘊著龜蚤知藉稻之文獨富粲花之論主  
刑仁恕議者謂過于張典選清平人曰後有盧李夙  
懷推輓共賴主盟惟曲賜於品題致連叨於任使某  
自闕星躔之覩屢驚斗柄之移畝水易心益厲吳公  
之操薄征疏目仰師韓子之言

宮使梁尚書啟

某官生逢慶會譽滿華塗有燭照龜卜之明兼地負  
海涵之量得劉晏之取予任蕭公之轉輸足用地官  
斗筭之徒何算也伸威天府銖兩之姦皆知之蚤聯  
職於寶儲暫均休於珍館獨司推輓共賴主盟載惟  
鼠技之窮夙受鸚書之薦傅之羽翼賜以齒牙獨私  
華袞之榮猥遇高山之聽致叨任使盡出吹噓某敢  
不拔薤抑強酌泉厲操可繼宋璟盧奐伏仰前芳失  
之子羽宰予益慙厚遇

福州張侍郎啟

某官量賦登閣識周貫變味道腴於七略包文體於

百家曲臺高稷嗣之除起部筮郎潛之列益崇晝接  
疊慶歲遷內舞舜干仰仁天而簪筆出懷蘇印洽惠  
露以隨車積有功名著於中外撞牙桂管嘗復借於  
寇君徒節閩川歌晚來之賈父自顧散樗之質夙遊  
棲鳳之林惟接武之好尤深故推轂之言益過致叨  
推擇有辱品題某心係重階誠殫小贖準程前哲欲  
厲操於貪泉寤寐清規庶免愆於宦海

回李惠州啟

伏審懷章去國式臨瓜戍之期森戟專城將決棠陰  
之訟遐萌相語慈父斯來伏惟某官德宇粹溫風規

高邵蚤擢奉常之第宜居著作之庭旣荏苒於歲年  
尚棲遲於簿領以名字而典郡允得循良有方畧以  
爲民自然富庶治行聿追於召杜歡聲將軼於羅浮  
某頃接班聯浸暎顏采方喜戒途之報已勤削贖之  
音書細十行卽遠盼於褒詔河潤九里猶少借於餘  
波

問李虔州啟

把麾五嶺已銷西道之聲出綍九重復玷東偏之寄  
甫恭朝夕遙問寒溫某官學富家傳言推世則自奉  
專城之寄遂深當宁之知刺史省以六條夙稱桂海

天下號曰八俊益振荆湘來司章貢之權兼用黃韓  
之化紀綱大舉謳頌載騰爲官乎爲私乎變貪殘於  
一問行山者行澤者熄椎剽之羣驚治旣疏於御屏  
寵將持於從橐某受材甚下任職無長方軫慮於譴  
訶忽冒榮於推擇退惟僥倖端出品題念平生雲霧  
之披獨彼此參辰之闊雖烹魚狎至有踰從事之賢  
而覩鳳後期未降君子之見每溯洞而結想空蹈景  
以興懷比獲守於郡封迺密切於鄰寶相依屑齒願  
投分於蘭金敢布腹心幸攄誠於藥石

謝溫南劔啟

把麾五嶺已銷西道之聲出綍九重復玷東偏之寄  
顧薄材而知懼枉榮問以增慚此蓋某官學博書倉  
識窮理窟蚤擢奉常之第旋陪中祕之游武成之策  
二三盡讐譎謬健爲之磬十六能考異同已垂上於  
雲霄迺遠分於符竹物華天寶神龍潛合劔之津里  
咏塗歌黃犢化佩刀之俗夙保歲寒之契獨私月旦  
之評遂致迂疎猥叨推擇某睽離久矣瞻遡眷然書  
記翩翩若高談之對面故人戀戀冀清誨以傾心

同陸全州啟

朽質叨榮已佩五羊之印高情贊喜復貽雙鯉之書

謙謙仰君子之風戀戀深故人之意某官機雲家世  
召杜材猷燕寢清香寂棠陰之少事蠻溪豪族無薤  
本之可除當翱翔金馬之間豈畱滯銀菟之久某馳  
心英矩引脰崇墉遠矣嗣音顧瓊瑤之何報使之免  
戾幸藥石之不忘

回蔡學士賀生日啟

侵尋晚景知牛斗之不神煥爛騰章仰參辰之相比  
倍哉深仁之眷益增初度之光恭惟某官瑞企清明  
氣涵剛大表表出塵之逸韻英英秀世之芳規隱帙  
奧篇讀黃香之未見鴻詞麗藻稱王翰之可珍久肆

志於林泉自怡情於風月夙蘊愛人之德獨存介壽  
之心俯爲初生欲其難老一言假借或松柏之後彫  
十襲祕藏顧瓊瑤之匪報

回湖南韓總管狀

五嶺作藩已銷聲於西道九重錫命遂更治於東偏  
惟記室之未通迺書郵之先及某官識探李法名擅  
花卿國士無雙有登壇之鼻祖一人當百多戰野之  
膚公輕裘久撫於龍川精甲暫屯於鄂渚顧惟絲薄  
方媿叨逾操筆覲然莫報翩翩之問接辭遠甚空深  
耿耿之思

同知州惠生日詩狀

定三百六旬之歷會遇生朝知四十九年之非侵尋  
晚景曲荷松僑之祝光垂李杜之文伏惟某官撫字  
知名中和興詠聽訟美甘棠之憩勸耕傳岐麥之歌  
性不違仁語皆揚善其詩孔碩壽欲俾之熾昌何德  
以堪榮但深於藏弄

同趙新州狀

竊審影纓西笑小遲象闕之行理橐東來暫攝魚符  
之事先勤榮訊足見高情伏以某官名擅宗英才推  
國器九流索隱能讀河閒之書千佛聯芳同射平津

之策蚤傳諾仕已歷專城置任棠之孟清哉若水贈  
袁宏之扇仁者宜風行將擊柝之聞猶限盍簪之阻

同廣西帳幹狀

半年懷舊常望岫以馳心千里寄聲若飛談而對面  
深銘永好采激私情某官韻秀朱霞才淹綠水傳幕  
中之辯是謂能官流地上之錢共推善計念斯遠別  
失我良朋枉兼贖之鱗鱗媿報章之草草

同潮州沈通判狀

伏審拜恩中禁贊治偏城枉雲翰以見詒傳星屏之  
甫至某官聯橫許郭方駕曹劉蚤擅價於俊躔久韜



光於仕路居展驥之任寄實重於監州誦訓經之文  
功正煩於康海念聞名之有素會會面之未能不腆  
報章奚酬雅眷

回鬱林知州狀

睽闊清談屢閱飛葭之變周旋雅好遠承裁楮之臨  
某官養氣渾雄存心撫字此時衰詔賜黃霸以兼金  
它日歸舟載陸君之一石念披瞻之未再徒結約以  
彌深

回周貴州謝到任狀

竊審承流潭水既拜魚書攝事貴川已懷犀印某官

風儀清整器局沈深歌麥兩歧前乎既聞耳矣拔薤  
一本今者復盡心焉卽有袞綸入登華綴曲枉翩翩  
之遺第慚草草之酬

回趙賀州謝任滿狀

竊審解龜古郡鞭鳳亨衢曲垂問訊之勤益佩論交  
之厚某官材推標的學載本原比及三年已見與求  
之政統如五鼓不勝挽鄧之情名已列於御屏榮卽  
躋於省闈邈爾承顏之便悵然引脰之私

回范總幹狀

竊審派恩雲闕列屬星臺已協吉於成瓜遂寄聲於



行李某官風儀秀峙器宇淵深有家學之相傳更吏材之是似足兵重鎮吐計畫於幕中退食私閣奉皇華之膝下增益過庭之誨軒騰當路之知念昔桂林實望蓮府睽離既久瞻邇靡忘情非鹿鹿之交禮重鱗鱗之貺

同汪經幹謝舉削狀

征茅引類實採公言擣藻鳴謙難當私謝某官淵源賦學通敏呈材久贊外臺又屈紅蓮之佐尙淹小選未高碧落之飛寶雖識於照車言媿輕於推轂曲承榮訊深戢勤情

同石縣尉狀

竊審青錢中選黃綬榮歸喜動親闈光生里閭某官識探理窟學富詞源廣陞臚傳其仰鯤鵬之化遐方諾仕難淹騏驥之馳益載休聲遂階要路未皇贊喜已辱貽緘

同封州教授狀

竊審瓜時蠲吉芹泮恢文枉兼贖以見貽佩高情之良厚伏惟某官學能日益辭不雷同早聯千佛之名已得羣公之譽當聖主大崇儒術故遠方皆置學官坐絳帳以談經少煩模範登金門而奉詔卽見羽儀

懷雅論以傾馳媿報章之崖畧

同鄭德慶啟

竊審治聲夙著靡俟造朝吉語載馳復欣典郡方一  
麾之宣布宜千里以謳唵某官西都循吏之孫元祐  
名臣之世論議共推於魁壘典刑可見於老成未攬  
經國之材獨紀牧人之效向來剖竹乃先帝之潛藩  
今日憩棠又吾君之舊邸惟兩城之相接在五嶺以  
稱雄必有異能遂看裊渥某班荆未幾紆軫已深聲  
迹相聞斯不踰於數驛簡書可畏尙有賴於餘波

同陳英州狀

比承謙誨欲得剡章實循三尺之文重屈雙函之禮  
某官彰名雁塔鏹采藍田麥秀兩岐已藹聞於善政  
河潤九里更密借於餘波將滿秩以趨朝遂正名於  
典郡難虛爵里之辱漫備銓曹之須豈題拂之敢云  
蓋扶搖之可俟

同潯州知州狀

遠隄五嶺榮把一麾得之流聞無不稱頌某官包淵  
深之度負超卓之材既問政於蓋公欲追蹤於召父  
沛隨車之甘雨惠愛無私揚贈扇之仁風芬芳大播  
行當簡拔夫豈淹徊念久講於英聲曾未陪於雅論

盤洲文集 卷五十四  
頃傳得郡將期王事之同偶玷移藩遂有鄰封之隔  
聊通柔削莫報珍題

上堂四行

盤洲文集卷第五十四 同日申刻校

盤洲文集卷第五十五

啟二十五首

賀廣西向運使啟

伏審出綸內闕乘傳外臺騰八使之風聲威行荆渚  
指二天之星次光燭桂林朝野僉諧江山改觀某官  
韜藏遠業充物多聞才握隨和擅當今之奇寶聲諧  
韶濩傳上古之雅音飽說吏師獨優才具政嘗喧於  
歌袴名屢振於埋輪尙遲金馬之游復領木牛之寄  
用知取予惟出入錢穀幾何志在澄清豈奉行文書  
而已寧容煖席卽見賜環某夙綴末交浸睽英範偶

剖竹有善鄰之賴更揚穰深前事之慚敷枉論心徒  
起仰高之恨裁緘寫抱莫酬問訊之勤

回劉肇慶啟

伏審瓜時而往懷印綬以臨州穀旦于差擁車轡而  
夾道厥初班錄咸有謳吟伏惟某官學考聖賢望尊  
耆舊試吏見慈祥之政濟時懷超卓之材出魚契於  
九重鎮龍藩之千里昔禱今禱已騰蜀郡之謠右粥  
左餐可遂蔡人之樂行將促召夫豈久畱某近枉高  
軒遂承英範惟鄰是卜幸借潤於靈河無言不疇聊  
嗣音於芳牘

賀胡提舶交割啟

伏審戴星叱馭涓日視章咸屬耳於前騶獨驥眉於  
英矩伏惟某官居今行古肆外闕中裂芟製於塵埃  
久躋撫仕分茗溪之風月屢贊名藩遠將五嶺之權  
盡幹萬商之貨允謂濟時之彥斯多航海之珍卽恐  
賜環豈容煖席某自聆顯綽嘗貢柔緘喜聞持節而  
來時乃把麾之幸萬事不理待伯始而可知一坐盡  
傾傳孟公之將至更期冲齋式副瞻翹

賀余虔州啟

伏審疏恩中禁作鎮雄藩城郭重來指繡衣之理所

盤洲文集 卷五十五  
兒童相記騎竹馬於道周初布教條側聆謳頌恭惟  
某官圭璋寶器杞梓良材家學相傳無畝向異同之  
論儒名夙就少甘奇顯赫之年復掉鞅於魏科浸著  
鞭於要路臺綱大振獨高屈軼之名郎位有光嘗拜  
隃麋之賜迺駐車於章貢早珥筆於筠袁已見澄清  
復將漕輓方筮鶴而奉計又分虎以牧人所至移風  
不事縫裾之策自公退食更多戲象之榮既久習於  
民情宜易臻於治效卽頒綸綍歸侍冕旒某偶玷郡  
麾獲依鄰燭號五雲體雖屢枉郇公之書封萬戶侯  
恨未識荊州之面

賀沈提點啟

伏審榮錫天書寵持星節立九府之圖法久訪能臣  
專三官於上林外兼數路邸音既洽時望攸歸恭惟  
某官英偉賦才淵闊置度糟粕不膠於紙上宮商皆  
起於筆端鞅掌魚符有淮人之孺慕規恢驪駕無漢  
士之色飢益懋簡知果膺顯擢廣攬轡登車之寄總  
冶鎔炊炭之司權子母之重輕少煩心計接夔龍之  
步武卽聽履聲某自闕台躔屢移斗柄皇華甚遠旅  
進退終未能蔭越焉依大譴何而或免

回陸提舉啟

榮拜明恩進膺褒擢一麾出守輟近郡之股肱四牡  
載馳寄外臺之耳目郵音甫暨誦相歡恭惟某官  
德粹珩璜學該竹帛雲間烜赫追入洛之清芬嶺表  
崎嶇偃說佗之雄辯自結冕旒之眷見稱簪紱之英  
久籍籍於仕途將駸駸於禁路朝廷深知治行連付  
虎符原隰遠有光華暫煩龍節卽仰北溟之擊豈爲  
南越之畱某幸綴親葦遂依蔭樾方捫襟而自喜將  
聽履之有期驟訴喧囂不敏寒溫之問山川跋涉願  
言裊匕之調

同鄧漳州啟

拜恩丹旻宣化黃堂方增重於郡符已分輝於鄰燭  
某官受材卓偉函器宏深蚤發策於儒科旋濯纓於  
朝路連得三刀之夢尙煩雙戟之臨雪白蘭薰獨廉  
清之名顯風行草偃卽豈弟以政成行遂陟明豈容  
斂惠某屢通聲問未際色辭頃接鳳毛斯見義方之  
訓遠勤雁足益知謙德之光

同竇賀州啟

顯差穀旦榮憩棠陰凡千里之提封皆一詞而詠德  
某官聯珠傳業片玉呈材力晞青史之賢薦拜朱輪  
之寵馬如羊而金如粟清節素傳刀買犢而劔買牛

盤洲文集 卷五十五 四  
遐萌丕變卽看裒渥入造要班某久闢高標每懷餘  
論借寶鄰之潤幸擊柝以相聞佩謙德之光媿濡毫  
之不腆

回徐通判啟

承榮北闕受任南州篤雅眷以相先飾珍膳而見及  
某官軼材耀穎盛德照鄰蚤馳黃絹之辭久載素絲  
之節餞清橫浦謂盡展於鵬圖贊治三城又少煩於  
驥足卽聞改命豈復遠來念平昔之搖心獨差池於  
會面偶分使竹喜傳半刺之賢尙隔戍瓜恨失同僚  
之便

回李惠州啟

竊審撫柔名郡靡辭南嶠之行差擇良辰已協東嶽  
之吉某官學充素蘊譽藹清芬法任棠水薤之言略  
黃霸米鹽之細豐湖足樂顧何羨於谿堂法坐見思  
遂入翔於禁瑣少看游刃以俟追鋒某密邇門闌無  
繇談款亭瓜相接幸分餘燭之光行李游臨有媿雙  
金之報

回權梅州狀

比以偏城闕守發議擇人果得循良往甦彫瘵辱華  
緘之見及知善政之有爲欲賡供億之須旣能身率



盤洲文集 卷五十五 五  
不競追科之考更在力行

同南安知軍狀

聲聞擊柝如唇齒之相依情重裁緘見肺肝之相示  
彌戢能謙之德第增不敏之慚伏惟某官風規闡明  
德宇宏達夙著素絲之節遂居畫戟之榮比屋爭傳  
有去蝗之異政長城自衛卻聚蟻之妖氛卽聽褒嘉  
進班清切某搖心雖久識面未能方商律之告窮冀  
黃堂之善葆

同劉通判狀

竊審拜恩象闕諾仕羊城共誇別駕之賢已作著鞭

之計某官材猷奮發襟蘊粹醇早飲畫於外臺卽颺  
芬於華轍歌功康海煩驥足之一來得志摩空看鳳  
翰之橫絕雖平時闊半面之雅在難兄契同心之交  
何幸爲邦遂將聯事遠勤芳訊媿不腆於報章時迂  
薄寒冀自頤於旅食

賀田提刑啟

伏審寵拜恩綸榮將使指上方任德務臻禁網之寬  
官必擇賢尤重憲臺之選英塵所暨僉論相欣某官  
奎璧孕靈淄澠納度蚤策助於雁塔卽接武於鵷行  
六察去邪仁約張敢言之膽四知厲操陽城勞撫字

盤洲文集 卷五十五  
之心爰奉眞祠少休故里忽顛卒哀凶而疊作雖郡  
僚避難以宵奔獨追憑軾之風高出投機之計聚鱷  
鯢於孤壘不使橫行庇簪笏之名家盡皆靈處旋致  
靈旗之集弗稽蕭斧之誅迄能脫離於妖氛信有護  
持之神物偃先聲於桂筦遠應二星迎異數於楓宸  
行躋兩禁某離羣之闊蹈景已深偶左契之託鄰將  
漸餘潤幸繡衣之假道卽際清標憑竿牘以摠情冀  
鼎裊之垂意

謝陳經畧啟

垂弧紀旦慚學易之無聞削牘鑄辭辱過情之善祝

雅懷借重陋質生輝恭惟某官聳壑呈材照鄰蘊德  
貫魯壁鄴家之讀播函京灞岸之工八俊乘軺應景  
星於高漢十連植燾洽惠露於遐萌少借銀菟卽班  
玉筍夙厚合符之好曲私踰袞之袞記軫生初禮踰  
望外俾爾黃髮欲三壽之作朋遺我綠琴顧雙金之  
何報

同南恩權州狀

竊審龜筮告猶魚符攝事染華緘而見遺知初政之  
甚休某官心術疏通吏材英發盤錯迺彰於利器委  
蛇見詠於素絲種韭一畦雅有澤民之志鳴絃千室

盛洲文集 卷五十五  
其推典郡之能少借剗裁以看潤飾顧分攜之未幾  
在翹邈以彌深願寶生經遂躋榮次

同袁教授狀

竊審拜恩帝宇分職教官枉汗竹以甚勤知往瓜之  
已及某官學稱經笥譽振儒林絳帳垂堂將應撞鐘  
之問衰衣匝序可無鳴鼓之攻卽對言綸遂榮朝黻  
幸從容之有便冀跋履之自頤

回德慶通判狀

受任題輿涓辰視篆提封千里講德一詞某官量賦  
沈深材推敏妙嘗割雞而小試聊展驥而遠來風月

平分已翱翔於半刺雲霄闊步卽騰躍於高衢方念  
語離遂勤遣訊尙闊從容之便第增翹佇之思

賀林尙書啟

伏審寵拜耀章進都榮次天官其屬六十久虛常伯  
之尊武王有臣三千孰出鉅公之右絲綸所布簪紱  
謂宜恭惟某官學富盈科量深韜世追風枚賈能緯  
典以敷華發采隨和蚤席珍而待聘歷芹宮而假道  
陟柏寺以尊朝旣接武於夔龍之間遂垂光於虹蜺  
之上臺綱克正時高三院之威諫草必焚名重七人  
之長妙簡已隆於螭護祥輝迺燭於文昌望峻官儀

盤洲文集 卷五十五  
上星辰而聽履私無賓謁指風月以飛談卽踐台槐  
其寧邦本某庀官有守贊喜無因體號五雲屢枉鳴  
謙之誨侯封萬戶未降快覩之心

賀張洪州啟

出綸中禁換節大邦賓客鼎來屢下凝塵之榻山川  
改觀一新卷雨之簾聞視篆以敷和輒襲牋而贊喜  
恭惟某官梗枻聳壑奎璧垂芒和糝隨珠早席珍而  
待聘潘江陸海能授簡以聘妍若時題品之公自奮  
功名之會持貳卿之紫橐承密旨於黃樞備殫獻納  
之忠欲試藩宣之寄統如五鼓遂喧吳郡之謠願借

一年久斂桂林之惠慕府旣移於閩嶠正堂會問於  
蓋公眷益簡於帝心任復隆於方面令行數月已慰  
八州之人色比三台卽迎一札之召某自續貂於曩  
日不對塵者六秋承乏連疆迺借瓜疇之潤指期就  
道庶披棠舍之陰商節淒其高牙樂只冀鼎裊之勿  
爽副簪紱之具瞻

賀呂桂州啟

列職蓬邱總戎桂筦遠人相語潛銷佩犢之風輿誦  
攸歸共起驂鸞之詠吉諧剛日歡動鄰封恭惟某官  
識妙倫魁材高肯綮種學遠窮於邛索吐辭皆中於

宮商惠露霑濡最謳吟於名郡華星輝赫聳風采於外臺方清朝共戢於干戈故重鎮分屯於介冑足食政勞於心計列城咸肅於指撝遠勤頗牧之謀難屈管蕭之寄遂班內閣來鎮南垂慕府雄開初笑談而緩帶居毗安作不愁歎於無襦卽迂賜環未容暖席某情深引脰願隔承顏揚秕居前旣自慚於陳迹灌瓜甚美遂有賴於餘波

賀張福州啟

名簡帝心任隆方面高牙大纛最九牧以橫飛緩帶輕裘挹三山而坐嘯政新視象喜浹提封恭惟某官

嵩岱稟暉溜澗納度材高盤錯擅多多益辦之稱節貫險夷玩蹇蹇匪躬之象浸騫華貫茂著躋功足用版曹妙幹貨泉之柄耘強圭甸稀聞枹鼓之鳴旣晝接之益章宜歲遷而咸允書殿極儒紳之貴齋壇分將鉞之雄襄漢上流有賴長城之扞豫章大府久喧慈父之謠拜寵自天總戎易地惟閩粵東甌之俗本會稽南郊之疆邇今日之上都迺一時之重鎮民其幸矣公實臨之少煩統御之良卽叶都俞之會某自睽巖電屢閱秋霜竊食海瀕復借光於鄰燭馳誠門切敢贊喜於書郵願言桐鼎之調式副紳綬之望

賀黃提刑啟

渥對綸言榮將使指上方任德務臻禁網之寬官必  
擇賢尤重憲臺之選馳聲舊部聳望遐萌恭惟某官  
學探九邱文長三變黃鐘大呂參解律以含和北斗  
泰山偃儒紳而蹈景蚤接夔龍之武遂弢獬豸之冠  
自結深知式分遠寄乘輅久任周五嶺之東西宜岸  
婁空踰諸公於前後人共期於紫橐命復畀以青氈  
雖平反大慰於羣情豈獻納可遺於夙德寧容席暖  
卽以節趨某獲保歲寒款依雲蔭承流千里已逾請  
代之期借潤二天尙有承顏之便願言冲齋庸副瞻

翹

賀虔州李太尉啟

竊審寵膺恩綽榮把州麾籍甚威名泮然謳頌恭惟  
某官追蹤細柳經武前茅結髮從戎功屢先於勇爵  
執戈衛社忠益顯於周廬提銳旅以鷹揚掃孤城之  
蟻聚智謀旣運氛祲遂空綏帶輕裘少借藩宣之重  
高牙大纛卽闡慶賞之行某講服有年披瞻無日幸  
託寶鄰之潤聊通書驛之誠

同董梧州狀

宦海聞風恨差池於英矩州符接畛幸假借於餘波



盤洲文集卷第五十五  
方聆視篆之新已枉揮毫之況伏惟某官幹時良具  
耀穎逸才克全白璧之名久厲素絲之節翔鸞集鳳  
駕前籙之美談佩犢帶牛革遐萌之舊染少煩游刃  
遂逐追鋒念引領之空勞曾論心之未便第堅鄰好  
不腆報章

盤洲文集卷第五十五

同日極空

上堂三行

盤洲文集卷第五十六

啟二十二首

賀施察院啟

寵膺制綽進陟憲臺最天下之兩轡卓然獨步迎日  
邊之一節久矣不聞夙儒既升僉論相快恭惟某官  
體局方整襟靈壯堅璧韞珠藏蚤埋光於川嶽鴻軒  
鳳舉卽薦瑞於朝廷方正笏於豸冠忽分麾於魚契  
受釐宣室已深賈傳之思斂惠富州果下陸君之詔  
青氈復得白簡益嚴少煩明目張膽於鵷鷺之間行  
見聚精會神於槐楓之上某自睽巖電屢換星霜旅



進退以無繇虛寒溫而敢問

賀陳帥生日啟

候明星於南極聿臨見丙之期賦峻嶽之聲詩允協  
生申之什祥開初度頌溢維祺恭惟某官天上謫仙  
人中閒氣河目乃公侯之相泥塗無甲子之疑江左  
建旟良吏於是爲盛嶠南揭節膚使其猶劣諸遂居  
方伯之尊式賴長城之扞宣室果思於賈傅吳人難  
挽於鄧侯在厥初生必得其壽彼松柏四時之貫所  
謂經寒而知惟龜鶴千歲之殊斯可同日而語某情  
深賀慶禮隔登門有酒如澠敢介遐年之祉若金作

礪卽看晉晝之榮

賀呂總領啟

榮拜制綸寵將使指聯華省戶依烏瞻列宿之文足  
食屯營流馬幹百城之運郵音所暨輿誦謂宜恭惟  
某官超卓賦材沈深置度殖學得傳家之妙飛談馳  
驚座之名旣剖竹於雄藩遂埋輪於劇部以經潤飾  
通儒稱者三人有志澄清天下號曰八俊益隆瓌望  
密簡眷知凡財用之在版圖式付民曹之寄給饋餉  
不絕糧道重分軍政之權卽迂節趨豈容席暖某仰  
高有素快覩未降借蔭卿雲方備員於嶺表貢誠子

墨敢贊喜於門闌

賀黃提刑交割啟

兼程叱馭涓吉佩章善類得所依歸遠人無不忻頌  
某官咀華竹素擢幹梗杵魁然見長者之風溫其有  
君子之德蚤聳烏臺之望洵煩龍節之行五嶺澄清  
初祥刑於東表九重簡注迺易地於西偏斯拜渥恩  
復臨舊部夸鄉上冢散金能洽於故人輿轎入疆持  
斧載瞻於膚使卽聞嚴召歸筵近班某自讀制綸卽  
飛慶牘庀官席蔭喜旣舞於眉端指日接辭情庶披  
於心曲

賀廣帥陳侍郎啟

伏審名簡帝心任密方面輕裘舍舍北久傳峴首之碑  
輿轎宅南來酌貪泉之井先聲所偃公望迺歸恭惟  
某官參軌前良垂模後進廣庭高步仰三傑之颺芬  
要路橫翔凌九臯而徹響誨方袍於槐市讐斷簡於  
蓬邛列星已應於天文四牡暫煩於風力惟臯呂體  
觚圖之意故閩湖有囿空之隆秉筆赤墀記注爲千  
古之法蒞繇外野禮儀成十月之朝繇甘泉近侍之  
班作襄漢上流之鎮自休閒館未塞輿言方謀帥臨  
黃木之灣乃起公開紅蓮之府羊仙薦祉必須執穀

而來龍戶集衙當有憩棠之聽上召則邇人畱實難  
某夙際光儀猥勤題拂鳴珂相踵深慚糠粃之揚膠  
柱不調所幸瑾瑜之匿偶濫移於左契度難埃於高  
牙憑柔尺以搖情句和襟之納祐

賀廣漕鄭郎中啟

伏審光奉帝俞肅將使指車茵所問來休黃木之灣  
印笥重開自是青氈之物積十年之遺愛踴列郡之  
先聲恭惟某官德湛量陂名馳藝圃雅雅黃鍾之在  
簾英英白璧之輝山八俊拔奇特表絃歌之績九重  
錫對遂榮銅竹之行入贊大農進符列宿賦皇華而

險嶺振漕事以裕民自奉計而歷它官忽拜恩而臨  
舊部雖木牛流馬之陳迹較然可尋豈雲龍神虎之  
通閨闕而不召人勿私喜公寧久畱某風景高曠未  
親餘論自聆詔綽謂依賴之可期偶易州麾復差池  
而相失尚借光於仁里仍接畛於治臺竊圖行李之  
閒或有班荆之便

移福州謝趙提刑啟

輯粵空餐既大何之幸免掌閩出命願絲力之弗勝  
惕拜絲言喜投樾蔭伏念某賦尋常之質闕尺寸之  
長險五嶺者八年易九垓之三組心雖電勉初無畫

餅之虛名志欲激昂終媿貪泉之高躅恐黜幽而負  
殿方請代以圖歸豈料清朝游移要屏大懼鉛刀之  
鈍難求布鼓之聲行闕中天望日華而已近故鄉接  
畛知風景之不殊自非塵尾品題之私安得羊角搏  
扶之便此蓋某官直方厲操清白鳴徽有更生博極  
之書得東平爲善之樂望密派玉節峻輔金屢司發  
軫之權復佩平反之寄用恩及下爲長者而折枝見  
惡在前如農夫之去草時謂外臺之表人歡夏屋之  
依每曲借於揄揚致疊叨於推擇某自尊山斗浸換  
星霜聽言未愜於鄙悰投分已同於夙契遂殫五技

敢忘前事之師少借六條庶追後期之責

謝鄧建州啟

輯粵空餐偶大伺之獲免掌闈出命顧繇力之弗勝  
惕拜詔綸幸分鄰燭伏惟某官宅心端栗接物惠和  
才備四科挹前良而參軌風舒六藝發妙語於抽毫  
嘗鉤校乎三尺之文迺翱翔乎半刺之任鑄龍班節  
原隰遠有光華分虎作符朝廷深知治行籍籍袴襦  
之詠駸駸筆橐之除惟平時曲借於衮袞致懦品疊  
更於器使某自親風度已託歲寒樾蔭焉依嘗畧六  
條之間棠陰密邇復漸九里之餘

回知州賀生日狀

伏承軫記生初騁妍意表月宿南斗無片善以著稱體號西崑有英辭之轍古高情甚渥朽質增慚伏惟某官論議粹醇襟靈超詣材推時彥暫分阜蓋之權清畏人知共說素絲之節夙締芝蘭之好欲光蒲柳之衰貽之嘉音介以難老一字之踰華袞拭目難任雙金之報綠琴視顏何已

謝知州惠生日詩狀

誦蓼莪之篇老將至而增感介黃髮之壽禮甚厚以難任深戢謙摛采增悚汗此蓋某官德惟貴齒仁以

根心決雀鼠之訟於棠陰案無畱牘摛錦績之章於毫穎才有殘膏斯因初度之辰曲借長年之頌確然殊媿下鱗使於長川賁以好辭追馬人之前藻剖珠私喜報玖知慚

回連大庾狀

請聞風問積有歲時獨覲面之差池每馳情而悃結某官學充素蘊世述清埃遠彈弁於梅山久鳴弦於花縣服勞五斗已書集鳳之能振響九臯卽拜筵鴛之寵曲承華訊徒激鄙悰顧藏篋之翩翩慚濡毫之草草

回州學正錄狀

竊審較評粉社立矩芹宮人皆曰然公豈自歎解元  
沈潛蠹簡埋鑱螢窗未逢流水之知尙屈青雲之便  
朋友共惟於講習深戒繡鞶老成端有於典刑遂儀  
逢掖某曲迂玉趾見賁環詞第銘四益之曠有覲七  
襄之報

回何直閣狀

分麾百粵已越戍期徙部七閩誤膺詔札揆譎材而  
惕若倚餘潤以欣然某官冰壑照人驪淵瑞世談必  
傾於一座書能讀於五車下筆掀雷淡墨題乎鼎級

吹藜奪月雌黃匣平蠹篇猗歟雋聲籍甚榮路已青  
冥之垂上卻朱紱以退飛旣聯職於道家蓬萊迺俛  
眉爲諸侯賓客鬱沈亦久緼蓄未攄惟曲借於齒牙  
致屢叨於方面合盍簪於曩日數判袂以積年何幸  
衰蹤復尋舊好驅車倍道庶瞻西屐之登埽榻聽言  
敢後正堂之避

回參議賀郎中狀

分麾百粵已越戍期徙部七閩誤膺詔札揆譎材而  
縈抱倚仗助以信眉某官學綜九邱詞傾三峽丹青  
騁步開天祿之陳編列宿垂芒賜餘廩之佳墨遂抽



簪而飛遞旋側席以旁招方退然油幕之游迺昔者  
繡衣之治增重外闔實煩遠謀顧是微蹤遂將竊食  
介季父同年之好頃接英躔記池陽一夕之談屢更  
緹律復有親仁之便可知逃責之方

代饒州守迎交代蘇尚書啟

伏審出綸法坐剖竹名邦千里心馳共仰甘泉之老  
一襦顏汗冀新蜀郡之謠公望所歸先聲是偃恭惟  
某官稟靈江漢發彩隨和讀八索之遺書備四時之  
和氣挺挺有祖風烈濟美儒先堂堂爲國光輝蜚英  
庭綴自粉闈之影組入芸閣以提綱成春朝蒞野之

儀批夕拜瑣門之救國有六職峻紫橐之貳卿激作  
秩宗續青氈之舊物夢刀屢矣買犢紛然難休老氏  
之祠來治番君之國講德而論四子昔已作詩斂惠  
以施一州今當有詔恐居中道遂儀上京某夙企清  
躔未親嘉誨鳴珂相踵自慚糠粃之揚膠柱不調或  
幸瑾瑜之匿霏霜急節高蓋出關莫裊鼎之嗇宦副  
簪綬之瞻矚

賀知饒州李左司啟

易地出綸顯拜魚符之寵過家夸組甫嚴熊軾之程  
輿誦道歸先聲是偃恭惟某官星躔墜祉月脇鑄辭



盤洲文集 卷五十六  
卓爾昂霄壁千仞而獨立淵乎韜世陂萬頃以有容  
自高鷓鷯之行不藉蚍蜉之援臺官張膽久震懾於  
朝端宰士盡心竭彌綸於省闈惟今剖竹所治蓋昔  
灌瓜之鄰斯民熟五袴之謠指日俟雙旌之至恐不  
席煖遂將節趨某頃綴蓬瀛嘗披雲霧維桑有禮知  
廈屋之焉依置薤可言冀賓階之與進

代程湖州謝執政啟

外史養痾方賦歸之三月輔藩代匱復流渙於九天  
班祿云初衰遲自懼伏念某學不足以要終原本才  
不足以殫劇刺繁鳴玉要津點北門之清近懷金拱

著憇西府之贊襄久休香火之庭自適山林之性制  
綸橫及畱鑰遣行力以疾辭曲蒙恩貸尋邯鄲之故  
步偶未失之求句漏之祕篇他非望者豈期推轂仍  
使建旗惟茲茗雪之區今作股肱之郡起家甚寵臥  
治則難茲蓋伏遇某官德簡細旃望推隆棟方地關  
天開之旦籍甚更張念塗歌里詠之氓遴其共理當  
都俞之閒暇迺假借於拙疎雖鞭策其不能恐譴訶  
之弗免終期美蔭不累化鈞

代賀万俟相啟

渙號路朝升榮揆席家至戶曉幸聖政之一新日晏

登州文集 卷五十六  
天清見眞賢之復用流傳所暨鼓舞率同恭惟某官  
道繼經綸學該貫變挺松柏後彫之操抱著龜先見  
之明徧陟禁途進參國秉閒兩社而爲輔備竭贊襄  
有一言以興邦益崇倚注忽遭讒口遠落蠻溪孔子  
居中不勝麈裘之誦周公在外競歌魚豢之詩大君  
躬攬於萬幾溫詔首馳於一節對揚便殿深契淵衷  
夢卜協求果作巨川之楫棟梁有託大開眾正之門  
方懲沸而吹齋必解弦而調瑟宗祊迨慶華裔具依  
某頃綴事樞密叨蔭樾念階符之久隔際泰道之光  
亨代匱輔藩已竊貢公之喜馳神材館莫瞻漢相之

尊

代賀湯樞密啟

疏榮綸綍冠位樞機朝登眞賢人有嘉頌恭惟某官  
鳳翔千仞樂奏九韶健筆振奇飄飄有凌雲之氣清  
埃擢穎赫赫乎逐日以新自首中於巍科卽立登於  
榮路身爲國史嘗書笏以珥彤命作秩宗遂荷橐而  
持紫入明光而起草對宣室之間神浸積簡知進居  
宥密淵謀入告非堯舜之道不陳遠業所期豈管晏  
之功可許方朝政判東西之府而宰臣充左右之官  
惟是元樞久虛高位式應魁三之象聿求第一之流

盤洲文集 卷五十六  
惟幄既尊何獨遐衝之折摺紳相語益觀上治之興  
某舊矣仰高闕然覩快承流輔郡已叨推輓之私貢  
贖崇階政竊忤蒙之託

代張建康賀程參政啟

顯揚書贊參秉化鈞惟舊德之立朝有頌聲之載路  
恭惟某官學該治忽識判幾微元圭彰閒出之珍喬  
柏聳後彫之操凌雲霄而徹響踐台斗以結知文采  
陸離得大誥三盤之體樞機周密如神爵五鳳之時  
不競急流來休綠野方萬機之躬覽宜一節之首馳  
畀陪都管籥之司易輔郡股肱之寄上既久不見賈

欲納嘉謨使無何果召參遂司大政螺洲有讖鳴閭  
可期某猥備藩宣獲依坱圠馳神西序旅進退以無  
繇投分東阡大譴訶之或免

代謝魏越州啟

種東陵之瓜久甘退屏掌北門之管忽拜誤恩懇避  
莫能疾顛是懼伏念某性則寡與學無它長綴侍橐  
於薦紳毫毛何補奉眞祠之香火齒髮浸衰政斂迹  
以養痾豈牧人之興念遂叨晉擢采積震驚虎踞龍  
蟠茲作京於岳狩雞鳴狗吠仍接壤於鄉關僥幸如  
斯吹噓有自此蓋伏遇某官道包貫變識洞眇縣登

要路以著鞭追前英而參軌方琴瑟更張之際有契  
符相合之知維石具瞻政切公槐之望急流勇退忽  
傳使竹之分當一都一俞之初借三薰三沐之助致  
茲推擇及此拙疎深慮居併之危有幸推轂之意訟  
棠攸阻旅進退以無因蔭樾焉依大譴訶之或免

代賀湯中丞啟

命播芝函位尊柏寺郵封四達歡誦一詞恭惟某官  
超卓賦材剛方厲操自得青雲之路卽膺丹辰之知  
方解絃躬攬於萬機故出紵首馳於一節久不見賈  
非復鬼神之談無以易堯卽居御史之府鷹隼厲橫

秋之勢豺狼空當路之羣凡此茹連有同草薶積三  
千章之奏牘振二十載之臺綱威動垂紳寵躋專席  
近世斯焉獨步益峻風霜泰階所謂六符共期霖雨  
某庇身魚鑰引脰龍門敢修染髮之儀少贊典籤之  
喜蕭辰始肅禁密多休惟寶護於夙興用迎承於晝  
接

盤洲文集卷第五十六 同日申刻勅

上宰相

盤洲文集卷第五十七

啟十七首

上宰相啟

三千年而河清久矣人生之難竢七八月之苗槁幸  
哉天澤之可期敢輸狼狽之私庶動巖巖之聽伏念  
某所稟極陋其愚不移學雖苦於邱墳譽不揚於鄰  
曲操數寸之管偕雁序以齊飛受半通之銅點麟臺  
而羣處陟岵幸迎於禿節入朝遽觸於危機不勝私  
情遂求外服抗塵走俗已日往而去官洗垢索瘢致  
風聞之及嗣抵于深慮儕彼曠僚玷缺隕聲雖生以

盤溪文集 卷五十七  
何面目困窮纏已脫死厓如毛鷲再會赦而始復舊  
階一終星而未刊黜典迫於立壁無以杜門登東臯  
而臨清流自憐骯髒下喬木而入幽谷誰不那榆未  
涓行李之良忽負茹荼之痛偶逃溝壑得累鑪錘恭  
惟相公軌躅孔顏錙銖燕許當聖主解弦而更化以  
眞儒調鼎而贊元道大域中轉洪鈞之一氣計安天  
下猶泰山而四維東閭廣翹材之方西曹無滿謫之  
問某運將傾否筮亦遇干雞失旦而一鳴靡忘振翼  
鵲繞枝而三匝所願安巢儻回肉骨之恩可但漆身  
之報

賀新饒州唐舍人啟

名簡前旒任隆左契聞使君到大喧來暮之謠與老  
人期共快爭先之覩欲伸賀廈敢問典籤恭惟某官  
聲叶舜儀寶參郢握淵雲驚代挺玉壘之靈暉駟瑗  
名家禪金羸之祕縕一時絃改多士節趨結當宁之  
深知拜司光之異擢廣內雅雅世南則行祕書柱下  
昂昂董狐乃古良史正刷橫翔之羽忽回勇退之舟  
不謂吾邦迺煩鉅德凝清香而森畫戟安能久居此  
平闕紫闥而攀台階斯拱而埃之耳某未披雲霧常  
歎參辰麥千畝荻千章遂託居山之庇水一盂薤一

盤洲文集 卷五十七  
本願容置屏之談

荆門謝宰相啟

觀六符於穹漢心切呼天乘一障於重湖身難擇地  
仰銜厚施敢寓微衷伏念某生也數奇缺然智寡頃  
疾顛於僻郡卽卻埽於荒閭賤子具陳誰恤弓傷之  
阨室人交謫畧無裝橐之儲謀半菽以偷生泣編麻  
而瀕死豐澤未逢於時雨高躔已匝於歲星公道初  
開拔拭非辜之士私憂遽集迺遭不孝之帑偶轉壑  
之賒期遇濟川之在上抽毫進牘妄干亨否之榮振  
手覆羹危掇瀆尊之罪傷哉貧也止或尼之敢期播

物之私亦預承流之數震雷霆而破蟄奮此幽蟠注  
渤澥以濯痕畧其宿負大恩特達小器滿盈茲蓋伏  
遇相公任重推溝材收躍冶欲入荒莫不擊壤無一  
介而使抱關吐握旣躬其勞爬羅有味其語前鴻後  
雁或假借於雲霄枯木朽株必薰蒸於芝菌特捐小  
壘漸進畸人某敢不履影懲愆刻肌報德挾泰山以  
超北海揆路非難呼中道而激西江恩波可冀

與交代趙知軍啟

與郡守爲符忽焉分左躡君子之躅有以指南聊先  
汗竹之私用結斷金之契恭惟某官琮璜等潤咸獲



參和呈翔初之靈輝抱昂霄之美幹多文爲富足更  
生博極之書大雅不羣得東平最樂之善儻伴廡仕  
烜赫華名清標共仰於素絲錯節始彰於利器方英  
主攬權綱之柄欲諸姬壯磐石之宗凡朱軒阜蓋之  
除多玉葉金枝之雋一麾敷惠最楚甸之列城五袴  
作歌挹西京之循吏聞今日耕桑之野皆向時荆棘  
之場有凝寢之清香無穿墉之健訟已成樂土爲利  
後人諸公興推轂之心閭郡阻畱鞭之計卽前帝席  
遂陟從班某宿景高標未親餘論水擊三千里而上  
將幸瞻前刃遊十九年而新願言告舊傾翹之切敷

染亡窮

爲大兒江東漕屬上使者啟

冢徒四壁甫從宦海之游我有二天遂席卿雲之蔭  
方憂尸素敢後殺青伏念某馬走品微鼠肝姿薄學  
六甲五方之事佩鞮無聞讀九邱八索之書爲裘浸  
陸蚤因延賞獲免請農正鼓笈以求師敢彈冠而入  
仕費生私室禍及大門遺忠見軫於朝廷異數俾襄  
其窳窳猥令就祿非曰量能退惟一物之不知安得  
三年而善後乘財用之出入尺寸無長計班資之崇  
庫斗筲奚算仰祈覆露尙切赳赳恭惟某官學貫籤

勝識倫著蔡自占月中之桂久騰日下之芬方聖君  
躬攬於萬幾故鉅德首迎於一節奉常蒞禮進前席  
之嘉猷劇郡埋輪賴外臺之華使擢象已躋於中祕  
疏屏深結於上知鏗錡八俊之聲震懼六條之察卽  
歸法從難借餘光某將侍履約獲承鞭策小兒未知  
爲吏盡託恩波若曹無益於官難逃譴域

荆門到任謝宰相啟

貧切膏肓歎編蓬之左計恩深塊土點剖竹之下陳  
逾月汎舟蠲辰視印伏念某千慮無得一班弗窺少  
年妄意於臨民或能豈弟半世銜冤而奪祿不復激

昂敢畫指以書空祇甘心於殍野帝攬權而眞宰用  
士失職者秦道來補剿息黥育豐肌於朽骨捷鱗掉  
尾轉窮轍之清波畧其三尺之拘畀以一麾之未惟  
當陽君之故國在雲夢澤之西偏二百里男三百里  
侯本密連於近甸六十日耆五十日艾皆熟記於舊  
聞雖創痍未復於承平然風俗漸移於醇厚賦輿旣  
簡獄訟不生儻鳴雞吠狗無貪吏之須則去馬來牛  
有樂郊之漸退惟么膺恐負使令茲蓋伏遇某官挈  
國大儒夢崑良弼叶璿璣玉衡之效光金匱石室之  
傳以堯舜媿恥其心斯焉致主彼臯夔密勿之輔可

盤洲文集 卷五十一 五  
以齊名方校短以量長俾承流而宣化興憐困躓初  
試瀾殘豈止捐奉稍以活其妻帑亦將觀政事以品  
其人物某敢不自鞭蹇步庶效秋毫敢作僞聲以入  
萬流民而受賞尙期他日有五六老叟之送行不致  
瘵官是爲報德

謝吏部賀尙書啟

十六年之去國久蟄蝸廬三千里而遡江始開蛇笥  
深憂尸素敢後殺青伏念某生也多藪少而自苦操  
數寸之管偕同產以聯榮受半通之銅羣大雅而雙  
入陟岵甫迎於禿節立朝遽觸於危機既補外以終

更又投荒之及難誰造哆箕之錦遂逢偃月之刀冤  
聲不徹於九閭官簿退飛於一紀幸改絃之盛且得  
夸組於小邦有社有民惟當陽君之故也迺疆迺理  
自雲夢澤而左之儻鳴雞吠狗無貪吏之須則去馬  
來牛有樂郊之漸自惟么膺恐負使令茲蓋伏遇某  
官韜軼英躔鏗錡禁瑣就日妙侍言之選迴天高批  
敕之聲懷文以裁帝墳書成金匱分職而掌邦治班  
峻玉除縑推轂之仁心憐傷弓之弱羽曲垂題拂致  
此叨逾某敢不思效秋毫自鞭蹇步台符在望旅進  
退以未能雲蔭無私大譴訶之或免

上荆南劉兩府啟

十六年之去國久隔鴻行三千里而遡江遠叨魚契  
焉依夏屋敢後書郵伏念某生也多艱少而自苦頃  
中含沙之射遂傷偃月之刀冤聲不徹於九閭官簿  
退飛於一紀幸改絃之盛且得夸組於小邦窮猿投  
林見微柯而亦喜枯魚涸轍得涓滴以更生茲蓋伏  
遇某官勳鞏邦基望崇人傑探金匱六弢之祕分狼  
獼參伐之威貫日月以輸忠挫犬羊而奪氣綺繡安  
堵洽惠露於羣黎樽俎折衝作長城於重鎮某自憐  
骯髒獲託嶢嶻異世荊州復有依劉之幸列侯萬戶

何比識韓之榮

謝王總領啟

船引蓬萊誰恤囚山之久符分銅竹自嗟乘障之微  
尸素云初殺青敢後伏念某干慮無得一斑莫窺自  
射影於含沙祇甘心於殍野會清明之上治點宣布  
之下陳有社有民蓋當陽君之故也迺疆迺理自雲  
夢澤而左之雖創痍未復於承平然風俗漸移於醇  
厚退惟么膺恐負使令茲蓋伏遇某官奧學盈科清  
規出類芒寒列宿言禮樂遠有光華檄到百城問錢  
穀幾何出入外足連營之食上寬法坐之憂卽以節

盤洲文集 卷五十一  
趨難乎席煖顧小吏漫加於鞭策恐外臺不款於幃  
幪某敢不瞻仰光儀奉行約束楚雖三戶尙求瘼之  
未能我有二天茲包荒之可恃

謝宰相改正過名啟

十日寒之拙宦可題於良史一星終矣明刑獲改於  
秋官佩造化之更生顧么微而何報伏念某昨從外  
補已得代還偶親庭嬰既於鑠金故郡將乘機而下  
石指爲奇貨肆厥巧言釀白簡以報私環赤城而滌  
垢灑家舞智卻同牘背之書獄吏趨時別上需頭之  
奏議辟遂淪於胥靡免官自歎於秃翁跼跼墮水之

鳶奮飛無計纍纍喪家之狗濱死誰憐已甘漂溺於  
風波何意清明之天日望大鈞而辨數致密網之平  
反方商鞅作弃灰之刑難乎免者如曾參有投杼之  
事久則昭然茲蓋伏遇某官德類離倫仁心濟物佐  
域中之有大納天下於無冤若伊尹之思匹夫恐失  
推溝之澤謂蘇君當宥十世特施及嗣之恩出嚴棘  
之赭衣脫枯桐於黔突某敢不魂驚曲木跡鑿覆車  
復雁門之蹄益矜細行問翳桑之病長記窮途

賀王成都啟

夢益三刀權尊九牧結裝去國不辭蜀道之難傳命

塞途已覺雪山之重貢誠小牘贊喜高牙恭惟某官象筭諧聲鄧林擢翰望傾後學仰北斗之垂芒名滿廣庭接魁星而齊色會光亨於泰道能寤合於淵衷紬金匱石室之書四提直筆鳴紅藥蒼苔之佩久演明綸追還渾噩之風密吐忠嘉之論適坤維之謀帥輟鼎貴以籌邊吾徒得君卧治之爲淮陽而用黯有欲爲王留行者願孟子之在齊蓋總戎於歲月之間卽穆綽於廟堂之上某退惟樛櫟浪託粉榆流澤九京旣踰袞得見袞之字冒恩一障繇推轂而有味其言顧謝悃之未緘已除音之先播卓然方伯財取道

於鄰疆縛以微官阻望塵於謁舍甫新歲律正釀春寒冀垂意於持生副凝旒之慮遠

答張縣尉狀

鼓琴有山水意未易知音擲地作金石聲自應擊節某官沈酣七畧鑽厲三餘異曲同工已有飄飄之氣博聞強識必成灼灼之名徒煩問稼於老農盍請誨規於大匠欣然嘗鼎媿彼報瓊

同教授啟

訪當陽君之故旣玷左符定管城子之交迺聞高誼驥眉則遠敷社可期某官學海窮源文河涌思青氈



盤洲文集 卷五十一 九  
對客泰然一坐之寒絳帳稱師發彼三隅之誨以茲  
廣譽必上清班顧以薄材遂攀逸駕庶幾良藥之誨  
可追素餐之譏

謝張建康舉十五年前陞陟啟

治病七年那得三齡之艾成功一簣克全九仞之山  
媿鄒子之夜光點汝南之月且伏念某聲銷鄰曲識  
闇邛墳頃佐郡以終更值含沙之肆毒獄皆文致既  
剗跡於周行命與仇謀卽灰心於榮進顧銓曹之不  
齒束閣閱以相忘久矣棲崑期於夢野會更張於治  
具有復起之痿人焚厥丹書假之阜蓋尋鉛刀而再

割積璇厯以一終計班賚之崇庠未離墨綬爲題目  
而甄拔烏有舊章蒙泰階仰而思之幸異時廟有存  
者遂飛一鶚之表用迴六鷁之程茲蓋伏遇某官天  
上景星人中霖雨帝以召公而分陝世期汲黯之在  
朝十國爲連借虎踞龍蟠之重八元斯九積蠅蝟蠖  
濩之思以畱鑰而折衝蓋儒冠之司命興憐社櫟獲  
託鄉粉推轂有味其言猥參寶積納溝不被之澤倚  
埃洪鈞某名玷闕員時增倍價取人失之子羽益務  
省躬草奏不如陳湯敢羞知己

謝魏潭州啟



盤洲文集 卷五十一  
居狄山之一障代賈險冬陳方朔之六符依光垂象  
禮存事大罪恐瀆尊伏念某馬走品卑雞尸用小引  
船而去渤海寔遠蓬僊登陸則有天台亦終瓜戍孰  
料含沙之毒巧符偃月之謀銜冤莫叩於九閻奪爵  
遂縣於一紀循陔荒服幾不免於惡氛負土故山抱  
亡厓之沈痛會蠲除於密網得撫字於疲毗考前召  
後杜於往圖未能敷惠勝曲沮清漳之遺阯何以銷  
憂欲追譽郵實資庇蔭恭惟某官材推隆棟名簡細  
旃初躬攬於萬幾卽首馳於一節談曰猶望高子賴  
以興邦道蓋自比孟軻去其塞路烜赫改絃之治超

踰補袞之詩溜蠹靡畱紀綱丕變我心匪石必公道  
之大行眾口鑠金以价藩而靜鎮薰重湖之叶氣鬱  
四海之甘霖某辭叨抽毫神馳茸蠹仰旃幪於夏屋  
竊動歡顏期垓北之大鈞儻收棄物

與交代梁判院啟

聞買臣之引綬有客傳呼先越石而著鞭與公汎埽  
重慚簸糶敢廢裁緘恭惟某官結綠輝山長離覽仞  
家傳赤鳥鄙簪笏於懷繡志凌青雲圖翰墨之動績  
破古書之萬卷諧雅奏於九磬繫聳壑之超羣卽監  
州而騰譽上念四蛇之輔嘗問世卿人稱雌霓之詞

盤洲文集 卷五十一  
可司帝制曷爲頰首亦欲乘邊挾清漳而倚曲沮獨  
有仲宣之賦祕明璣而潛美玉來續贊皇之詩某惠  
不蘇枯罪難逃責切喜契符之合適逢筆硯之交必  
懷瑾以匿瑕不索瘕而洗垢情同兄弟非彼一時之  
面朋好永子孫以吾兩人爲鼻祖

同富提刑啟

天陛出綸坤維揭節方君行仁政務臻禁網之寬欲  
下無冤民尤遴憲臺之選郵音所播僉誦曰然恭惟  
某官降祉雲達騁辭月脇惟慶歷之夔高有列傳言  
視西漢之韋平不同日道宜有家傳之學益增世濟

之光自陟要津共騰廣譽天下號曰八俊比迹東都  
刺史問以六條飛聲南服果聞簡注進掌平反諒無  
席煖之淹卽有囿空之效遂迎召渥歸立從班某夙  
仰高標未親餘論曲城僻壤幸逢四牡之馳除館清  
泉遂借二星之重

前空一行

盤洲文集卷第五十七 同日午後五鐘校

盤洲文集卷第五十八

啟二十二首

迎施運使啟

傳建節乘輅之命竊喜旃幟講抽毫進牘之儀不虞  
蹉跌恃兼容之雅量寬再瀆之嚴誅恭惟某官學蘊  
淵深材猷超卓喬枚聳壑必應明堂之須英采輝山  
見稱東序之祕自登文石益振芳埃著嶺表之澄清  
寄湖陰之飛輓二星所次仰高漢而熒然六轡載馳  
環列城而惕若仄聞騶哄密邇置封某鼠技雖窮虎  
符無補解印綬而輕去未敢望風負弩矢以先驅由

茲指日

答凌鼎州啟

伏審解組極邊擁麾名郡未還筆橐之舊列尙鬱摺  
紳之公言恭惟某官量賦登閣識該貫變大對比魁  
星之色高談開霖雨之期禁路光前思湧泉而錯枉  
長城扞遠名立峴以蜚英方清朝渴竚於儀刑豈窮  
塞久勞於籌畫少移印篆以便節趨漁洞桃花寧作  
成蹊之計沙堤槐影想聞呵道之聲某蹈景歷年託  
鄰旬月千里糧不齎行也有慚事鄭之儀萬戶侯豈  
足道哉竊幸識韓之喜

同郢州侯教授啟

農疇聯屬殆雞狗之音相聞宦路差池乃馬牛之風  
不及敢期四益先枉一行伏惟某官雅叶舜韶寶參  
和璧九變復貫執古道之權衡五色成文絢雕章之  
黼黻士久尊於講席人常滿於坐氈洋然庠聲籍甚  
朝望過郢中而歌雪難措客詞居稷下以談天共傳  
師說卽汗青於石室遂持紫於金門某質臯庸常心  
慚撫字斗升涉遠正思鄉動遊子之情咫尺仰高如  
逃谷有足音之喜

同胡知縣啟

讀太史之傳仰伯始天下之宗官君子之鄉講士龍  
雲間之譽何期四益先枉一行恭惟某官覽初呈祥  
額門種學喬枚挺特材可備於明堂拱璧陸離寶盍  
陳於東序重以鶴原之望共期鵬海之程卓爾高標  
恬於榮進芙蓉泛水久拄頰於名山桃李成蹊將俛  
眉於壯縣少試絃歌之績卽參紳佩之班某自顧凡  
蠢漫無善狀爲孟玉而設榻迺幸肯臨曉漢陽而置  
孟願安承教

回王潛江啟

鳴雞吠狗幸四境之相聞足鯉多鴻枉一行而見寄

深佩謙謙之好有慚草草之酬某官輝穎時流叢芳  
世烈允蹈淵源之學交稱盤錯之材千室鳴絃有長  
謠之詠德餘糧栖畝繇善政以產祥爛其桃李之華  
屈此梗枿之榦竚聆公舉入綴清班某猥玷郡章獲  
分鄰燭明珠絢彩知碕岸之不朽良藥發言庶沈痾  
之可去

與周郢州啟

鳴雞吠狗夙通里巷之驩食瓜條桑重結鄰疆之好  
可無一紙往白雙旌恭惟某官包括多聞充盈雅量  
比美玉精金之稱寶遇盤根錯節而知材繇綸寵以

專城有禱歌之塞路凝清香而談笑最治行於等夷  
賜洛濱之詩正開元之重外奉會稽之計宜嚴子之  
留中某願以凡姿飄然遠宦河潤九里蔭方賴於餘  
波醫折三肱言佇期於良藥其爲瞻邇未易布宣

徽州到任謝宰相啟

起徒中而護塞甫閱三時涉畿內以典城旁鄰四壁  
仰德輝而咫尺超恩紀於尋常伏念某造命多奇憂  
貧甚久爲十年之計者簷石無儲取一障而乘之大  
鈞未報遠泣彫殘之俗畧無勞來之功正懼詣曹迺  
叨易地旣斥堠免望烽之卧敢過鄉效垂組之夸矧

是富州咸謂溪山之勝茲同輔郡密依日月之光在  
古今選用之不輕獨朝夕憂虞其弗稱茲蓋伏遇某  
官道高夢野望峻經邦右商實惟阿衡帝心平倚使  
趙重於大呂國勢尊安以時棟而掄材蓋儒冠之司  
命取上駟不遺於下駟由遠郊遂寘於近郊凡此生  
成若何糜殞某敢不力圖撫字用答使令聞羊然後  
及牛敢專任數搏蝨不可破蝨戒在容姦

賀湯左相啟

伏審庭渙明縉朝登隆棟轉洪鈞之一氣久矣贊元  
陳泰階之六符誰其出右巖廊有慶華裔具瞻恭惟

某官智過萬人德尊一代金口木舌集聖賢之大成  
淵角山庭應乾坤之上瑞充積覺民之道踐行稽古  
之言以著龜先見之明致琴瑟更張之治成湯之於  
伊尹所謂千載相逢孔子傳之孟軻共仰大儒之效  
屬有甲兵之問不無疆場之疑邊瑣周知第沈烽於  
幽障廟謨素定迄奠枕於上京副袞衣虛左之求賴  
鼎鉉光前之傑注意采重顛面益尊某身在方州心  
馳潭府望塵擁笏莫瞻僅於喬槐贊喜抽毫聊整齊  
於尺楮

謝王樞密啟

起家荒戍旁鄰左社之巢易地輔州復接東阡之畛  
溢寸襟而懷德具片札以貢誠伏念某技則五窮慮  
無一得自禍萌於偃月已望絕於干霄落南山之其  
久營半菽決西江之水孰顧常鱗忽叨乘障之除未  
著利毗之最飢者易食謂拙政之可稱實不副名偶  
外臺之並奏何期誤渥驟畀邇封夸三組以過鄉敢  
循覆轍歌一禱之安堵請事舊聞茲蓋伏遇某官任  
重經邦道高弼后楓宸納說非堯舜而不陳松漠結  
成雖蘇張而猶劣夙垂推輓致玷選掄某敢不願補  
毫分恪遵甲令台星兩兩仰光炤以非遙夏屋渠渠



喜幃幪之有託

回通判啟

伏審拜恩中禁贊治名城枉月楮以見詒知星屏之  
且至恭惟某官材猷挺特學蘊淵深英采輝山見稱  
東序之祕喬枚聳壑宜應明堂之須吏久作於一行  
任尚居於半刺同流王化政須康海之功高蹈天衢  
難屈凌雲之氣某久聆雅譽未際英標將結好於金  
蘭庶免愆於銅竹

回孔主簿啟

登仲宣之樓正遠懷於吾土曳任君之杖乃專守於  
鄰邦非藉揄揚那能僥倖伏惟某官稟暉闕里馳譽  
儒林杞梓干章可謂昂霄之幹鳳鸞六翮共稱覽勿  
之祥卽上要津遂據素蘊某頃雖一面忽已數年沃  
若惠音顧瓊瑤之何報使之免戾幸藥石之不忘

與江州汪直閣啟

易地分符遙指高陽之里問津弭楫將披樂廣之天  
敢修好於柔緘以聞名於畫戟恭惟某官覽輝千仞  
擅價連城蘊弼中彪外之姿挺博古達今之識縹囊  
盈卷摛黼黻之躋辭白水飛榮列龍蛇之英輔自登  
文石之陞遂直道家之山長倩論議有餘詳試左馮

盤洲文集 卷五十四  
之政次公治行第一首馳西漢之聲某鄉社相鄰賓  
階未步言如良藥願見枕中鴻寶之書祿必素餐免  
坐柱後惠文之法

與饒州唐舍人啟

公堂懸榻記陳雷膠漆之情便郡把麾託虞虢輔車  
之勢退循誤渥端出游談恭惟某官英氣吐芒清襟  
邁往千仞覩儀廷之瑞九磬揚閒代之音紬金匱之  
圖書粲然麟趾夾紫宸之香案卓爾螭坳繇綸寵以  
專城有禱歌之載路嚴助勞侍從之事對以春秋文  
翁修學校之官比於齊魯某自睽德宇已閱歲華受

一塵而爲氓夙依廣廈潤九里而蒙福復竊餘波

賀張尚書啟

伏審命傳紫誥名得青氈復用張子房增漢京之氣  
象有若南宮括作周室之典刑置郵流行海寓呼舞  
恭惟某官量包廣博識判眇繇經綸自得於胸中糟  
粕不膠於紙上掌建國之六典多士彈冠有興邦之  
一言宵人斂衽粵從去魯誰不劇秦旣摧偃月之堂  
卽驗反風之卜三接之際百神載驩我識履聲慶細  
旃之圖舊民瞻巖石期寶鼎之調元必有超卓不羣  
之謀以振光榮莫大之治公固自任非堯舜之道不

陳人亦有云豈管晏之功可許其於施設一新見聞  
某賀廈情深埽門跡阻字踰華表已叨薦禰之私物  
播大鈞願備鑄顏之列

賀何大諫啟

伏審制綸誕布從橐顯持名者實之賓久積稜稜之  
望官以諫爲職愈伸蹇蹇之忠邸狀所傳僉諧相慶  
恭惟某官玉輝千仞樂奏九磬堯醴舜薰絕翰墨之  
畦逕周情孔思酌道德之淵源自結眷知浸居言責  
幸聖主和顏而納誨故爭臣造膝以陳辭卓爾不羣  
如鷹鷂之逐鳥爵去其泰甚當豺狼不問狐狸欲崇

丹甌之權迺峻青蒲之拜儒先益進善類焉依視越  
人之瘠肥孰疑陽子見鄭公之嫵媚必相唐宗某跡  
遠鷄翹喜同燕賀號五雲體疊榮謙牘之藏封萬戶  
侯未快賓階之覩

賀朱中丞啟

伏審命播楓宸位尊柏寺幾年弄印上日無以易堯  
一角峩冠仕者皆嚴憚黯幅員相語綱紀畢張恭惟  
某官天壤蜚英山川稽瑞適堯舜帝王之道入淵騫  
德行之科茹古涵今後學者有所統弼中彪外諸大  
夫皆曰賢若時題品之公自奮功名之會振爭臣七

人之職踐御史三院之班志在擊邪如鷹鷂之逐鳥  
雀事先去甚當豺狼不問狐狸奉簡以聞垂紳皆震  
積此立朝之望隱然執法之除虛位揖第一人具瞻  
獨坐籠街過三百步孰敢並行少倚風霜實階霖雨  
某獲觀除目偶抗塵容因筆墨以貢詞情均燕廈想  
簪裾之贊喜望隔龍門

賀楊尙書啟

伏審命出法宮位高常伯夏官其屬六十久虛司馬  
之稱武王有臣三千斯掌戎車之政郵籤四達輿誦  
一同恭惟某官識遠經鄩量函德宇雅音從律中金

石於宮商闕步離倫去翰墨之畦逕早颺聲於全蜀  
已減價於他楊久矣韜光筮之遇泰青瑣初批於詔  
敕黃麻久演於訓辭兼麗卿雲由漢未之有也上規  
姚姒下周者其誰乎遂躋八座之尊仍領七兵之舊  
峻班聯於玉筍增光焰於金蓮帝曰識公上星辰而  
聽履人期柄國作舟楫以濟川某獲覩絲綸莫陪簪  
笏寵踰華袞嘗叨薦禰之私氣轉洪鈞或有鑄顏之  
幸

賀王樞密啟

伏審法宮渙號右府居尊魁一星曰天樞有光乾象

面三槐者公位益峻巖瞻人傑延登頌聲騰踊恭惟  
某官量吞陂頃識洞著叢健筆振奇飄飄有凌雲之  
氣清埃擢穎赫赫乎逐日以新頌正色以入臺不悅  
眉而媚竈上既知其直道人爭仰於令名暨琴瑟之  
更張見棟梁之巨用尊朝之始舉國相驩置郵流行  
追大誥三盤之作樞機周密如神爵五鳳之時偶生  
疆場之疑頗有甲兵之問心在王室請使者之長纓  
口伐可汗戢武人之蕭斧至自朔漠安若泰山王言  
大哉位冠籌帷之上相尊等耳名參台鼎之閒凡此  
寰瀛期於霖雨某情深躍冶迹阻班庭萬里折衝共

慶精神之壯四子講德願贊股肱之良

賀沈舍人啟

伏審命播朝听恩隆接晝鳳閣日舍人之樣快覩黃  
麻史官重宰相之權兼提直筆時有得賢之慶士歆  
稽古之榮恭惟某官樂奏九韶玉輝千仞躋辭行遠  
屈宋當得作衙官廣譽離倫曹陸羞稱於童子獨當  
文陣連中儒科代言已妙於六題舉世皆期於三字  
久徊翔而難進會總攬而彙征海中有蓬瀛作英躔  
之領袖李下無蹊徑振公道於銓衡方四禁之簡材  
爲九重而起草煥星斗文章之麗鼓雷風號令之傳

夫惟思若涌泉然後言如出綉虞夏之書渾渾爾可  
以齊驅伊望之業凜凜乎行將爰立某自睽符采屢  
變律筭三人同行有我師嘗攀逸軌千里其外日旬  
服幸借末光願崖畧於賢書免沈迷於吏牘茲因贊  
喜庸敢投誠

同甄教授啟

伏審主盟儒道領職校官枉汗竹以見貽知成瓜之  
已及伏惟某官器非近用學總異聞蚤奉月窟之芳  
大振雷門之響未通閩籍來續序音六七子之詠暮  
春正虛品藻二千石不如逢掖迺得楷模已擊節於

鴻文更傾心於

願言強飭以速問津

同張信陽啟

登仲宣之樓正遠懷於吾土光陸君之佩仍更治於  
富州未講一行之書徒銘四益之德伏惟某官飛談  
卷霧逸氣橫秋學本本以治聞才多多而益辦爲繭  
絲於保釐已播驩聲離鵬鵠之風塵倚看長翮某來  
游珂里尙隔瑤林願聞拔薤之規庶遣伐檀之刺

同嚴州樊察院啟

寄耳目之臺久畱封外治股肱之郡密邇日邊風采  
一新耄倪相慶恭惟某官道推先覺節挺後彫探聖

盤洲文集卷第五十九  
域之奧篇聲諧韶濩首英躔於淡墨名震京師惟卷  
舒不隨乎時故否泰各反其類解紘之始冠豸甚休  
去義府雙闕之前未伸直氣居元禮八俊之上遠振  
芳埃輿人俟調鼎之期釣瀨非黔突之地某粵從志  
學固已仰高庭尙隔於貢棊壤幸連於魯柝兩歧秀  
麥浸聞鄰富之謠七月食瓜有賴餘波之潤

盤洲文集卷第五十八 同 卷五十九

上堂一

盤洲文集卷第五十九

啟十九首

與太平州周侍郎啟

北斗仰韓舊矣執鞭之慕餘波及晉闢焉貢牘之儀  
輒干禁瑣之尊少贖後時之罪恭惟某官材優王佐  
學冠儒流蚤登清切之班雅負經綸之志席前奉簡  
與秋霜而爭嚴柱下濡毫藏名山而不朽直躬獨步  
絲宇具瞻不勝眾楚之咻自適一邱之樂迨更張於  
琴瑟方復拜於旂旒乃陟天官仍司東學眞賢去位  
不稅冕於當時多士叩闥有舉幡之故事遠襲陽公

盤洲文集

卷五十九 啟

一



之迹具存柳子之書惟道大而不容必天定而能勝  
屢專名郡以利斯民凝燕寢之香少煩重外作巨川  
之楫行且處中某齋落之餘沈迷於此小侯事大國  
正勤鄉往之私清渭分濁涇庶託品題之末

賀饒州周侍郎啟

伏審秋浦政成受白髮厖眉之餞螺洲頌作喜朱轡  
卓蓋之來初令一新英聲四達恭惟某官文穿月脇  
名埒斗魁闕豹管之一斑眾知退步讀韋編而三絕  
久積多聞既挺拔於俊躔遂表儀於侍橐典選振山  
公之啟披文彰刁姓之非自出帝城屢專民社茲鳴

珂之密邇同衣繡而少畱君薄淮陽耶方凝旒之重  
外誰踰仲卿者必補袞以處中某頃隔珠庭幾周玉  
燭蒹葭所倚嘗分芸閣之光桑梓未恭又賴瓜疇之  
潤

賀吏部沈侍郎啟

伏審顯盼帝制真貳天官黃麻似六經寶璐已高於  
紙價青氈曰舊物精金遂煥於帶圍邸狀播傳儒流  
歆豔恭惟某官人中間氣天上謫仙以昂霄聳壑之  
材有斂矧焯鋒之氣淵源道德異乎綆短以汲深星  
斗文章所謂芒寒而色正茲重闕於紫闥因小憩於

西垣兼麗卿雲由漢未之有也上規姚姒下周者其  
誰乎凜封詔之直聲見改絃之公道欲革三銓之弊  
復思一代之英藻鑑既精甄陶可必某情深賀履跡  
阻登門塊圯之播大鈞既聞輿誦吹噓而起窮羽有  
待片言

賀汪侍御啟

伏審正色左臺御史聳殿中之職拜榮南榻惠文光  
柱後之儀風采益尊見聞皆震恭惟某官寶侔鼂采  
譽冠月評堯醜舜薰絕翰墨之哇逕周情孔思酌道  
德之淵源自祕府之校文以清埃而露穎一言寤意

共高憂國之風六察分官卽有事端之語如鷹鷂之  
必逐烏鵲當豺狼則不問狐狸白簡凝霜方宵人之  
落膽巨川作楫期良弼以調元某賀廈情深埽門跡  
阻齒牙借譽每叨華袞之褒羽翮問程有待洪鈞之  
播

賀陳察院啟

伏審出綽法官振纓憲府繇太史而爲御史四海聳  
聞遷元方而召季方一門鼎盛輒戴小牘以述僉言  
恭惟某官樂奏九韶光分五緯休揚令問赫赫乎逐  
日以新刊落陳言飄飄有凌雲之氣遠邇爭傳於師

盤洲文集 卷五十九  
說卷舒豈自於人爲逢解瑟之清明果著鞭而踔厲  
既登文石之陞遂陟道家之山金馬迭居丕變上車  
之諺阜鵬始擊具瞻冠豸之威少煩明目張膽於歲  
月之間卽見聚精會神於槐楓之上某搖心函丈洗  
耳速郵聞伯夷之風再三立懦效貢公之喜萬一噓  
枯

賀陳殿院啟

伏審出言法塵進步憲臺山岳動搖已振豸冠之職  
夔龍接筵益崇鷲羽之班朝尊端人士作嘉頌恭惟  
某官量涵德宇識邃經邦執古道之權衡諧正聲於

韶濩望傾後學仰北斗之垂光名滿縣區軋魁星而  
齊色遲徊久矣問譽沛然自復入於帝城卽高驤於  
朝路西崑影組居張率之清官東觀紬書稱董狐之  
良史暫騫粉省嘗依黃樞俯從六察之游茲慶副端  
之拜人中屈軼惟直指於回邪柱後惠文咸具瞻於  
剛介風霜是畏霖雨可期某獲覩速郵正拘左契捉  
衿布武莫勤倒屣之迎貢牘搖心敢贊典籤之喜

賀禮部金侍郎啟

伏審顯膺明制進陟清班監二代以從周上方稽古  
典三禮而咨伯時可恤功遠暨速郵畧無異論恭惟

盤洲文集 卷五十九  
某官逢原貫變挺操剛方白日青天  
高卿高明於輿阜  
黃鐘大呂備和粹於律同頃正色以入臺不俛眉而  
媚龜鵬鶚匪眾禽之偶豺狼空當路之羣惟道大而  
不容故天定而能勝尊朝之始通國相驩果聞前席  
之談妙簡細旃之聽臯陶為理解禁網以破觚伯臣  
司宗告官箴於執玉共期調燮以慶榮懷茲逢荷橐  
之除尚謂出綸之晚某備員仁里借潤榮河仰先達  
之姓名如瞻箕斗筵下陳之賓客正隔雲泥

與交代沈正言啟

伏審簡在淵衷改臨輔郡告舊尹之政媿此一麾採

遊童之謠期於五稔先聲所暨公論咸歸恭惟某官  
星斗吐芒隨和稽瑞以習是勝非之學為閩中肆外  
之文卓爾昂霄壁千仞而獨立淵然韜世陂萬頃以  
有容自高羽翮之程無藉齒牙之譽憲臺冠豸嘗振  
職於風霜諫紙嬰鱗豈竄名於雷電少遲簪筆不鄙  
建旗潤九里而福京師雖倚賢能之力先一州而後  
天下恐非君相之心寧俟突黔卽迎環賜某已書下  
考無補秋豪久馳慕藹之誠尚阻識韓之願積薪居  
上固揚糶之可輕解瑟更張蓋匿瑕之有望

回張侍郎謝送登科記啟

伏以錢萬選而中品事播家聲佛千名以作經望尊  
時傑會稗甫成於槩本發揮猥辱於賞音華袞可踰  
英瑤何報恭惟某官識窮萬戶語妙二京上軋漢周  
擅燕公之大手高出晉魏信籍也之善鳴蚤濟美於  
八科疊颺芬於兩穗盜環決獄蔑聞天下之冤簪筆  
立班有美省中之語某空疎不學編刻非才一卷之  
書必立師既阻得三之問尺牘所傳以爲法永誇儷  
六之藏

賀刑部張侍郎啟

拜命嚴宸升華禁路方君行仁政已見朝令之更欲

下無冤民尤重秋官之寄除音所治善類相欣恭惟  
某官學洞邱墳文摛黼黻黃鐘大呂涵和粹於律同  
白日青天仰高明於輿阜蚤摘髭於上第宜策足於  
要津久矣徊翔沛然譽處暨清朝而解瑟先望士以  
握蘭孝宣中興工既精於技巧皋陶爲理刑幾措於  
繫囚茲慶出綸遂榮持橐仁人既進解禁罔以破觚  
輿論所期濟巨川而作楫某久違崇仞快覩速郵貢  
牘搖心敢贊典籤之喜捉衿布武莫勤倒屣之迎

回蔣通判啟

幾年聆德固望岫以搖心千里寄聲若揮談而對面

盤錯素彰於利器委蛇無媿於素絲歌別駕之功嘗  
翱翔於名郡下封軺之召卽凌厲於榮塗某邈在山  
城闊然賓序鳳毛獨秀旣欣王事之同雁足遠飛莫  
報書郵之貺

賀吏部凌侍郎啟

伏審中宸作命小宰得賢并九里之潤以福京師效  
稱異等掌六典之貳以治官府眾孰聞言恭惟某官  
媿德照隣清規出類黃鐘大呂參嶰律以含和北斗  
泰山偃儒紳而蹈景自解絃而更化卽結綬以立班

螭坳獨擅於史才鳳閣共推於文樣正朝夕論思之  
美卓爾得君以春秋褒貶之嚴翩然出畫連得三刀  
之夢中提六纛之權峴首颺聲說輕裘之叔子昭亭  
覓句接澄練於元暉政成當五月之初環賜出九天  
之上少煩清鑒丕變弊源前馬後盧寒素洽彈冠之  
喜左周右召邇遐指調鼎之期某滌耳速郵搖心賀  
廈小侯事大國兩分東壁之光他日有殊恩儻涉西  
階之級

賀吏部汪侍郎啟

伏審大昕疏寵小宰立班李下無蹊賴典銓之清鑒



遂上有徑迓傳命於速郵賢者尊朝人皆賀野恭惟  
某官中興閒氣元精佐臣河目龜文應乾坤之上瑞  
金口木舌集聖賢之大成自首中於鼎科宜立登於  
要路不能媚寵適卽引舟易地而贊黃堂再斯可矣  
計年而得朱紱一何鈍耶會泰道之改絃入英躔而  
影組剛腸故在直氣不同屢殫造膝之忠又復乞身  
而去坐看巧宦躡取美官老之藏道之蓬領袖久推  
於虞監周日庠夏曰校範模孰出於陽公茲聯筆橐  
之榮少愜簪紳之望掌六典之貳以治邦國固已逢  
辰遂萬物之宜而理陰陽其誰舍我某情深仰斗迹

阻披雲塊北之播大鈞必收棄物吹噓而起窮羽敢  
幸衷言

江東提舉謝宰執啟

影組王畿突不黔而避舍乘輶鄉部印已佩而入疆  
銜德泰階貢誠小牘伏念某生而能薄仕則數奇自  
解瑟之更張兩建旗而無補四牡懷歸於周道已叨  
就日之榮六鷁退飛於宋都誰歎去天之遠重來江  
介豈應星文陟彼景山籠厥槍旗之利亦有高廩察  
其雀鼠之欺所懼弱材難逃大譴此蓋伏遇某官純  
誠弼后善計安邦以公道而提衡爲儒冠之司命大



宋細桷罔非繩墨之分後雁前鴻並受羽毛之賜乃如藹薄亦玷皇華某敢不自策疲駑靡忘穢夜茁牛羊而已矣當服官箴問錢穀之幾何敢爲文具

謝前平江朱舍人啟

引車避道望浸遠於日邊夸組入鄉迹不離於江表謙槩已尊於四益報章有覩於七襄伏念某極陋至愚數奇不耦稍整傷弓之羽再慚賣劍之風過鳳闕以乘輅未能黔突遇鵠原之剖竹不暇舉帷官名幸得於舊甕宦路仍尋於故步雖云食祿之有地頗似販漿而值涼鞅掌之初旰饑是賴恭惟某官堪輿嘉

瑞筆橐前英兼麗卿雲獨颺聲於藝圃上規姚姒蚤出樣於綸闈中遭偃月之讒久蟄衝星之氣會法官之總攬起盤谷以騰振連把一麾咸歌五袴澄江練淨孰追逐於高吟燕寢香凝復芬芳於故事品藻每私於賤子皇華遂黜於外臺儻非良藥之規寧免素餐之責某始叨誤渥謂借末光未報雙魚同作去吳之客重瞻疊嶂但思事楚之時

賀中書虞舍人啟

伏審逢辰得志接晝疏恩螭頭記天子之言久藏金匱鳳閣日舍人之樣真覩冰銜士歆稽古之榮朝享

用賢之福恭惟某官瑞浮玉壘學禪金籙酌道德之淵源高眎千古絕翰墨之畦逕自成一家遠陟王城卽登册府身爲國史濃薰班氏之香口伐可汗不屈漢庭之節旣判花而試可宜鳴玉以躋華況邊塵牙孽之秋賴禁瑣論思之傑山東聽詔使扶杖有感奮之心淮南寢謀無發蒙相姍笑之語得人之效從昔以然少煩襲六之辭共恢畫一之治虞夏之書渾渾爾孰敢並驅伊望之業凜凜乎自然平步某契緣雁塔好重鴿原甫睽隔於趨隅竊瞻翹於賀厦寵踰華袞已叨一字之褒綸氣轉洪鈞必念八荒之棄物

賀劉制置啟

伏審誕揚帝制寵建使名匈奴不滅無以家爲壯懷舊矣諸將於是皆以兵屬初令聳然對壘震驚提封呼儻恭惟某官名聞華裔忠貫義娥異表魁梧稟光暉於川嶽羣書該洽講治亂於古今功旣立於潁濱威遂傾於松漠會姦臣之擅政主和議以銷兵養氣衡湘久鬱輿人之望建牙荆楚近分甸服之權高穹開悔禍之期獷狄倡敗盟之說九重赫怒諸道出師惟發縱指示之得人則磔裂分黎之有日疇咨僉論無易元勳乃盡護於列營冀中興於洪業戎車纔動

盤洲文集 卷五十九  
虜帳潛奔仰多算之乘機宜故都之迎蹕清中原而  
復濟已誓長江絕大漠以暫勞卽刊隆嶠某自傳成  
命竊激懦衷聽綸巾羽扇之談莫參檄筆撫箠食壺  
漿之俗願鼠辟書

賀劉右史啟

伏審命播域中班高柱下東觀爲老氏之藏久振華  
纓右史書人主之言共尊直筆朝有得賢之慶士歆  
稽古之榮恭惟某官雅量測深清襟邁往龜千年而  
五總鶴九皋而一鳴博物洽聞學周公仲尼之道同  
工異曲有相如揚雄之風早模範於天枝已縱橫於

制草不能媚竈又復杜門旣解瑟之更張始著鞭於  
嚴召賜除麋之墨文已應星我獬豸之冠勢能搖岳  
作英游之領袖騰廣譽於薦紳黃屋深知赤墀親擢  
人瑞有鄭仁表侍橐齊肩古事問高仲舒舊甃唾手  
某不瞻芝采屢變葭灰捉刺就階近失拜塵之禮戮  
緘賀廈預欣躍治之期

賀戶部劉侍郎啟

伏審寵趨召節歸冠從班乃立地官以佐王卓然振  
職不有君子其能國僉曰得人恭惟某官天壤知名  
山川稽瑞飛談卷霧一坐盡傾遊刃發礪千人皆廢

盤洲文集 卷五十九  
蚤乘槎而縱壑已簪筆而立朝何物含沙厄風波之  
洶湧幾年茹蠱閱嵐障之卷舒金百鍊而繞指不柔  
玉三獻而刖足非罪會改絃之盛際卽植纛於价藩  
長城方倚於壯猶綠野忽濃於歸興惟貨財源流本  
末未易虛談況金革沸渭汾沔有加常費旣左支右  
吾之不給且上溢下漏之孔多言利而析秋豪詎堪  
俗吏思政而勞旰食孰慰淵衷儻非心計之英定有  
頭會之患上能圖舊公必光前蓋舉偏補弊而多寡  
得宜則散滯取贏而公私稱足算鞭擬古豈管晏之  
功復許乎朽貫指期匪晉楚之富可及也更須碩畫

同卻妖氛素聞倜儻之風必越拘攣之見使中原遂  
脫於左衽斯兩地益美於舊甌采之公言敢爲累句  
某誠深仰斗迹阻披雲秦階有六符之經具瞻調燮  
蟠木爲萬乘之器竊冀選掄

盤洲文集卷第五十九 同日占候

盤洲文集卷第六十

啟十七首

賀建康張相公啟

庭揚坦制節換畱都復用張子房人始知於良策今  
 朝漢社稷年新數於中興奔走郵籤震驚邊帳恭惟  
 某官材苞文武忠格神明熒惑守心嘗生作噩之變  
 咸池洗日能返大昕之朝初秉執於鴻樞卽奠安於  
 龜鼎捫參歷井國功遂固於西垂踏晉批周相業豈  
 談於前代上應棟隆之吉外消戶闔之虞出黃石穀  
 城之緒餘埽青草洞庭之蟠結威讐四夷之長名知

三尺之童何物吠聲舉天飲氣怪已摧於偃月毒尚  
噴於含沙遠登埃德之邛色無喜愠再翫反流之渴  
時有屈信惟用舍繫國之安危而勝負視公之發縱  
居否既極旋乾匪難幸悔禍之昌期稔叛盟之醜虜  
九重赫怒願割地之請焉可從二帝陟方豈戴天之  
讐而不報廟謨潛定戎旆交馳偶遣將之疲駑致涉  
淮而猖獗我師弃甲不競南風之歌有馬飲江孰思  
多壘之辱人心正恐天意已回逢顯冊之布宣快輿  
情而呼僂必資英望始卻妖氛安石將如蒼生何自  
有折衝之畫魯人猶望高子也願嚴叱馭之程乘機

盡復於故疆當軸聿迎於舊物某寅緣先世踊躍大  
鈞盥手發函屢拜一行之賜驥眉茸燾庶叨三握之  
私

賀吳殿院啟

芝檢疏榮柏臺進步動搖山岳脊自結於紫宸接筮  
夔龍班益尊於黑豸端人益國嘉頌塞塗恭惟某官  
色正芒寒心精詞綺高標聳壑仰喬木之千尋利器  
切泥別良金於百鍊迢迢幾載舒卷有時自復入於  
帝城卽高驤於朝路暫分六察遂陟副端柱後惠文  
咸具瞻於風采人中屈軼惟直指於姦邪大振紀綱

即專綫柄某夙叨一挹屢辱三熏斯遠庇於卿雲阻  
再披於巖電削蕭氏之牘雖結戀於離羣濯貢禹之  
冠敢纓情而效喜

賀畱守湯相公啟

肅驅駟傳光佩麟符朝廷不知周大夫久歌袞繡關  
中既畱蕭丞相必洗甲兵九廟尊安二郵震疊恭惟  
某官材推帝賚望峻民瞻窮遠測深馳古今之千載  
植僵興仆踰前後之數公玉燭斯調炎精益煥慶泰  
階之卓爾懷綠野而翩然居東既鬱于與人虛左至  
爲之累月夕羹浸起吳食靡寧當瓜步已應童謡恐

棘門或如兒戲勞軍下詔擇日戒嚴乃注想於棟梁  
以責成於管籥霖雨之思賢佐孰應駿圖半夜而受  
神釐遂前龍席忠已殫於石畫喜果動於咫顏冠規  
殿以立班入經帷而借步睠茲行闕倚我上台雖宋  
璟畱中不從東巡之駕而房喬居守可無西顧之憂  
行復疆封再還魁柄某方漂宦海難走沙隄精神折  
千里之衝式看偉業離奇爲萬乘之器終託洪鈞

賀柳運使啟

伏審戴星叱馭涓日視章咸屬耳於前騶獨驪眉於  
英矩恭惟某官韜藏遠業充物多聞珩璜呈韞櫝之



珍杞梓負昂霄之幹措刑天獄解密網於秋荼足用  
地官腐太倉之紅粟屬控弦之犯塞遂增竈以防江  
六轡有光以穆寧主糧者救也千金所費必孟子持  
籌而算之大愷策動要津唾手某久聆廣譽幸借餘  
波敷衽論心將釋仰高之恨裁緘寫抱少伸贊喜之  
誠

謝兩相還隔下年月啟

日月逝矣失未收於東隅江漢濯之笑不騰於北壟  
貢誠小曠拜祝大鈞伏念某智不周身蹇而知命昨  
含沙之巧中閱過隙以偷生長裾曳何王之門枉尋

豈敢卻行求前人之影退尺自憐逢黃屋之改絃焚  
丹書而彈弁子又有子既齒髮之浸衰春非我春獨  
銓曹之相厄念光陰之不再賴造化之可投遂獲舊  
氈少增短羽石渠通籍固夢斷於昔游朝散入銜將  
坐躋於正秩信眉竊喜鏤骨有銘恭惟某官道德致  
君功動闢國計安天下猶泰山而四維澤任溝中作  
霖雨於大旱盡埽錮人之弊蔑聞失職之嗟軫及孤  
蹤還其故步某敢不隄防墮甌創艾傷弓思枯魚涸  
轍之時鬼能相笑感黃雀銜環之事人豈不如

淮東總領謝宰相啟

寄倉臺之使指方點鄉關督京口之軍須遂聯省戶  
視章莅職貢贖酬恩伏念某學陋寡聞器拘小用兩  
州撫俗媿任棠拔薤之規旬歲慮僚損倚頓監鹽之  
利正虞顯絀敢覬衰遷名筮依烏想天街於夢寐智  
殊流馬惜江道之轉輸方朝廷易將而築壇況淮海  
濟師而增竈多多益辦孰流地上之錢陳陳相因必  
積塞下之粟豈容藹薄乃冒使令茲蓋伏遇某官致  
主德咸備邊慮密璿璣以齊七政氣應燮調尺筆以  
答四夷功成談笑問金穀甲兵之事用構樞橐稅之  
材欲五將軍不患乏興恐一書生弗能塞責某敢不

自鞭駑乘上笞化鈞援枹鼓而立軍門使之宿飽給  
餽餉不絕糧道戒在空餐

賀汪參政啟

顯拜制麻進參國乘忠臣謂之骨髄久賴讜言執政  
猶吾股肱具瞻良弼播傳所暨欣詠則同恭惟某官  
道祕沈潛德輝發越友古人於千載備和氣於四時  
玉潤金聲深造淵源之妙瑰意琦行外無表襮之華  
自得路於青雲卽受知於丹扆論諫皆本仁義卓爾  
囊封吐茹不以剛柔瞿然簡劾方上流有攘狄之役  
以獨坐爲視師之行羽扇指麾聳逗邁之大將靈旗

鑿洲文集 卷之十 五  
踊躍歸侵軼之故疆遠卻妖氛上寬吳食當和戰之事未定而攻守之議並興必倚人英來司國是公輔閒於兩社式轉洪鈞天子守在四夷共觀上策某材慚樗櫟契託枌榆燕廈落成欲奮卑飛之羽螺洲前定茲符大拜之謠

賀袁正言啟

顯膺制綽進陟諫坡速郵傳彈擊之詞絲寓起變調之望恭惟某官儒林宿學藝圃軼材人傑地靈稟光輝於川嶽仙風道骨挹沆瀣於蓬瀛初步武於金閨將範模於玉葉既登彤陛旋入憲臺曾黔突之未能

已昂霄而橫絕振爭臣七人之職致明主三代之隆削稟奉公欣眾正之開路伏蒲獻可待一言以興邦某職有官箴禮難賓謁聽朝陽之鳴鳳竊激懦衷寓遠客之雙魚庶通鄙抱

賀張少傅啟

伏審誕布制麻進班孤棘武丁得一傳說致商道之復興江左自有夷吾知胡人之必滅慶千廟社聲塞乾𪔂恭惟某官盛德格天誠心憂國埽清君側紀虞淵取日之功塵戰關中得高屋建瓴之勢起燕閒而制閩慰遠邇之瞻巖籌邊如卜於六龜增竈浸營於

萬弩志將誓楫利在投機赫英主之龍飛思宗臣而  
駟召介圭入覲繡黼來歸信眉乘縱壑之秋造膝盡  
興邦之策連朝或聞設醴中吳幾於傳餐台鼎位虛  
有欲爲王畱者甲兵任上疇咨曰汝往哉乃陟貳公  
之尊以受八面之敵開幕府於撞牙之地護行都猶  
奠枕之年導桐柏而會泗沂聿新使範分貲參而界  
韓趙大啟國名制五軍千里之屯苞四履十連之寄  
犁庭可俟貔虎俱有關心偃革而旋貂蟬茲惟故物  
某誦絲綸而溢喜因筆墨以貢誠憲宗任裴度爲難  
古皆如是鄭人報東門之役今豈不能竚勒景鐘永

光汗簡

回常州知郡啟

伏審式差穀旦來憩棠陰凡千里之提封皆一詞而  
詠德伏惟某官受材卓偉函器宏深杞梓千章見謂  
昂霄之幹璆琳五穀共推瑞世之珍自歷華途共傳  
美譽果拜絲綸之寵超分符竹之榮揚贈扇之仁風  
芬芳大播沛隨車之甘雨惠愛無私顧以薄材遠依  
餘潤曲枉一行之寄但銘四益之謙

賀宣撫陳舍人啟

伏審光膺三接疊慶九遷綸出詞闈方欲鼓雷風之

盤洲文集 卷之十  
號令節兼帥閫又將加草木以威名邸狀始傳輿人  
相賀恭惟某官韜經濟之業妙深湛之思譽蚤冠於  
英躔望獨高於禁路國史咸稱良筆寧阿意以特書  
人主亦有逆鱗敢犯顏而直諫輟從三院進表六官  
惟武部必講於軍防以王人周行於淮甸屯田具便  
宜之奏保障有險要之圖借箸以籌凝旒有喜天庭  
揖遜仰帝舜之重華人傑延登先甘盤之舊學甫拜  
西垣之命卽分北鄙之憂蓋乾坤開撥亂之期使夷  
狄箝發蒙之語畫疆置使貳秦階六符之權掌鑰殿  
邦行方伯連率之職仍冰銜於鷗閣新油幕之麟符

瞻前無鄰自我作古竚清邊而訖事卽當國以調元  
某鞅掌無庸倅幪有託理財給餉懼不稱於使令經  
武視師幸竊窺於方畧

賀方鎮江啟

伏審課最乘邊恩隆易地長江古爲天塹密護行都  
千里方曰王畿斯名重鎮歡呼比屋企望高牙恭惟  
某官量若海涵識猶龜卜盤根錯節知利器之有餘  
赤箭青芝見敗皮之何用惟胸次足紛綸之學故人  
中推超卓之材自舟退於急流幾轍環於諸道芳埃  
所播眾譽迨歸再擁輜軒孟博有澄清之志六分符

竹道州勞撫字之心當淮濱大蹂於腥羶獨淝水皆  
爲之煨燼疇咨哲艾還定流逋憤可買而已徧於田  
疇蝗雖飛而不傷於稼穡共稱慈父丕變樂郊爲氓  
俱受於一塵報政遂成於五月榮開天上官近日邊  
汲直不薄淮陽折衝有賴叔度之來蜀郡敷惠何難  
卽迎紫橐之除靈爲黔突之計某自離賓幕屢換律  
筩豈期給餉于轅門復遇凝香于燕寢訟棠可款曾  
無步武之遙蔭樾焉依更借齒牙之助

賀平江沈侍郎啟

伏審移輪天末擁戟日邊已滌篆而颺芬庸發函而

贊喜恭惟某官卓然人瑞籍甚吏師學該治忽而恥  
作虛談德稟雄剛而力行直道再分郡寄有龔遂之  
遺風三仕京華無子文之喜色詞掖變斲窗之誚銓  
曹革盈几之私懷鮑宣飢渴之憂上賈誼治安之疏  
邇遐相語鯁亮有聲繫今日之輔藩獨長洲爲佳地  
接近鳴珂之里傳呼持橐之臣竊聞班錄之初已見  
恩威之並老姦削迹編戶信眉凝燕寢之清香棠陰  
閒暇開高秋之紅旆竹使尊榮方廷中厯召於敢言  
況海內共期於與政卽尋入覲之詔復結去思之情  
某密邇門闈焉依宇覆問一歲錢穀之入正仰殘膏



盤沈文集 卷六十一  
交四鄰賓客之辭敢藏窘步

賀兵部周侍郎啟

伏審入覲咫尺顏復騫禁路胡塵未靖擇武部以非輕  
國勢既尊慶故疆之可復郵音所暨輿誦載騰恭惟  
某官古學貫穿時名暴白懷孟子敬王之道抗霍光  
震主之威挽脫杷推閔儉人之馳騫燭照龜卜決邪  
黨之消亡以砥柱而障頽波蓋疾風而知勁草改絃  
之始荷橐于中益高難進之標不改後彫之操翩然  
出晝久矣專城會上聖之龍飛先羣公而駟召造膝  
皆光前之說沃心無見晚之嗟方興闢國之師遂總

司戎之柄匈奴直百年之運必覆妖巢宰相遂萬物  
之宜共期隆棟某情深仰斗迹阻披雲給餉軍門亦  
是夏官之屬儲材客館敢追望士之蹤

賀戶部趙侍郎啟

伏審拜命中宸爲眞左戶播袞綸於六幕榮寶帶之  
九環恭惟某官充物多聞縱橫利器光前絕後名聲  
顯於朝廷肆外閔中議論冠諸宗室久騫禁密妙簡  
淵衷足用地官斗筭之徒何算也伸威天府銖兩之  
姦皆知之以細札而攝空遂青氈之圖舊蓋萬旅雷  
驅之役正千金日費之時自非鞭算之過人安得錢



盤洲文集 卷之十  
流而富國實材復用輿誦迨歸助成再造之勳益對  
非常之渥某自憐骭髀獲託旃幪率屬分曹身隔江  
湖之上裁緘遣介心馳階闥之間

賀陳運使啟

伏審言出明綸任隆膚使已入疆而滌篆敢憑驛以  
裁緘恭惟某官峯距高明材能超詣詠羔羊而厲節  
參軌前英瞻黃鵠之凌空著鞭夷路阜蓋溢昔禱之  
頌朱軒攬沃轡之威吹噓既徹於榻前飛輓孰踰於  
轂下二星所次應穹漢之編珠四牡載驅邁清班之  
鳴玉某夙聆廣譽未際高標督餉轅門正懼西曹之

謫搖情竇仞願分東壁之光

賀張樞密啟

伏審嚴宸圖舊密地陟明運籌帷幄之中遐衝震疊  
斂衽廟堂之上神器尊安廉陛有光塗川相慶恭惟  
某官聖門觀妙昭代蜚英識極高明質著龜而不惑  
氣至剛大壓嵩岱而莫搖共尊難進之風獨保後彫  
之操龍飛有作駟召鼎來安石將如蒼生何難從雅  
志魯人猶望高子也拱埃近音方宿畱於中途卽延  
登於右府入朝之始通國相歡天子守在四夷式觀  
上策公輔閒于兩社卽轉洪鈞某躍冶情深班庭迹

阻螺洲前定知爰立之有期燕廈落成何卑飛之足歎

盤洲文集卷第六十

同日六五條校目是日共校十七卷

前空一行